

San Marcos

1 Jaduhñä Diosmädia'agy chohnda'agy ja'a Jesucristocøxpä, neby jiajty, neby yhabejty. Dioshuungä Jesucristo je'eduhñ.

²Jaduhñ jim cujaay myiñ nocyjiooty, ja'a Isafas jecy quiujáhyäbä. Ja'a Isafas, je'e ja'a Diosmädia'agy jecy yajwa'x. Jaduhñä Dios ja'a yHuung jecy ñämaayy:

Huuc mäadow, chámhøchä nguguexy nguejxø'øga'añ maa miich mnøcxø'øwa'añ.

Je'e ja'a mädia'agy nøcxy yajwa'xa'añ coo miich jim nøcxy mwäditaambä.

³Mänitä Dios jiaac mänaañ: “Pactúmhøchä nguguexy nøcxy wiädita'añ. Coo ja'a cu'ughajxy jaduhñ miädoyhada'añ coo ja'a wiingapx jøjcapxøøbiä jim tøø quiäda'agy pactuum, mänit hajxy nøcxy wyiingapx jøjcapxø'øwa'añii coo ja'a haxøøgwiinmahñdy hajxy ñajtshixø'ød, coo ja'a Jesús ja'a miädia'agy hajxy miäbøjcät, ja'a hajxy mWiindsønhadaambiä.”

Ja'a Juan jaduhñ nänøømä, ja'a hánajty mäyajnäbetaambä.

⁴⁻⁵Mänitä Juan je'e jiaançh tægøøyy mäyajnäbejpä jim jäguemduum, maa ja'a mõjnøø hánajty xiøhatiän Jordán. Mänitä jäya'ayhajxy may miejch maa ja'a Juan hánajtiän. Jim hajxy hánajty choon maa ja'a naax hánajty xiøhatiän Judea, mõød jim maa ja'a cajpt hánajty xiøhatiän Jerusalén. Mänitä Juan ja'a cu'ug tiægøøyy yajwiingapxøøbiä coo hajxy ñäbétät, weenä jiootä wyiinmahñdy hajxy yajtagach. Jaduhñä Dios ja'a piojpä quiädieey hajxy yajnähwáatsät. Mänitä cu'ugä piojpä quiädieey hajxy ñägäpaxy. Jaduhñ hajxy hánajty miäna'añ cooc ja'a yhaxøøgwiinmahñdy hajxy hánajty ñajtshixø'øwa'añ. Mänit hajxy ñäbejnä.

⁶Ja'a Juan, camellopøjt hánajty wyithajpy. Wajhac hánajty wiøønhajpy. Mu'u hánajty chu'uchhajpy. Møjtsiinnøø hánajty yhu'ugyhajpy. ⁷Mänitä Juan ja'a cu'ug yajwiingapxøøyy: “Jímhøchä njamiøød tu'ug jiaac medsa'añ yajwiingapxøøbiä. Maas mäjaamøød je'e miedsa'añ quejeech høøch. Cábøch cuhdujt jaduhñ njaty mõødä nebiä cuhdujt je'e miøødän, ja'a jaac medsaambä.

⁸Coo mijts nyajnábejty, nøøhaam mijts nyajnábejty. Pero ja'a jaac minaambä, Dioshespírituhaam hajxy jadáhooc xyajnábejtägatsa'añ." Jaduhñä Juan miánaañ.

⁹Cujequiä Jesús jim miejch maa ja'a Juan hánajty miäyajnäbetiän, jim maa ja'a mõjnøø hánajty xiøhatiän Jordán. Jimä Jesús hánajty tøø chooñ maa ja'a cajpt xiøhatiän Nazaret, jim maa ja'a naax hánajty xiøhatiän Galilea. Mänitä Juan ja'a Jesús yajnábejty. ¹⁰Tuunä Jesús ñä'ä tø'ødspädsøomy, mänit yhijsy coo ja'a tsajt yhawaach. Mänitä Jesús ja'a Dioshespíritu yhijsy coo hánajty ñägäda'agyii nebiä paloman. ¹¹Mänitä Dios jim quiuhgapxnajxy tsajpootyp. "Høøch miich tu'uquiä nHuunghajpy. Miiçh njaançh tehñ chojpy. Miiçh njaançh tehñ quiumaaby." Jaduhñä Jesús ñämaayä.

¹²Mänitä Jesús miødhajtä pactuum ja'a Dioshespíritu.

¹³Mänitä Jesús jim piuhwaatsä. Nidiuhñ jim miähmøoyy.

Jagooyyä animalhajxy hánajty jim wiädity. Mänitä Jesús ñämejtsä ja'a mõjcu'ugong. Mänitä Jesús jia tågøoyyä jøjcapxøoyyäbä. Juxychägui'xxøø ja'a Jesús jim yhijsy jäguemduum. Mänitä Jesús ñämejtsä ja'a Diosmoonsähajxy ja'a jim tsajpootypä. Mänitä Jesús piuhbejtä.

¹⁴Ja'a Juan, cujegy je'le chuumä. Coo je'le jaduhñ chuumä, mänitä Jesús jim ñøcxtägajch Galilea. Mänitä Jesús ja'a cu'ug tiägøoyy yajwiingapxøøbiä ja'a Diosmädia'agy cooc hánajty yhabaatnä coo ja'a Dios ja'a

miøcmäjaa hánajty yajcähxø'øga'añ.

¹⁵"Habáatnäp jaduhñ coo ja'a Dios ja'a miøcmäjaa yajcähxø'øga'añ. Paadiä Dios ja'a miädia'agy hajxy mmäbøjçät. Weenä mjootä mwiiinmahñdy hajxy myajtägach. Weenä mhaxøøgwiinmahñdy hajxy mnajtshixø'øy." Jaduhñä Jesús miánaañ.

¹⁶Cujequiä Jesús tiägøoyy wädijpä maa ja'a mejy hánajty xiøhatiän Galilea. Jim hánajty wiädity mejypia'a, mänitä jäya'ay metsc yhijsy, ja'a Simón møødä piuhya'ay Andrés. Hacxmats ja'a Simónghajxy hánajty tiuunghajpy. Jiibiä yhacxjohmñd hajxy hánajty piäda'agy mejjiooty. ¹⁷Mänitä Simónghajxy ñämaayä:

—Jam hajxy wädjítäm. Je'le mijts hijty mduunghajpy, hacxmats. Wiingtuunghøøch mijts nmo'owaamby. Nyajnáhixø'owáambiøch mijts nebiä cu'ugä Diosmädia'agy hajxy myajwiingapxø'øwät —nømä Jesús miánaañ.

¹⁸Tuunä jaduhñ ñä'ä mänaañ, mänitä Simón ja'a yhacxjohmñd hajxy hoy ñajtswidø'øy mejypia'a. Mänitä Jesús hajxy piadu'ubøjcy. ¹⁹Weeñtiä ja'a Jesúsahajxy hánajty tøø miejypia'ayo'oy, mänitä Jesús ja'a Zebedeo yhijsy møødä yhuunghajxy, ja'a Santiago møødä Juan. Barcohuungooty ja'a Zebedeohajxy hánajty yháña'ay. Jiibiä yhacxjohmñd hajxy hánajty yhaxodsø'øy. ²⁰Mänitä Jesús ja'a Santiago miøjyaaxy møødä Juan. Mänitä Santiago ja'a Jesús hajxy piadu'ubøjpä. Nähgueec ja'a tieedy hajxy jiiby barcohuungooty møødä mioonsähajxy.

²¹Mänitä Jesúshajxy jim miejch maa ja'a cajpt hánajty xiøhatiän Capernaum. Coo ja'a poo'xxiøø yhabaaty, mänit hajxy jiiby tiägøøyy tsajtøgooty. Mänitä Jesús ja'a cu'ug tiägøøyy yajwiingapxøøbiä. ²²Mänitä cu'ughajxy yagjuøøyy coogä Jesús hánajty hoy yajnáhixø'øy nebiä møjcu'uhdujtmøødpän. Maas hóyyäc hánajty yajnáhixø'øy quejee ja'a hána'c-hajxy, ja'a Diosmädia'agy hajxy hánajty naxy yajnáhixøøbiä tsajtøgooty. ²³Jiibiä mähdiøjc hánajty tu'ug tsajtøgooty, tøø hánajty yajtägø'øyii ja'a møjcu'u. Mänitä møjcu'u tiägøøyy yaaxpä møc:

²⁴—Miičh Jesús, Nazaret miičh mdsooñ. Tii højts coo xmiädsibø'øy. Højts jaduhñ xjia wi'i yajcuhdägøyyaamb, túhmäts. Nnajuøøbiøch pøn miičh. Miičhä Dios xyHuunghajp —nømä mähdiøjcä møjcu'u yajmänaañä.

²⁵Mänitä Jesús ja'a møjcu'u yhojy: —Hamón, jua'ads jim maa yø'ø mähdiøjcän —nømä Jesús miänaañ.

²⁶Mänitä møjcu'u ja'a mähdiøjc je'e yajpojpaaty. Yáaxäbä mähdiøjc ñähwaatsä. Ja'a møjcu'u jaduhñ yajyaax. ²⁷Coo ja'a Jesús ja'a mähdiøjc jaduhñ yajnáhwaach, jiaančh tehñ yagjuøøyy ja'a cu'ughajxy jaduhñ nägøxiä. Mänit hajxy tiägøøyy niñämäyyäbä: —Maa yø'ø craa cuhdujt jaduhñ tøø ñä'ä mahñ piøcy coo yø'ø mähdiøjcä møjcu'u jaduhñ yajnáhwaatsä. Nej, hawiinjemyguiuhdujtäda'a miøødäjä —nømä Jesús ñänøømä.

²⁸Paquiä mädia'agy jim wia'xy Galileanaaxooty wiinduhmyhagajpt

coo ja'a Jesús ja'a miøcmäjaa hánajty tøø yajcähxø'øgy.

²⁹Coo ja'a Jesúshajxy jiiby chajtøjpädsøømy møødä jiamioødtøjc, mänit hajxy jim ñøcxy maa ja'a Simó nghajxy hánajty chána'ayän møødä Andrés. Quipxiä Santiaghajxy hánajty choonä møødä Juan. ³⁰Ja'a Simón ja'a miø'ødhoc, pa'amgo'naaby hánajty je'e. Tobia'am hánajty miøød. Coo ja'a Jesús jim miejch maa ja'a Simón tiøjcän, mänitä Jesús yhawáañäxä coo ja'a pa'amjäya'ay hánajty jiiby tøgooty. ³¹Coo ja'a Jesús tiøjtägøøyy, mänitä pa'amjäya'ay wyidsø'cy. Mänitiä ja'a tiøy tiøjch. Mänitä Jesús yajcaayyä yaghuucä ja'a Simón ja'a miø'ødhoc.

³²Mänittsuu, coo ja'a xøø hánajty tøø quiuhnaxy, mänitä Jesús pa'amjäya'ay may yajnämejtsä, jim maa ja'a Simón tiøjcän, møødä møjcu'umøødpähajxy. ³³Jimä cu'ughajxy hánajty may tiäna'ay tøgaaawjooty. ³⁴Mänitä Jesús jäya'ay may yajpa'amnajxy. Madiu'ujä pa'am hajxy hánajty miøødä. Møødä møjcu'umøødpähajxy, yajnáhwaatsä hajxy je'ebä. Mänitä Jesús ja'a møjcu'u yhanehmy coo hajxy quia'a cápxät, je'eguiøxpä coo ja'a Jesús hánajty ñajuø'øyii pøn je'e.

³⁵Cujaboom, je'enä hánajty wyiingoodsä, mänitä Jesús piädø'cy. Mänit tiøjpädsøømy. Mänit jim ñøcxy jäguemduum. Mänitä Tiedy hoy pia'ya'axy. ³⁶Coo jioøøyy, mänitä Simó nghajxy yhiixy coo Jesús hánajty tøø tiu'ubøcy. Mänit hajxy tiu'ubøjcy høxtaabiä. ³⁷Coo ja'a Jesús piaatä, mänit ñämaayyä:

—Jim miichä cu'ug xjia wi'i yajtøy maačhä ndøjcän.

³⁸Mänitä Jesús yhadsooy:

—Jam hajxy wiingtuum wädjftäm maa ja'a cajpt wiingonbän.

Jadúhnhöčhä cu'ugä Diosmädia'agy jim nyajwiingapxøobiät.

Jadúhnhöch nwiinguexiä coočhä Diosmädia'agy wiinduhmyhagajpt nmäwädítät.

³⁹Mänitä Jesús tiägøøyy wädijpä tsajtøjc-tsjtøjc wiinduhmyhagajpt jim Galileanaaxooty. Ja'a

Diosmädia'agy hänäjty yajwiingapxøøby, møødä pa'amjäya'ay hänäjty yajnáhwaatspä, ja'a hajxy møjcu'umøødpä.

⁴⁰Mänitä Jesús pa'amjäya'ay nänemejtsä tu'ug, ja'a

leprapa'ammøødpä. Mänitä Jesús wyiinijcädaacä, miänuu'xtaacä:

—Pø chojpy miichä mjoot jaduhñ, høøch hädaa nba'am yajnáhwaatsäc —nømä Jesús nänemejtsä.

⁴¹Mänitä mähdiojc nänemejtsä.

Mänit nänemejtsä. Mänit nänemejtsä:

—Tii coo quia'a cabä. Tøø jaduhñ mnähwa'ačh.

⁴²Tuunä ja'a Jesús jaduhñ nänemejtsä mänaañ, mänitiä mähdiojcä pia'am nänemejtsä. ⁴³⁻⁴⁴Mänit miägapx yhanemä:

—Huuc mäadow, cab jaduhñ pøn mhawáañät coo tøø mba'amnähwa'ačh. Tu'uda'aukiä jim mnøcxät maa ja'a teediän, ween jaduhñ xyhixy coo tøø mjaanč pa'amnähwa'ačh. Mänit mguyoxø'øwät nebiä Moisés jecy yhanemä, jaduhñä cu'ughajxy nänemejtsä coo tøøyajtät mba'am tøø jiaanč naxy —nømä Jesús miänemejtsä.

⁴⁵Pero cabä craa nänemejtsä mädia'agymiäbøjcy, ja'a pia'am hänäjty tøø yajnáhwa'ačhijjäbä. Coo tiu'ubøjcy, mänit tiägøøyy mädiaacpä nebiaty hänäjty

tøø jiaty. Wiinduhmyhagajptä mädia'agy jaduhñ wia'xy. Coo ja'a pa'amjäya'ayhajxy jaduhñ miädoyhajty coo ja'a Jesús hänäjty miäyajpa'amnaxy, mänitä Jesús hajxy tiägøøyy høxtaabiä coo ja'a pia'amhajxy yajnájxäxät. Paadiä Jesús hänäjty quia'a cajptägø'øwaannä coo ja'a pa'amjäya'ayhajxy hänäjty jia wi'i nänemejtsä. Paadiä Jesús miähmøøñä jäguemduum maa jäya'ay quia'a hitiän. Mänitä Jesús ja'a pa'amjäya'ay may nänemejtsä. Wiinduhmyhagajptjaty hajxy hänäjty choon.

2 Cujequiä Jesús jadähooc quiajptägøøyy Capernaum.

Mänitä mädia'agy wia'xy coo hänäjty jim tøø miéjtscumbä.

²Mänitä jäya'ayhajxy may miejch maa ja'a Jesús hänäjty miejtsa'aguiän. Paquiä ja'a tøjc jaduhñ yhujch. Høxtä tøguubiaady hajxy miejch. Mänitä Jesús ja'a cu'ugä Diosmädia'agy tiägøøyy yajwiingapxøøbiä. ³Mänitä pa'amjäya'ay tu'ug quioømiejtsä cø'ømucy tecymiucy. Nänemejtsä jäya'ayhajxy hänäjty quio'øy tsaajiooty. ⁴Cabä pa'amjäya'ay hänäjty hoy yajmedsa'añii maa ja'a Jesúsän, coo ja'a jäya'ayhajxy hänäjty jiaanč tehñ miäy. Mänitä mähdiojc miäbejtä cuhjodiønähgøxp. Mänitä tøjc hajxy weentiä yajcuhwaach, jim mädooyä maa ja'a Jesús

hänajty pia'täna'ayän, mäduhñtiä pa'amjäya'ay hoy nänaxy. Mänit jaduħn quiuhdøñajxä tsaajiooty. Jiiby hoy quiäda'agy maa ja'a Jesús wyiinduumän. ⁵Paadiä pa'amjäya'ay yajmejtsä maa ja'a Jesúsän, ñajuøby hajxy hänajty coo ja'a pia'am hänajty yajnaäänäxä. Coo ja'a Jesús jaduħn yhiyx coo ja'a miädia'agy hänajty miäbøgäänäxä coo hänajty miäyajtso'oga'añ, mänitä pa'amjäya'ay ñämaayyá:

—Mägu'ughajpä, tøø ja'a mboj tøø ja'a mgädieey xñähwa'aäch —nømä Jesús miänaañ.

⁶Jiibiä häna'c-hajxy hänajty näje'e piahäñ'ay, ja'a Diosmädia'agy hajxy naxy yajnähiøøbiä tsajtøgooty. Jiiby hajxy hänajty miämädoonaabiä. Mänit hajxy näje'e miänaañ quiopcooty: ⁷“Tii yøø craa jaduħn coo miäna'añ cooc tyijy yøø pa'amjäya'ay piojpä quiädieey tøø yajnähwäätsäxä. Cap pøn cuhdujt miøødä coo jäya'ayä piojpä quiädieey yajnähwäätsät; jagooyyä Dios tu'uquiiä miøødä.” ⁸Ñajuøoyy ja'a Jesús jaduħn waambaty hajxy hänajty miädia'agy quiopcooty. Mänit hajxy ñämaayyá:

—Tii hajxy jaduħn coo mwil'i miädia'agy mgopcooty. ⁹⁻¹¹Høøch, Diosquéxyhöch høøch, páadyhöch cuhdujt nmøødä coočhä jäya'ayä piojpä quiädieeyhajxy yaa nyajnähwäätsät hädaa yaabä naaxwiin. Hädaa mähdiøjc, nyajpa'amnaxáambiøch hädaa. Jadúhñhöch nyajcähxø'oga'añ coočh njaančh Diosquexiä. Jaduhñä tøyhajt hajxy mmøødhäjpät coočh

cuhdujt njaančh møødä coočhä jäya'ayä piojpä quiädieeyhajxy nyajnähwäätsät —nømä Jesús miänaañ.

Mänitä pa'amjäya'ay ñämaayyá:
—Tänaayyø'og. Widsø'og yøø mdsaa. Nøcxnä maa ja'a mdøjcän.

¹²Tuunä ja'a Jesús jaduħn ñä'ä mänaañ, mänitä pa'amjäya'ay jiaančh møcpøjcy. Mänit tiänaayyø'cy. Mänitä chaay wyidsø'cy. Mänit tiu'ubøjnä. Coo ja'a cu'ughajxy jaduħn yhiyx, mänit hajxy nägøxiä jiaančh tehñ yagjuøoyy. Mänit hajxy miänaañ:
—Ni mänaa højts jaduħn nga'a hñxäm.

Mänitä Dios hajxy wyiingudsähgøoyy.

¹³Mänitä Jesús ñøxtägajch maa ja'a mejjiän. Mänitä jäya'ay jim may ñäméjtsägumbä. Mänitä Diosmädia'agy hajxy yajwiingapxøoyyá. ¹⁴Jimä Jesús hänajty miejypia'ayo'oy, mänitä Leví yhiyx, ja'a Alfeo yhuung. Jim hänajty yhäña'ay meexäpa'a maa hajxy hänajty yajnähuudiu'udiän. Mänitä Leví ñämaayyá:

—Jam wädíjtäm —nømä Jesús miänaañ.

Mänitä Leví tiänaayyø'cy. Mänit piadu'ubøjcy.

¹⁵Mänitä Jesús hajxy wioowä mägaabiä maa ja'a Leví ja'a tiøjcän, møødä jiamøødtøjc. Nämäy yä jäya'ayhajxy jim piamejch, ja'a Jesús hajxy hänajty pawädijp. Jiibiä yajnähuudiuutpäðøjcä Jesús hajxy hänajty may miøødcaamiucy miøødhuucmucy, møødä cuboj cugädieediøjc. ¹⁶Jiibiä fariseoshajxy hänajty näje'e miähee'pna'ay,

møødä häna'c-hajxy, ja'a Diosmädia'agy hajxy hänäjty naxy yajnähiðøøbiä tsajtøgooty. Coö ja'a Jesús hajxy jaduhñ yhihxy coö ja'a yajnähuuduutpäðøjc-hajxy hänäjty miøødcaamiugyii møødä cuboj cugädieejäya'ayhajxy, mänitä Jesús ja'a jiamiøødhajxy ñämaayyä:

—Yø'ø mwiindsøn, tii yø'ø yajnähuuduutpäðøjc coö miøødcaamiucy, møød yø'ø cuboj cugädieejäya'ay —nømä fariseoshajxy miänaañ.

¹⁷Miädoow ja'a Jesús jaduhñ coö hajxy jaduhñ miänaañ. Mänit hajxy ñämaayyä:

—Pøn jaduhñ møc, cab hajxy yajtsooyø'øy. Pøn jaduhñ pa'ammøød, je'eds hajxy jaduhñ yajtsooyøøby. Páadyhöch yaa tøø ngäda'agy hädaa yaabä naaxwiin coöchä cuboj cugädieebiähajxy nnämä'awät coö ja'a yhaxøøgwiiinmahñdy hajxy ween ñajtshixø'øy. Pønäc tyijy pojpä cädieey ca'a møød, cábøch hajxy je'e waamb nnäma'awa'añ —nømä Jesús miänaañ.

¹⁸Cujecy, jimä Juan ja'a jiamiøødhajxy hänäjty jaguiay yhity, møødä fariseoshajxy näje'e. Mänitä jäya'ayä Jesús hajxy hoy näje'e miäyajtøy:

—Yø'ø Juan ja'a jiamiøødhajxy, jaguiay hajxy yø'ø yhity, møød yø'ø fariseoshajxy. Pero miichä mjamiøødhajxy, cab hajxy jaduhñ yhihpä. Tisän —nømä Jesús ñämaayyä.

¹⁹Mänitä Jesús yhadsooyy:

—Coo ja'a pøc ja'a hu'ug naxy jiadyii, cabä jäya'ayhajxy yhity jaguiay, ja'a hajxy woybä wichpä,

coö ja'a jamiø'ød hajxy hänäjty wyiingay wyiinhu'ugy. Cab hajxy hänäjty jiootmayhaty. ²⁰Pero habaadäännäp jaduhñ coöch yaa ndsoonaannä. Mänitøch mäsöjnäbä ja'a njamiøødhajxy yhida'añ jaguiay. Jootmayhadaamb hajxy hänäjtiän.

²¹Ni pønä tucwit quia'a hagø'yø'øy jemywyithaam. Ja'a jemywyit, mägäp je'e. Ja'a tucwit, cøødsäp je'ebä. Maas hanaxiä jiaac pagøødsät. ²²Jaanaä jaduhñduhmä, ni pønä jemyvyino quia'a cudemø'øy tucwajhacxujiooty. Jaac xünäp ja'a jemyvyino jaduhñ. Mägøødsø'øb ja'a tucwajhacxuy jaduhñ. Cøxäp ja'a jemyvyino yhöxyocy. Nä'ägä tögøyyäp jaduhñ nämetsc. Tägøyyäp ja'a tucwajhacxuy. Jaanaä tögøyyäbä jemyvyinäbä. Päädiädsä jemyvyino hajxy quidemø'øy jemywajhacxujiooty —nømä Jesús miänaañ.

²³Poo'xxiøøjooty hänäjty je'e, jimä Jesús hajxy hänäjty wiädity trigocamjooty, møødä jiamiøødtøjc. Mänitä jiamiøødhajxy yohguiujc tiägøøyy trigowiingädsujtspä. Je'e hajxy hänäjty jiøø'xaamby.

²⁴Jimä Fariseoshajxy hänäjty näje'e piawädihpä. Mänitä Jesús ñämaayyä:

—Tii yø'ø mjamiøødhajxy coö trigowiingädsuch poo'xxiøøjooty. Nej, cab hajxiäda'a ñajuø'øyä coö ja'a cuhdujt jaduhñ myiñä coö hajxy jaduhñ mga'a túnät poo'xxiøøjootiä —nømä fariseoshajxy miänaañ.

²⁵Mänitä Jesús miänaañ:

—Nej, cahnä Diosmädia'agy hajxy mgapxiä coö ja'a Davidhajxy jecy yäho'pøjc møødä jiamiøødtøjc.

²⁶Ja'a Abiatar hānajt̃y tuumb teedywiindsōñ. Mānitā David jiiby tiāgōōyy Diostōgooty. Mānitā tsajcaagy quiaaay, ja'a teedyhajxy hānajt̃y tōō quiuyoxō'ōyābā Dioswiinduum. Mānitā David ja'a jiamiōdtōjc piuhmooyy. Hoorā, cabā cuhdujt̃ hānajt̃y myiñ coo ja'a David ja'a tsajcaagy hajxy jaduhñ quiáyāt. Jagooyyā teedy cuhdujt̃ hajxy hānajt̃y miōōdā coo hajxy quiáyāt.

²⁷Mānitā Jesús miānāangumbā: —Paadiā Dios ja'a poo'xxiōō quiunuu'xy, weenā jāya'ayhajxy mānit̃ piōō'xy. Mijts jaduhñ ja mānaamb, paadiā Dios ja'a jāya'ay piāda'agy cooc tyijy ja'a poo'xxiōō hajxy wyiingudsāhgō'ōwāt. Cab jaduhñ nā'ā tōyyā. ²⁸Cooč jaduhñ nDiosquexiā, pāadyhōch cuhdujt̃ nmōōdā cooč nmāhané'emāt hōxtā poo'xxiōōjootypaady —nōmā fariseoshajxy nāmaayyā.

3 Mānitā Jesús jadāhooc tiōjt̃gōōyy tsajtōgooty. Jimā jāya'ay hānajt̃y tu'ug cō'ōma'ad.

²Jimā fariseos ja'a Jesús hajxy hānajt̃y miāhee'pna'ay pō jaančh māyajpa'amnaxaamb hānajt̃y je'e poo'xxiōōjooty. Wiinmahñdy hajxy hānajt̃y yhōxtaaby nebiā Jesús hajxy yajt̃sumōōjāt. ³Mānitā cō'ōma'adpā nāmaayyā:

—Tānaayyō'og. Mīñ yam̃ cujc tāna'aw —nōmā Jesús miānaañ.

Mānitā mähdiōjc jaduhñ quiudiuuñ. ⁴Mānitā fariseoshajxy nāmaayyā:

—Nebiā cuhdujt̃ myiñ coo hajxy ndúunāmāt poo'xxiōōjooty, hoy tōgā haxōōgā. Nej, jaduhñā cuhdujt̃ myiñ coo jāya'ay hajxy

nyajtsōocāmāt poo'xxiōōjootiā, tōgā jaduhñ myiñ coo jāya'ay hajxy nyaghō'cāmādā —nōmā Jesús miānāangumbā.

Pero cabā fariseoshajxy waamb nā'āgā hadsooyy. ⁵Mānit̃ hajxy wyiinhee'ppejtā, māduhñtiā Jesús hajxy hānajt̃y jiuhdānaawiādity. Jootmayhajpā Jesús hānajt̃y coo ja'a fariseos ja'a cō'ōma'adpā hajxy hānajt̃y quia'a nāxuuch. Cabā Jesús hānajt̃y jiootcujcā. Mānitā mähdiōjc nāmaayyā:

—Xajtōw yō'ō mgō'ō.

Mānitā quiō'ō jiaančh xajtōōyy. Tuunā jaduhñ nā'ā xajtōōyy, mānitiā quiō'ō yhooyōōyy. ⁶Mānitā fariseoshajxy wyiimbijty. Mānit̃ hajxy nōcxy maa ja'a Herodes jiamiōdhajxiän. Ja'a Herodes, gobiernā hānajt̃y tiuumby. Mānitā fariseoshajxy nāgōxiā quiojyquiapxyhajty nebiā Jesús hajxy yajyagho'ogōōjāt.

⁷Coo ja'a Jesús hajxy jiiby chohñ tsajtōgooty mōōdā jiamiōdtōjc, mānit̃ hajxy jim̃ nōcxtāgajch maa ja'a mejypia'ajän. Jimā jāya'ayhajxy hānajt̃y may piawādity. Galilea hajxy hānajt̃y chooñ. ⁸Tōō ja'a mādia'agy hānajt̃y wia'xy wiinduhmyhagajpt̃ coo ja'a Jesús madiu'u hoy-yagjuōōñājatypā hānajt̃y yajcāhxō'ogy. Coo ja'a jāya'ay ja'a mādia'agy hajxy jaduhñ miādooyy wiinduhmyhagajpt̃, mānitā Jesús jāya'ay may nāmejtsā. Wiinduhmyhagajpt̃ hajxy hānajt̃y chooñ, mōōd jim̃ Judeanaaxooty, mōōd jim̃ Jerusalén, mōōd jim̃ Idumea, mōōd jim̃ Jordánmōjnōōhawiimb, mōōd jim̃ Tiro, mōōd jim̃ Sidón. ⁹⁻¹⁰Coo ja'a

pa'amjäya'ayhajxy hänäjty may tøø yajmøcpøgyii, paadiä Jesús hänäjty jia wi'i nähdonä'añii ja'a jäya'ayhajxy jaac pa'ammøødpä, ween hajxy jaduhñ nähwaatspä. Høxtä niyhanø'tsmújcäp hajxy hänäjty. Mänitä Jesús ja'a jiamiøødtøjc nämaayy coo barcohuung hajxy jim nähix hahixø'ø miähäná'awät, jaduhñä Jesús jiiby paquiä piédät coo hänäjty pianø'ødsa'añii ja'a cu'ug.

¹¹ Jimä jäya'ayhajxy hänäjty wiädijpä ja'a mõjcu'umøødpä. Homiaajä Jesús hajxy hänäjty yhixy, mänitä Jesús hajxy hänäjty wyiinijcäda'agy, mänitä Jesús hajxy hänäjty näma'ay:

—Dios miich xyHuunghajp — jaduhñä mõjcu'umøødpähajxy hänäjty wyi'i ya'axy.

¹² Mänit hajxy yhanehmä coo ja'a Jesús hajxy quia'a nägäpxät majiäya'ayhagujc. Ja'a Jesús jaduhñ hanehm.

¹³ Mänitä Jesús jim nõcxy tunguhduum. Mänitä Jesús ja'a jiamiøød miøjyaaxy, pøn hänäjty hoy quipxy miøødwäditaamy. Coo hajxy jim quioo'ty maa Jesús hänäjtiän, ¹⁴ mänit hajxy nämajmetsc wyiinguejxä coo ja'a Jesús hajxy quipxy miøødwädítät, møød coo ja'a Diosmädia'agy hajxy nõcxy yajwa'xy. ¹⁵ Mänitä cuhdujt hajxy miooyy coo jäya'ay hajxy yajnähwá'adsät, ja'a hajxy mõjcu'umøødpä. ¹⁶ Jaduhñä Jesús ja'a jiamiøødhajxy hänäjty xiøhaty, ja'a hajxy nämajmetspä. Tu'ug hänäjty xiøhaty Simón. Je'e ja'a Jesús yajxøbejt Pedro. ¹⁷ Jimä Zebedeo yhuunghajxy hänäjtypä,

ja'a Santiago møødä Juan. Jue'e hajxy yajxødägøøyyä Boanerges. Jaduhñ hänäjty miädia'agytiägø'øy coo hajxy hänäjty paquiä jiaanč tehñ yhawa'anda'agy nebiä häneejän. ¹⁸ Ja'a hajxy hänäjty jaac jimä, jaduhñ hajxy hänäjty xiøhaty Andrés, møødä Felipe, møødä Bartolomé, møødä Mateo, møødä Tomás, møød Santiago, ja'a Alfeo yhuung, møødä Tadeo, møødä Simón, ja'a hänäjty xøhajpä ja'a celote. ¹⁹ Ja'a miämajmetspä hänäjty xøhajp Judas Iscariote. Je'e ja'a Jesús cujegy too'c; ja'a Jesús miädsiphajxy cø'ødägøøyyä. ²⁰ Mänitä Jesúshajxy nõcxy maa tiøjcän møødä jiamiøødhajxy.

Mänitä jäya'ayhajxy may miéjtscumbä maa ja'a Jesúshajxy hänäjtiän. Paadiä Jesúshajxy hänäjty quia'a näbaadøøyyäxä mänaa hajxy jaduhñ quiáyät møødä jiamiøød, coo ja'a pa'amjäya'ayhajxy hänäjty wyi'i yhadsipy coo ja'a pia'amhajxy yajnájxäxät. ²¹ Coo ja'a Jesús ja'a jiuju miägu'ughajxy jaduhñ miädoyhajty coo ja'a Jesús hänäjty jiaanč tehñ yhadsibyyi, mänitä Jesús hajxy nämejch. Mänitä Jesús hajxy jia yajnøcxaan hadsip. Jaduhñ hajxy hänäjty miäna'añ cooc tyijy ja'a Jesús hänäjty tøø quihhiñ.

²² Mänitä häna'c-hajxy näje'e quiädaacy, ja'a Diosmädia'agy hajxy hänäjty naxy yajnähixøøbiä tsajtøgooty. Jerusalén hajxy hänäjty tøø chohnda'agy. Mänit hajxy miänaañ:

—Yø'ø Jesús, puhbéjtäp yø'ø ja'a mõjcu'ugong, paadiä mäjaa miøødä

coo jäya'ay jajnähwä'ačh, ja'a hajxy mójcu'umøødpä. Haa ca'a, ja'a mójcu'ugong ja'a mójcu'u hajxy wyiindsønħajpiä —nømä Jesús wyiingapxpejtä.

²³⁻²⁶Mänitä

jajnähixøøbiädøjc-hajxy miøjyaaxä. Mänitä Jesús tiägøøyy jajnähixøøbiä cuento jajmäbaadyhaam.

—Coo jäya'ayhajxy ñimiädsibø'øwøøjät quipxyjiaty tu'cajpt, cab hajxy hoy ñimiøødtunäanänä. Jaanä jaduhnduhmbä, coo jäya'ayhajxy ñimiädsibø'øwøøjät quipxyjiaty tu'que'ex, cab hajxy hoy tøgooty ñimiøødhidäanänä. Jaanä jaduhnduhmbä, coo ja'a mójcu'uhajxy ñimiädsibø'øwøøjät quipxyjiaty mójcu'u, cab hajxy jaduhñ hoy wiäditaannä. Cõxäp hajxy jaduhñ quiuhdägoyy. Jaduhñä tøyhajt hajxy mmøødhädät coočhä mójcu'ugong xquia'a puhbety.

²⁷Jaanä jaduhnduhmbä, ni pønä mójcjäya'ay hoy mga'a mäméedsät tijaty jiiby miøød tiøgooty. Mänit mabøcypä coo jawyiin mgø'øxots mdexyíódsät, mänítäts hoy mmäméedsät.

²⁸Tøyhajt jaduhñ coo ja'a Dios jäya'ay miämee'xa'añ nebiatiä pojpä cädieey hajxy miøødä, waambatiä Dios hajxy tøø miägapxtägoy.

²⁹Pero pønä Dioshespíritu tøø miägapxtägoy, je'e mabøcypä, cab hajxy mänaa miämee'xáanänä. Homiänaaxøø ja'a piojpä quiädieey hajxy miäwädita'añ —nømä Jesús miänaañ.

³⁰Paadiä Jesús jaduhñ miänaañ, coo hänäjty tøø ñänømyii cooc tyijy ja'a mójcu'ugong hänäjty miøødwädity.

³¹⁻³²Jimä Jesús hänäjty miädia'agyñä, mänitä tiajhajxy miejch møødä piuhya'ayhajxy. Coo jäya'ayhajxy hänäjty jiaančh tehñ miayyä tøgooty, paadiä tiajhajxy tøguum miähmøøyy. Mänitä capxy hajxy quiejxy tøgooty coo ja'a Jesús ween yhuuc pädsomy. Jiibiä Jesús jäya'ay hänäjty may juuhhänaawiädityii tøgooty. Mänit hajxy miänaañ:

—Ximä mdaj xwyi'i yajtøy møødä mbuhya'ayhajxy møødä mbuhdo'oxyhajxy.

³³Mänitä Jesús yhadsooyy: —Pønħøch ndajhajpy; pønħøch nbuhya'ayhajpy.

³⁴⁻³⁵Mänitä Jesús jäya'ay wyiinhee'ppejty mäduhñtiä hänäjty juuhhänaawiädityii. Mänit miänaañ: —Pønjätyhøch nDeedy miädia'agy cudiúunäp, je'ečh ndajhajpy, je'ečh nbuhya'ayhajpy —nømä Jesús miänaañ.

4 Mänitä Jesús jadähooc yhadäaccumbä mejypia'a Diosmädia'agy-yajwiingapxøøbiä. Mänitä jäya'ayhajxy may miejch maa je'e hänäjtian. Coo hawa'adspä hänäjty jim quia'a hity pu'uwiing, paadiä Jesús barcohuungooty tiägøøyy mejywyiing. Mänit jiiby yhänaaguiädaacy. Jimä jäya'ayhajxy miähmøøyy pu'uwiing hamädoowhijpä waambatiä Jesús hänäjty miädia'agy. ²Mänitä Jesús tiägøøyy jajnähixøøbiä cuento-yajmäbaadyhaam.

³—Huuc mäadow hajxy, mänitä jäya'ay tu'ug tiu'ubøjcy trigowøjpä.

⁴Näje'e trigotøømd quiahy tu'haam. Mänitä muuxyhajxy hoy pyiwø'øgy. ⁵Wiingtuumä trigotøømd hoy quiáhgumbä tsaajoot maa naax hänajty quia'a møødän. Paquiä trigotøømd miujxy coo naax hänajty quia'a cøøcä.

⁶Pero nägooyyä xøø piädsøømy, cøjxä trigohuung tiø'øch coo tyicts hänajty cøøc tøø quia'a häda'agy.

⁷Wiingtuum hoy quiáhgumbä maa hapyt hänajty jiaanč tehṃ miayyän. Coo hapyt jaduḥṇ yee'cy, cøjx jaduḥṇ nãhdäna'ayii. Ni tiøøm ja'a trigo quia'a pejty. ⁸Wiingtuum hoy quiáhgumbä maa ja'a naax hänajty jiaanč tehṃ tiøø'quiän. Jaanč tehṃ yhoyøøyy ja'a trigo jim. Näje'e hii'xmajcpajc miøødä tu'wipä; näje'e tägøøghii'xpajc miøødä; näje'e mägo'xpajc miøødä tu'wipä.

⁹Mänitä Jesús jiaac mänaaṇ: —Pøṇ hädaaduhṇ wiinjuøøby, wéenhøch nmädia'agy xmiäbøjca.

¹⁰Coo majiäya'ayhajxy wyiimbijty, jimä Jesús ja'a jiamiøød miøødmähmøøyy, ja'a hajxy hänajty nämajmetspä, møødä wiingjäya'ay ja'a näwéeṇtiäbä. Mänitä Jesús nãmaayyä coo quiapxtøwät waambaty hänajty tøø miädia'agy. ¹¹Mänitä Jesús yhadsooyy:

—Jaduḥṇä Dios jioot chocy coo mijts mwiinjuø'øwät nebiä miäjaa yajcähxø'øga'añ. Hijty, cap pøṇ hijty wyiinjuø'øy. Yø'ø wiinghäna'c-hajxy, ni yø'øhajxy quia'a wiinjuø'øy. Páadyhøch yø'ø häna'c-hajxy nyajnähixø'øy

cuento-yajmäbaadyhaam.

¹²Hoy hajxy jia mädooy, cab hajxy wyiinjuø'øy; jaduḥṇä Dios hajxy quia'a jøjpøgø'øwät; jaduḥṇä piojpä quiädieey hajxy quia'a yajnähwäatsäxät.

¹³Mänitä Jesús jiaac mänaaṇ: —Mijts, pø cab hajxy jaduḥṇ hoy mwiinjuø'øwa'añ waambátyhøch naamnä tøø ngapxy cuento-yajmäbaadyhaamä, ni jaduḥṇ hajxy hoy mga'a wiinjuø'øwa'añ waambátyhøch njaac yajmøødmädia'aga'añ cuento-yajmäbaadyhaam.

¹⁴Ja'a jäya'ay trigowøjpä, jaduḥṇ mäwlinäts miäbaady nebiä Diosmädia'agy-yajwa'xpän. ¹⁵Ja'a trigotøømd cáhwäbä tu'haam, jaduḥṇ mäwiin miäbaady nebiä jäya'ay ja'a Diosmädia'agy hajxy näje'e jia mädooyyän. Pero nägooyyä ja'a møjcu'u nãmech, mänitiä hajxy yagjahdiägøoyyäxä waambaty hajxy tøø yajwiingapxø'øyii. ¹⁶Ja'a tøømd cáhwäbä tsaajoot, jaduḥṇ mäwiin miäbaady nebiä jäya'ay ja'a Diosmädia'agy hajxy näje'e paquiä miäbøquiän, Jaanč tehṃ xioondaacp hajxy jaduḥṇ. ¹⁷Pero cab hajxy jejcy miäböcy. Nägooyyä hajxy jaduḥṇ chaächtiiñ ja'a Diosmädia'agyquiøxpä, mänit hajxy ñajtshixøøñä. ¹⁸Ja'a tøømd cáhwäbä maa hapyt jiaanč tehṃ miayyän, jaduḥṇ mäwiin miäbaady nebiä jäya'ay ja'a Diosmädia'agy hajxy näje'e jia mäbøquiän.

¹⁹Pero jiaanč tehṃ jiahmiejchp hajxy jaduḥṇ ja'a hädaa yaabä naaxwiimbä. Je'e hajxy jaduḥṇ wyi'i nädajpy wyi'i nãmaaby neby hajxy hoy chäná'awät, neby

hajxy hoy yhäyówät, mөөd maa mäyөөhadyiibän. Yajtägoobiä Diosmädia'agy hajxy jaduhñ. ²⁰Ja'a tөөmd cáhwäbä maa naax jiaanč tehñ tioo'quiän, jaduhñ mäwiin miäbaady nebiä jäya'ay ja'a Diosmädia'agy hajxy näje'e hamuumdu'joot miäbөquiän. Hoy hajxy jiaanč tehñ quiudiunñ. Jaduhñ hajxy miäbaady nebiä trigo hii'xmajcpajc miөөdän tu'wipä, mөөd nebiä tägөөghii'xpajc miөөdän, mөөd nebiä mägo'xpajc miөөdän tu'wipä.

²¹Mänitä Jesús jiaac mänaañ: —Coo jäya'ay jөөn hajxy quiudөө'xө'өy, cөxp hajxy yujcoñ. Cab hajxy jiiby quiuhjupy cubetapa'c. Ni jiiby hajxy quia'a päda'agy maabejtpa'c. ²²Jaana jaduhñduhmä, tijaty jaduhñ hijp yu'učh, tsipcөxp jaduhñ quiөxy cáhxө'oga'añ. ²³Pөñ jaduhñ wiinjuөby, wéenhөch nmädia'agy xmiäbөjcä.

²⁴Mänitä Jesús jiaac mänaañ: —Huuc wiinjuө'өw hajxy nébiөch cham nyajmөөdmädia'aga'añ; pөñ hädaa mädia'agy hoy wiinjuөby, maas hoy jaduhñ jiaac yajwiinjuө'owa'añii. ²⁵Pөñhөch nmädia'agy tөө xmiäbөjcä, je'ečh njaac yajnähixө'owaamby. Pero pөñhөch nmädia'agy tөө xquia'a mäbөjcä, cábөch je'e tii nyajnähixө'owaanä. Hөxtä jiahdiägoyyaamby je'e mädyii tyijy tөө jia wiinjuө'өy.

²⁶Mänitä Jesús jiaac mänaañ: —Coo ja'a Dios ja'a miөcmäjaa yajcähxө'oga'añ, jaduhñ mäwiin miäbaady nebiä jäya'ay ñi'ibiän. ²⁷Coo ñiippädө'өy, mänit nөcxy

miaanä coo tөө quioodsө'өy. Cujaboom, coo jioбө'өy, mänit piädө'cumbä. Pero cab jaduhñ ñajuө'өy nebiä tөөmd miuxy. Hix, hamdsoo ja'a tөөmd miuxy yeegy. ²⁸Ja'a tөөmd, jiibiä miäjaa piaady naaxooty. Coo miuxy, mänit yeegy. Coo yeegy, mänit piөjy. Coo piөjy, mänit tiөөmbety. Coo tiөөmbety, mänit miäjay. ²⁹Coo miäjay, mänit hajxy chucy. Tөө jaduhñ yhabaatnä coo hajxy yajpädө'ögät.

³⁰Mänitä Jesús jiaac mänaañ: —Nebiaduhñ njaac yajmäbäatämät coo ja'a Dios ja'a miөcmäjaa jaduhñ yajcähxө'oga'añ. ³¹⁻³²Coo ja'a Dios ja'a miөcmäjaa yajcähxө'oga'añ, jaduhñ mäwiin miäbaady nebiä mostazapajcän. Jaanč tehñ chay ja'abi' mostazapajc jaduhñ. Ni mädyii hujts pajc jaduhñ quia'a tsayyä nebiä habi' mostazapajc chayyän. Pero coo mn'i'ibät, jaanč tehñ piaquiä jaduhñ yeegy cөxp. Mäjatyjaty yhaa'x yeegy. Hөxtä hoyyä muuxyhajxy jim pie'eñ yhaa'xjooty.

³³⁻³⁴Haagä hädaaduhmä cuento-yajmäbaadyhaamä Jesús ja'a cu'ug hänajty yajwiingapxө'өy, mäduhñtiä hajxy hänajty hoy wyiinjuө'owa'añ. Pero coo ja'a cu'ug hänajty tөө wyiimbijnä, mänitä Jesús ja'a jiamiөөd hawiing ca'xy quiapxtөөnä, ja'a hajxy hänajty nämajmetspä.

³⁵Coo chuujөөyy, mänitä Jesús ja'a jiamiөөd ñamaaayy: —Tsөc hajxy jáamäm barcojooty; jam hajxy jimhaamby meyhawiimb.

³⁶Jiibiä Jesús hajxy hänajty yhäña'ay barcojooty mөөdä jiamiөdhajxy. Mänit hajxy

tiu'ubøjcy. Jiibiä jäya'ayhajxy näje'e piadu'ubøjpä wiingbarcojooty. Pero ja'a majiäya'ay, jim hajxy miähmøøyy mejypia'a. ³⁷Mänit møc tiägøøyy pojpä. Mänitä mejy tiägøøyy ja'tspä. Mänitä barco nähja'tspejtä. Mänitä nøø com tiägøøyy barcojooty. Høxtä hujts ja'a barco jaduħn. Quinaambä barco hänajty. ³⁸Pero ja'a Jesús, maab hänajty je'e jiiby barcohjxhaam. Cuhñø'øxø'y hänajty jiiby mia'ay. Jaanč tehñ chähgøøbiä Jesús ja'a jiamiøødhajxy hänajty. Mänitä Jesús hajxy hoy yuxy. Mänitä Jesús ñämaayyä:

—Wiindsón, nej, caj mdajy mmayyä coo hajxy nguhdägoyyáanämä.

³⁹Coo ja'a Jesús mia'abiädø'cy, mänitä poj yhojy møødä mejy coo yuungø'øwät. Mänitä poj jiaanč moonñ; møødä mejy, yuungøøyy je'ebä. ⁴⁰Mänitä Jesús ja'a jiamiøød ñämaayy:

—Tii hajxy hijty coo mwil'i chähgø'øy. Nej, cab hajxy mmäbøquiä coöch møcmäjaa nmøødä.

⁴¹Jaanč tehñ chähgøøby hajxy hänajty. Mänit hajxy hamee'ch ñiñämaayyä:

—Pønäda'a yø'ø; høxtä poj møødä mejy, cudiúunäxäbä miädia'agy yø'ø.

5 Mänitä Jesús hajxy jim miejch mejyhawiimb, maa ja'a naax hänajty xiøhatiän Gerasa. ²Coo hajxy miänajcy barcojooty, jimä jäya'ay hänajty tu'ug tiäna'ay jäguemjuøøby. Møjcu'u hänajty tøø jajtägø'øyii. ³Jutjooty hänajty

chäna'ay maa ja'a ho'ogyjiäya'ay hajxy hänajty ñaaxtägø'øyän. Jaanč tehñ miøcä craa hänajty. Ni cadenahaamä jäya'ayhajxy hänajty hoy quia'a cø'øxots quia'a tecyxiodsa'añ. ⁴Mayhooc hajxy hänajty tøø jia cø'øxoch tøø jia tecyxioch cadenahaam. Pero wyil'i yaghapodøøbiä cadena hänajty. Ni pøn hänajty quia'a mäjäda'aga'añ. ⁵Xøømdsuhñ hänajty jim ya'axy jiocy cabäsantäjooty møød tunjooty. Naxy hänajty tsahaam hamdsoo ñiçhugyii. ⁶Coo ja'a Jesús jaduħn yhiixä jäguem, mänit päyø'øguiä ñänøcxä. Mänit hoy wyiinjjcäda'agyii. ⁷⁻⁸Mänitä Jesús ja'a møjcu'u ñämaayy:

—Jua'ads miich jiiby maa yø'ø craajän.

Mänitä møjcu'u møc yaaxy: —Miič Jesús, miichä Dios xyHuunghajp, ja'a jim tsajpootypä. Nej mñiijiäwø'øyii møød høøchcøxpä. Tunä mayhajt, ca'ač xchaačhtiuñ. Dios, cøxp je'e.

⁹Mänitä Jesús ja'a møjcu'u miäyajtøøyy:

—Tii mxøhaty.

Mänitä møjcu'u yhadsooyy: —Legiõnghøch nxøhaty.

Páadyhøch jaduħn nxøhaty coo højts jaduħn njaanč tehñ ñämayyä.

¹⁰Mänitä Jesús miänuu'xtaacä coo ja'a møjcu'uhajxy quia'a høxquexøøjät jäguem.

¹¹⁻¹³Jim wiingón maa ja'a Jesús hajxy hänajtiän, jim mejypia'a, jimä hädsømhajxy hänajty may yuumydiajy tunmøjc. Námejtsmil hajxy hänajty wiädity. Mänitä Jesús jadähooc miänuu'xtaacä coo ja'a

møjcu'uhajxy ween jim̄ quiexyii maa ja'a mayhädsøm̄än, weenä hädsøm̄hajxy nõcxy yajtägø'oyii. Mänitä mõjcu'uhajxy jiaančh quejxä maa ja'a hädsøm̄än. Mänitä craa nähwaach, ja'a hänajty tøø miøjcu'uyajtägø'oyijäbä. Mänitä hädsøm̄hajxy cøjx yajtägø'oyii. Mänit hajxy päyø'øguiä yhädaacy mejjiooty. Cøjx hajxy jiiby ñøøji'xø'øy.

¹⁴Ja'a häna'c-hajxy hänajty jim̄ hädsøm̄güeendähjpä, cøjx hajxy piäyø'øgy. Hoyyä mädia'agy hajxy jim̄ yajwa'xy cajptooty møød cajtpa'a neby hänajty tøø jiadyii tøø tiuñii. Coø ja'a cu'ughajxy jaduhñ miädooyy, mänit hajxy hoy yhixy. ¹⁵Coø hajxy jim̄ miehch maa ja'a Jesús hänajtiän, mänitä craa hajxy yhijxy, ja'a hijty pa'ammøødpä, coø hänajty tøø nähwáatsänä ja'a mõjcu'u. Jim̄ je'e hänajty witmøød yhäñaañä. Coø hijty pia'ammøødä, nähwa'ads høxwa'ads hijty wiädity. Tøø hänajty wyiinmahñmejtsnä. Jaančh tehñ yagjuøøyy ja'a cu'ughajxy jaduhñ coø ja'a craa hajxy yhijxy coø ja'a pia'am hänajty tøø nähwáatsänä. Høxtä tsähgøøyy hajxy jaduhñ. ¹⁶Mänit hajxy cøjx yajmøødmädia'agyii neby hänajty tøø jiadyii tøø tiuñii. Ja'a jäya'ayhajxy jaduhñ híjxäbä coø ja'a hädsøm̄ ja'a mõjcu'u hajxy yajtägøøyyä, je'edshajxy jaduhñ mädiaac. ¹⁷Mänitä cu'ug ja'a Jesús hajxy miänuu'xtaacy coø jim̄ chóonät maa ja'a quiajpthajxiän.

¹⁸Coø ja'a Jesús hänajty wyiimbidaannä barcojooty, mänit jaduhñ nämaayyä coø ween

piadu'ubøgyii. Ja'a craa jaduhñ mänaañ, ja'a pia'am hänajty tøø yajnájxäxäbä. ¹⁹Mänitä Jesús ja'a craa nämaayy:

—Caj, ca'ačh xpianøcxy. Nøcx jim̄ maa ja'a mdøjcän, maa ja'a mjujy maa ja'a mmägu'ugän. Nøcxä mädia'agy yajwa'x coø miichä Dios tøø xñäxuuch, coø miichä Dios ja'a mõjcu'u tøø xyajnähwa'ačh.

²⁰Mänitä craa jiaančh nõcxy maa ja'a tiøjcän. Mänitä mädia'agy jim̄ tiägøøyy yajwa'xpä maa naax hänajty xiøhatiän Decápolis. Jaduhñ je'e miädia'agytiägø'øy majc-cajpt. Jaduhñä miädia'agy hänajty yajwa'xy coø ja'a Jesús ja'a mähdiøjc mõjcu'umøødpä hänajty tøø yajnähwa'ačh. Coø ja'a cu'ughajxy jaduhñ miädooyy, mänit hajxy jiaančh tehñ yagjuøøyy.

²¹Mänitä Jesús hajxy wyiimbijnä barcojooty møødä jiamioødhajxy. Coø hajxy jim̄ miéjtscombä meyhawiimb maa hajxy hänajty tøø chohñda'aguian, mänit hajxy jim̄ biarcomänajcy mejypia'a. Mänitä Jesús jäya'ay may nämejtsä.

²²Mänitä Jesús jäya'ay tu'ug wyiinjiçädaacä. Jairo hänajty xiøhaty. Je'e hänajty jim̄ tuumb wiindsón maa ja'a tsajtøjcän.

²³Mänitä Jesús miänuu'xtaacä:

—Wiindsón, mõjtá'agyhøch nhuung. To'oxiäna'c je'e. Majmetscjumøjt miøødä. Jámhøch nhuung cø'ønähgájpäc, ween jaduhñ miøcpøcy —nømä Jairo miänaañ.

²⁴Mänitä Jairo ja'a Jesús miødhajty. Jim̄ä jäya'ay ja'a Jesús hajxy hänajty may pianø'øch piabooñ. ²⁵Jim̄ä tajjäya'ay hänajty

tu'ug pa'ammøød majiäya'ayhagujc. Majmetscjumøjtä ñø'ty hänäjty tøø xiee'xy jabom-jabom. ²⁶Tøø ja'a mähdiojç hänäjty jejcy jia yajtsooyø'øy maa ja'a doctorhajxiän. Pero cábädsä pia'am hänäjty ñä'ägä yajnájxäxä. Tøø ja'a xiädø'øn hänäjty quiøjxnä tii jaduhñ ñä'ä jaac yajniämäjuyø'øwøøjöp. Coø hänäjty jaduhñ ñä'ägä yajtsooyø'øy tehñgajnä, maas hanaxiä pia'am hänäjty jaduhñ jiaac tehñ miøjta'agy. ²⁷⁻²⁸Coø ja'a mähdiojç jaduhñ miädoyhajty coo ja'a Jesús hänäjty wiädity mäba'amyajnajxpä, mänit jaduhñ wyiinmaayy quiopcooty: "Cooçh yø'ø wyit häyaa nnä'ä nähdoónät, náxäbøch nba'amäda'a häyaajä." Mänitá Jesús jioyuhdiägøøyyä. Mänitá wyit jiaanç nähdoónäxä. ²⁹Mänitiä tajjäya'ay ñø'ty jiaanç hadujcy. Mänit ñijiäwøøyyä coo ja'a pia'am hänäjty tøø ñaxy. ³⁰Mänitá Jesús ñijiäwøøyyä coo tu'jäya'ay hänäjty tøø miøcpøcy ja'a miäjaahaam. Mänitá Jesús ja'a jäya'ay çøjx wyiinhee'ppety. Mänit miänaañ:

—Pøñhøch nwit tøø xñähdoonä.

³¹Mänitá jiamioødhajxy yhadsooyy:

—Tii jaduhñ coo myajtøy pø tøø miich jäya'ay mwit xñähdoonä. Haa ca'a, majiäya'ay hajxy jaduhñ xwyi'i pianø'tsämä —nømä Jesús ñämaayyä.

³²Pero jimä Jesús hänäjty yhøxta'ayñä pønä wyit hänäjty tøø nähdoonäxä. ³³Ja'a tajjäya'ayä, jaanç tehñ chähgøøby hänäjty je'e. Paady hänäjty chähgø'øy coo hänäjty ñajuø'øy neby hänäjty tøø miøcpøcy. Mänitá Jesús hoy

wyiinjicäda'agyii tsäyúuyyöp. Mänitá tajjäya'ay ñägapy neby hänäjty tøø miøcpøcy. ³⁴Mänitá Jesús miänaañ:

—Huung, paady miich mba'am tøø ñaxy coo tøø mmäbøcy cooçh mäjaa nmøødä cooçhä jäya'ay tøy njaanç yajpa'amnaxy. Nøcxnä jootcujc.

³⁵Jimä Jesús hänäjty miädia'agyñä, mänitá jäya'ayhajxy näje'e miejch. Jim hajxy hänäjty tøø choñda'agy maa ja'a Jairo tiøjcän. Mänitá Jairo ñämaayyä: —Tøø ja'a mhuung yho'nä. Ca'a Jesús mhadsijpnä. Tii jaduhñ jim ñä'ä jaac tünöp. Tøø ja'a mhuung yho'nä.

³⁶Coø ja'a Jesús jaduhñ yhamädoonajxy, mänitá Jairo ñämaayyä:

—Ca'a mga'a mäbøcy. Ca'a mjootmayhaty —nømä Jesús miänaañ.

³⁷Mänitá Jesús miänaañ coo pøn jim quia'a panøcxät maa ja'a Jairo tiøjcän. Jagóoyyägä Pedrohajxy jim ñøcxät møødä Santiago møødä Juan, ja'a Santiago piuhya'ay.

³⁸Coø hajxy jim miejch maa ja'a Jairo tiøjcän, jaanç tehñ jioøby jaanç tehñ yaaxpä jäya'ayhajxy hänäjty jim. ³⁹Mänitá Jesús hajxy tiøjtägøøyy. Mänitá Jesús miänaañ: —Cajxä yø'ø to'oxiäna'c ñä'ä hó'oguiäbä. Tii hajxy coo mwil'i jio'øy coo mwil'i ya'axy. Nä'ä maab yø'øduhñ.

⁴⁰Coø ja'a Jesús jaduhñ miänaañ, mänit ñäxiicä. Mänitá Jesús ja'a jäya'ay çøjx yhøxquejxpädsømy tøghaguuy. Mänitá Jesús ja'a to'oxiäna'c hajxy ñänøcxy maa

to'oxiäna'c hänäjty quio'na'ayän, mөөдä Jesús ja'a jiamioөdhajxy, mөөдä to'oxiäna'cä tiaj tieedyhajxy.

⁴¹Mänitä Jesús ja'a to'oxiäna'c wyidsø'cy. Mänit nāmaayy:

—Quixyhuung, pädø'øg.

⁴²Tuunä ja'a Jesús jaduһn nā'ä mänaaň, mänitiä to'oxiäna'c jiaančh pädø'cy. Mänit yo'oyø'cy. Jiaančh tehм yagjuøøyy ja'a Jairohajxy jaduһn mөөдä Jesús ja'a jiamioөdhajxy.

⁴³Mänitä Jairohajxy yhaneһmä coo hajxy jaduһn quia'a mädiá'agät coogä yhuung hänäjty tøø jiuypioøcy. Mänit hajxy nāmáayybä coo yhuung hajxy yajcáyät. Ja'a Jesús jaduһn mänaaň.

6 Coo ja'a Jesús hajxy jim chónhgumbä mөөдä jiamioөdhajxy, mänit hajxy jim nōcxy maa ja'a cajpt hänäjty xiøhatiän Nazaret. Jimä Jesús hänäjty nā'ägädä tsooň. ²Coo ja'a poo'xxioø yhabaaty, mänitä Jesús jim nōcxy maa ja'a tsajtøjcän. Mänit tiägøøyy yajnähixøøbiä. Coo ja'a cu'ughajxy jaduһn miädooyy, mänit hajxy jiaančh tehм yagjuøøyy. Mänit hajxy tiägøøyy niñámáayybä:

—Maa yø'ø craa mädia'agy jaduһmbä tøø nā'ä maaň yhabøcy coo jaduһn jiaančh tehм jiaty jiaančh tehм nājuø'øy, coo jaduһn hoy-yagjuøøňajaty yajcähxø'øgy. Haa ca'a, højts nmägunaaxhajtäm yø'øjä. ³Je'le yø'ø, ja'a hijty tsejtspä puјxpä. Ja'a María yhuung yø'ø. Hajchhajtäp yø'ø, ja'a Santiago, mөөдä José, mөөдä Judas, mөөдä Simón. Yaa ja'a piuhdo'oxyhajxy chäna'ay maa højts ngajptän.

Coo ja'a Jesús hänäjty jim chooň Nazaret, paady hänäjty jim quia'a mämøjø'øy quia'a mämayø'øyii.

⁴Coo ja'a Jesús jaduһn miädooyy, mänit miänaaň:

—Homiaajä ja'a

Dioswiinguexypähajxy wyiingudsähgø'øyii. Jagooyyä hajxy jim quia'a wiingudsähgø'øyii maa yhamdsoo cajpthajxiän, maa yhamdsoo tøjc-hajxiän.

⁵Coo ja'a Jesús hänäjty jim quia'a mämøjø'øy quia'a mämayø'øyii, paady hänäjty jim madiu'u hoy quia'a yajcähxø'øga'aň. Nämets nädägøøquiä pa'amjäya'ayhajxy jim nā'ä maaň yajpa'amnajxä cø'ønähgapyaam. ⁶Jiaančh tehм yagjuøøbiä Jesús hänäjty jaduһn coo ja'a miädia'agy jim quia'a jøjpøgøøyyäxä.

Mänitä Jesús ja'a mädia'agy jim tiägøøyy yajwa'xpä mäduһnjatiä cajpthuung wiingonbä. ⁷Mänitä Jesús ja'a jiamioөd wyiinguejxy, ja'a hajxy hänäjty nāmajmetspä, coo hajxy wiädítät cajpt-cajpt, coo ja'a pa'amjäya'ay hajxy yajnähwá'adsät, ja'a hajxy hänäjty møjcu'umøødpä. Nämetscjaty hajxy hänäjty wiädita'aň. ⁸Mänitä Jesús ja'a jiamioөd jiaac nāmaayy coo hajxy tii quia'a mänøcxät, ni tsajcaagy, ni morral, ni xädø'øň. Jagooyyä yomybiaxy hajxy quiábät tu'uquiä. ⁹Tu'tehñquiä cø'øg hajxy miänøcxät mөөд tu'xoјxyä wit.

¹⁰Mänitä Jesús jiaac mänaaň:

—Coo hajxy jim mmédsät homiädyii cajptä, jimä tøjc hajxy tu'ug myujwá'anät maa hajxy hänäjty mmejtsta'aga'aňän. Jimiä hajxy jaduһn mhídät. Cabä tøjc hajxy myajtägátsät. ¹¹Majaty mijtsä cu'ugä mmädia'agy hänäjty xquia'a jøjpøgø'øwaanä, mänitä

mdecy hajxy mwiinxit mwiinwóbät, weenä naaxoc jaduñ quiõxy ca'ay. Jaduñä hijxtahñd miähmó'owät coo ja'a cu'ugä Diosmädia'agy hajxy hänajty tøø quia'a jøjhadsowø'øy. Mänit hajxy jim mdsóonät.

¹²Mänitä Jesús ja'a jiamiøødhajxy tiu'ubójnä mädia'agy-yajwa'xpä. Jaduñä cu'ug hajxy hänajty yajwiingapxø'øy coo ja'a Diosmädia'agy hajxy piadu'ubójnät, møød coo ja'a yhaxøøgwiinmahñdy hajxy ñajtshixó'õñät. ¹³Mayyä jáya'ayhajxy hänajty yajnáhwa'ačhii, ja'a hajxy hänajty mõjcu'umøødpä. Mayyä pa'amjáya'ayhajxy hänajty yajmøcpøgyii coo hon hajxy hänajty yajnáhjaaxyii.

¹⁴Jimä Herodes hänajty guobiernähaty maa ja'a naax hänajty xiøhatiän Galilea. Mänitä Herodes miädoyhajty coo ja'a Jesús ja'a hoy-yagjuøõñäjatypä hänajty yajcähxø'øgy. Mänitä Herodes miänaañ cooc tyijy ja'a Juan mäyajnäbejpä tøø jiuypiojtägach. Ja'a Juan, je'e ja'a Herodes yhajodhajt cooc tyijy hänajty je'e Jiesúsä; páadiägä hoy-yagjuøõñäjatypä yajcähxø'øgy ja'a wyiinmahñdycxpä, cooc tyijy hänajty tøø jiuypiojtägach.

¹⁵Wiingatiä jáya'ayhajxy hänajty miänaambä. Naje'e hajxy hänajty miäna'añ cooc tyijy Jesús hänajty je'e yhElíasä. Naje'e hajxy hänajty miänaambä cooc tyijy ja'a Jesús hänajty wiädity nebiä jecyjäya'ayhajxy hänajty tøø Dyiosmädia'agy-yajwa'xiän jegyhajty. ¹⁶Pero ja'a Herodes, tehngajnä je'e hänajty miäna'añ cooc tyijy je'e Jwiangä, ja'a hänajty

tøø yajyo'puxyíjábä. Je'eg tyijy jaduñ tøø jiuypiojtägach.

¹⁷⁻¹⁸Hiç, haxøøgä Herodes hänajty jiäya'ayhaty; ja'a yhamdsoo puhya'ay tio'oxiojc hänajty miøødtsänáayyap. Felipe ja'a Herodes piuhya'ay hänajty xiøhaty. Herodías ja'a Felipe tio'oxiojc hänajty xiøhjäpä, ja'a Herodes hänajty miøødtsänaabiä. Mänitä Juan ja'a Herodes yhojy: "Cab jaduñ yhooyä coo ja'a mhamdsoo puhya'ay tio'oxiojc jaduñ mmøødtsänáayyät." Coo ja'a Herodes jaduñ yhojjä, paadiä Juan yajmajtsä. Mänitä Juan chuumä.

¹⁹Cabä Herodías hänajty yhojwiø'øy coo ja'a Herodes jaduñ yhojjä, paadiä Herodías ja'a Juan hänajty jia wi'i yajyagho'oga'añii. ²⁰Pero cabä Herodes hänajty jaduñ miäna'añ coo ja'a Juan yagho'ogóøjät. Hiç, wyiingudsähgøøbiä Herodes ja'a Juan hänajty. Ñajuøøbiä Herodes hänajty coo ja'a Juan hänajty jiaanč tehñ yhojhäna'cä. Jaanč tehñ yhomiädoonä ja'a Herodes ja'a Juan miädia'agy hänajty miädoowä. Pero cabä Herodes hänajty ñajuø'øy neby jiató'øwät. ²¹Cabä Herodías wiinmahñdy hänajty ñä'ägädä paady nebiä Juan yajyagho'ogóøjät. Mänit yhabaaty coo ja'a Herodes xiøø hänajty jiada'añii. Mänitä Herodes ja'a jiamiøødtøjc miøødcaayy miøødhuucy, møødä mioonsähajxy, møødä generalhajxy, møødä mäyøødøjc-hajxy, ja'a hajxy hänajty jim tsänaabiä Galilea. ²²⁻²³Jim hajxy hänajty quiaay yhu'ugy, mänitä Herodías yhuung jiiby tiøjtägøøyy. Mänitä quixy

tiägøøyy hejtspä pujpä. Jaanč tehṁ yajxón yhejch piujty. Jaanč tehṁ xioondaac ja'a Herodeshajxy jaduhṁ møødä wioybä wyichpä. Mänitä Herodes ja'a quixy ñämaayy:

—Tehṁ tiøy nnämä'awät, høøch yajmäyujwáanäc tii mdsogaamby, nmó'owäbøch miičh je'e, hotyijjä, høxtä nmó'owäbøch miičh naax cupc maačh yaa ngobiernähatiän.

Paadiä Herodes jaduhṁ miänaañ, jaanč tehṁ xioondaacp hänajty jaduhṁ coo ja'a quixy hänajty yajxón yhech. ²⁴Mänitä quixy piädsøømy. Mänitä tij hoy miäyajtøy tiig jaduhṁ yujwá'anäp. Mänitä Herodías wiinmahñdy piaaty nebiä Juan mäyajnäbejpä yajyagho'ogójøät. Mänitä yhuung ñämaayy coo ja'a Juan ja'a quiopc yujwáanäxät. ²⁵Mänitiä quixy ja'a Herodes hoy ñäma'ay:

—Høøchä Juan quiopc móoyyäc texyjooty.

²⁶Coo ja'a Herodes jaduhṁ ñämaayy, mänit jiaanč tehṁ jiootmadiägøøyy. Mänit jaduhṁ ñähadsooyy. Hiṁ, tøø hänajty jaduhṁ miäna'añ cooc hänajty hoy ñä'a tiijä yega'añ. Hiṁ, tøø ja'a wioybä wyichpä hänajty jaduhṁ yajmädoy. ²⁷Mänitä Herodes ja'a mioonsä jiiby quiejxy pujxtøgooty coo ja'a Juan nøcxy yo'puxyii. ²⁸Mänit hoy jiaanč yo'puxyii. Mänitä quixy ja'a Juan quiopc hoy yajcø'dägø'øyii texyjooty. Mänitä tij hoy mioodiägach.

²⁹Coo ja'a Juan jiamiøødhajxy jaduhṁ miädoyhajty coo ja'a Juan hänajty tøø yagho'ogyii, mänitä Juan ñi'x hajxy hoy yajpädø'cä. Mänit hajxy hoy yajnaaxtägø'øy.

³⁰Mänitä Jesús ñämejtstägajtsä ja'a jiamiøød, ja'a hajxy nämajmetspä. Cøjxä Jesús yhawáanäxä, nebiaty hajxy hänajty tøø miäba'amyajnaxy, møød waambaty hajxy hänajty tøø yajnähiçø'øy. ³¹Jaanč tehṁ miayyä Jesús jäya'ay hajxy hänajty ñämečhii. Wiimbijp hadøjpä majiäya'ayhajxy hänajty. Coo ja'a jäya'ayhajxy may wyi'i miech, paadiä Jesús hajxy hänajty quia'a näbaadøøyyäxä mäduhnajtä hajxy quia'y yhä'ugät. Mänitä Jesús miänaañ:

—Jam hajxy paquiä póo'xäm wiingtuum maa majiäya'ay hajxy xquia'a paadäänäm.

³²Mänitä Jesús hajxy tiägøøyy barcojooty. Tsohn hajxy jimän. Mänit hajxy jim ñøcxy maa ja'a majiäya'ayhajxy hänajty quia'a jadyhitiän. ³³Coo ja'a Jesús hajxy jaduhṁ yhiçtu'ubøjcä, mänitä majiäya'ayhajxy wyi'i piadu'ubøjpä. Ñajuøøby hajxy hänajty jaduhṁ maa ja'a Jesús hajxy hänajty ñøcxa'añ. Päyø'øguiä hajxy jaduhṁ ñä'ägä nøcxy. Jawyiin hajxy jim ñä'ägä mejch maa ja'a Jesús hajxy hänajty ñøcxiän. Wiinduhmyguiajpt hajxy hänajty choon. ³⁴Coo ja'a Jesús jiiby piädsøømy barcojooty, mänitä jäya'ay yaghixøøyy may. Mänit näxuu'tscapxy miøødhajty. Jaduhṁ yhiçxy nej coo meeg wyiindsøn ca'a hijpä, coo ja'a Diosmädia'agy hajxy hänajty quia'a yajnähiçø'øyii. Mänitä Jesús madiu'u tiägøøyy yajnähiçøøbiä. ³⁵Tøø hänajty chuujøønä. Mänitä Jesús ja'a jiamiøød ñämejtsä. Mänitä Jesús ñämaayyä:

—Jue'e jaduñ yaa, pactuum. Cabä cajpt yaa maa ja'a cu'ug quiaaayyøøc hajxy häyaa jiüyät. Tøø jaduñ hoyhoy jiaančh tehñ chuujø'øy. ³⁶Näma'aw yø'ø cu'ug, ween hajxy nøcxy quiayhøxta'ay maa ja'a cajpt yaa wiingonbän — nømä Jesús ñämaayyä.

³⁷Mänitä Jesús yhadsooyy:

—Tsøg hajxy nä'ägä yajcáayyäm højtshájtäm.

Mänit hajxy yhadsóogumbä:

—Haa tii hajxy jaduñ nhuuc nä'ä yajcáayyämbäp. Cajx nä'ä caayyøøcpä nä'ä huucøøcpä. Nej, jaduñ miičh mmäna'añä coo højts tsajcaagy nøcxy njuy mejtsmägo'x denario —nømä Jesús jiamiøød ñämáayyägumbä.

³⁸Mänitä Jesús miänáangumbä:

—Huuc mäyajtøw yø'ø cu'ug pøn caayyøøc møød. Pønjaty jaduñ møød, ween hajxy yajmucy.

Coo hajxy hänäjty tøø yajmujnä, mänitä Jesús ñämaayyä:

—Jagooyyä højts tsajcaagy mägooxyä tøø nbaady møødä hacx metsyä.

³⁹⁻⁴⁰Mänitä Jesús miänaañ coo ja'a cu'ughajxy yhøxtá'agät necchooty tu'hagøøbiäjaty, nämägo'xhaam møød näjuxychägui'xmajc-haam. Mänit hajxy jaduñ jiaančh yhøxtaacy.

⁴¹Mänitä Jesús ja'a tsajcaagy mägooxpä quioondsooyy møødä hacx metspä. Coo chajhee'py, mänitä Dioscujú'uyäp yejcy ja'a tsajcaagy quiøxpä møødä hacx quiøxpä. Mänitä tsajcaagy tiägøøyy haguidøøbiä. Mänitä jiamiøød tiägøøyy moobiä ja'a tsajcaagy møødä hacx, ween hajxy

jaduñ yajwa'xy maa ja'a cu'ugän. Tehñgajnä Jesús ja'a tsajcaagy hänäjty yajwa'añguiojy møødä hacx. Jiaac tehñ yajmayøøby hänäjty jaduñ. ⁴²Cu'uxiä jäya'ayhajxy jaduñ jiaančh tehñ quiaaayy.

⁴³⁻⁴⁴Hoyyä jäya'ayhajxy hänäjty jaduñ jia mayyä, majmetscachä tsajcaagy quiunajxy møødä hacx. Ja'a Jesús jaduñ yajwa'añguioj. Nämägøoxmil ja'a ya'adiøjc-hajxy jaduñ quiaaayy yhuucy.

⁴⁵Mänitä Jesús ja'a jiamiøød ñämaayy coo hajxy tiägø'owät jiiby barcojooty, wéenac hajxy jim ñøcxø'øgät mejyhawiimb maa ja'a cajpt jaduñ xiøhatiän Betsaida. Coogä Jesús ja'a majiäya'ay jaduñ ñähguéecnät, mänitac hajxy jim ñibiaadøøjät. ⁴⁶Coo ja'a Jesús ja'a majiäya'ay ñähgueecy, mänit jim ñøcxy tungøxp Diospa'yaaxpä.

⁴⁷⁻⁴⁸Coo quiooodsøøyy, jimä Jesús hänäjty tøø miähmø'øy mejypia'a nidiuhm. Ja'a barco, jagooyyä hänäjty mejyquiujc tøø ñä'ä mahñ miech. Jaančh tehñ miøcä barco hänäjty jiojcbujø'øyii. Tøø ja'a Jesús jiamiøødhajxy hänäjty jiaančh tehñ yhanuu'xøøñä coo ja'a barco hajxy hänäjty jia wi'i quiaaby. Coo ja'a Jesús jaduñ yhiyx coo hajxy hänäjty tøø yhanuu'xøøñä, mänit yo'oyhaam tiu'ubøjcy nøøwiing. Mobädajpä hänäjty jiojø'owaannä, tøø ja'a Jesús ja'a jiamiøød hänäjty ñajtspaadøøñä. Wyiinnaxáannäbä Jesús ja'a jiamiøød hänäjty jaduñ. ⁴⁹Coo ja'a Jesús yhiyxä coo hänäjty yo'oy nøøwiing, mänitä jiamiøødhajxy miänaañ cooc tyijy hänäjty je'e yháañämä. Mänit hajxy møc chaächyaaxy. ⁵⁰Nägøxiä hajxy

hänäjty chähgø'øy coo ja'a Jesús hajxy jaduhñ yhiyx coo hänäjty yo'oy nõøwiing. Cab hajxy choj høxcajpy. Mänitä Jesús miánaañ:

—Møcä mjoot hajxy päda'ag; høøch hädaa; ca'ačh hajxy xchähgø'øy.

⁵¹Coo ja'a Jesús tiägøøyy barcojooty, mänitä poj miooñ. Jiaanč tehñ yagjuøøyy ja'a Jesús jiamiødhajxy jaduhñ coo poj miooñ. ⁵²Hoy hajxy hänäjty tøø jia hixy coo ja'a Jesús ja'a tsajcaagy yajwa'añguiojy møødä hacx, cab hajxy hänäjty ñajuø'øy coo ja'a Jesús møcmäjaa miøødä ja'a Dioscøxpä. Jaanč tehñ quiuhxex hajxy hänäjty.

⁵³Coo ja'a Jesús hajxy jim miejch mejyhawiimb maa ja'a naax hänäjty xiøhatiän Genesaret, mänitä barco hajxy jim quiuxojch mejypia'a. ⁵⁴Tuunä hajxy jaduhñ ñä'ä barcopädsøømy, mänitiä Jesús yhøxcajpä ja'a cu'ug. ⁵⁵⁻⁵⁶Paquiä mädia'agy jim wia'xy coo ja'a Jesús hänäjty jim tøø miech. Mänit tiägøøyy wädiypä cajpt-cajpt. Mänitä pa'amjäya'ayhajxy tiägøøyy cøømiéjtsäbä tsaajiooty maa ja'a Jesús hänäjty wiäditiän. Jimä pa'amjäya'ayhajxy hänäjty tøø ñajtsçøyø'øyii mõjtu'uba'a maa ja'a Jesús hänäjty ñaxø'øwa'añän. Mänitä Jesús hajxy miänuu'xtaacy coo ja'a pa'amjäya'ayhajxy yajpa'amnaxø'øjät. Pønjataiä Jesús wyitpa'a hänäjty nä'ä nähdoonäxäp, tehñ ñajxpä pia'amhajxy hänäjty mänitiä.

7 Mänitä fariseos ja'a Jesús hajxy ñamejch, møødä häna'c ja'a Diosmädia'agy hajxy

yajnähihixøøbiä. Jim hajxy hänäjty chooñ Jerusalén. ²Mänitä fariseoshajxy yhiyx coo ja'a Jesús jiamiøød ja'a cuhdujt hajxy hänäjty näje'e quia'a yajtuñ, coo hajxy quia'a cø'øbuju coo hajxy hänäjty tiägø'øwa'añ caabiä huucpä. Ja'a fariseoshajxy, jaanč tehñ yhooyä judiocuhdujt hajxy hänäjty quiudiuñ. ³Hix, jaduhñä judiøshajxy hänäjty nägøxiä quiuhdujthatyñä nebiä yhapä tieedyhajxy hänäjty jegyhajty tøø yajnähihixø'øyii. Naaghooc hajxy hänäjty quiaya'añ, tsipcøxpä quiø'ø hajxy hänäjty hoyhoy ñä'ägä puju wa'ads. ⁴Møød coo hajxy hänäjty tøø yhoy halaplaaztøjpa'c, cab hajxy hänäjty quiaya'añ jaguiø'øbuju. Madiu'u cuhdujt hajxy hänäjty miøødä coo hajxy cøxiä wiinä ñähbuju ñähje'ečh, møødä cayøhñdy hu'ugøhñdy, møødä tu'ts, møødä pujxtu'ts. ⁵Mänitä fariseos ja'a Jesús hajxy miäyajtøøyy:

—Tii yø'ø mjamiøødhajxy jaguiø'øbuju coo quiay. Cabä jecyquiuhdujt hajxy yajtuñ neby jäya'ayhajxy hijty jegyhajty quiuhdujthatiän.

⁶Mänitä Jesús yhadsooyy: —Jue'e mijts, mjaanč tehñ miähane'emaamb mijts, pero cab hajxy mnä'ä cudiuñ waambaty hajxy hamdsoo mja hane'emy. Mijtsçøxpä ja'a Isafas jecy quiujahy, mänitä Dios miánaañ:

Hädaa jäya'ayhajxy, ja mänaamb hajxy jaduhñ cóogøch tyijy hajxy xwyiingudsähgø'øy, pero cábøch hajxy hamuumdu'joot xñä'ä tsooy.

⁷ Xiðbøch hajxy xjia wi'li
pia'häyoy.

Jaduhñ hajxy jia mäna'añ
cóogøch tyjy nmädia'agy
hajxy xjia yajnahixøyyä,
pero yhamdsoo mädia'agy hajxy
ñä'a wi'li miädiaacy,py,
nømä Isafas jecy quiujahy. ⁸ Mijts,
tøø ja'a Diosmädia'agy hajxy
mnajtshixøøñä. Ja'a mhamdsoo
cuhdujt hajxy jaduhñ myaghíjnäp —
nømä Jesús ja'a fariseos ñämaayy.

⁹⁻¹⁰ Mänitä Jesús ñämäaguiumbä:

—Paadiä Diosmädia'agy hajxy tøø
mnajtshixø'ø, jaduhñä mhamdsoo
cuhdujt hajxy hoy myaghida'añ.
Jaduhñä Moisés jecy miänaañ coo
ja'a mdaj coo ja'a mdeedy hajxy
mwiingudsähgø'owät. Pero pønägä
tiaj ja'a tieedy haxøøg nänøømb,
yajcuyagho'ogø'owáañäbäc
jaduhñ. ¹¹⁻¹² Pero wiing mijts
mja mäna'añ cooc tyjy jaduhñ
yhawiinmatsä cooc pønä tiajjä
tieedy haxøøg ñämä'awät:

“Cábøch mijts nbuhbedaannä.
Hix, tøøchä Dios nnäma'ay
coöch je'e cøxiä nmo'owa'añ
ja'açh mijts hijty nmo'owaambiä.”

¹³ Coo hajxy jaduhñ mmäna'añ,
myajcähxø'py hajxy jaduhñ
coo ja'a Diosmädia'agy hajxy
mga'a yajtuunnä, møød coo
ja'a mhamdsoo cuhdujt hajxy
myajnahixøøñä. Madiu'u hajxy
jaduhñ myajcähxø'ogy coo
ja'a Diosmädia'agy hajxy tøø
mnajtshixøøñä, møød coo
ja'a mhamdsoo cuhdujt hajxy
myajtuunnä —nømä fariseoshajxy
ñämaayyä.

¹⁴ Mänitä Jesús ja'a cu'ug
yajwiingapxøøguiumbä:

—Høøch nmädia'agy hajxy
hamädoowhíjtäc. ¹⁵ Tijaty
hajxy mgaaby mhuucypy, cab
hajxy xyajcädieey. Pero ja'a
haxøøgwinnmahñdy, je'eds hajxy
mäböcy xyajcädieéyap. ¹⁶ Pøn
jaduhñ wiinjuøøby, wéenhøch
nmädia'agy xmiäböjçä.

¹⁷ Coo ja'a Jesús ja'a quiapxy
miädia'agy jaduhñ yajmaayy,
mänitä cu'ughajxy quiøxy
wiimbijnä. Mänitä Jesúshajxy
tiøjtägøøñä møødä jiamiøødtøjç,
ja'a hajxy hänäjty ja'a nämajmetspä.
Mänitä Jesús miäyajtøøwä neby
hänäjty jaduhñ miädia'agytiägø'oy
ja'a hänäjty jaduhñ jim tøø
miädiä'aguüäbä majiäya'ayhagujç.
Ja'a Jesús jiamiøødhajxy jaduhñ
yajtøøw yajtøø'x. ¹⁸ Mänitä Jesús
yhadsooyy:

—Nej, ni mijtshajxy jaduhñ tøø
mga'a wiinjuø'oyä waambátyhøch
tøø nja mädia'aguüä. Jaduhñds je'e,
tijaty hajxy mgaaby mhuucypy, cab
hajxy xyajcädieey. ¹⁹ Hix, ja'a jøø'xy
ja'a pøcy, jiiiby jaduhñ yhäda'agø'oy
maa ja'a mjøø'xytiøjç-hajxiän.
Jadähooc nøcxy piädsømy. Cab
jaduhñ jiiiby tiehñ tiägø'oy maa
ja'a mjuøhñdyhajxiän —nømä Jesús
miänaañ.

Jaduhñ hädaaduhñ
miädia'agytiägø'oy coo ni mädyii
jøø'xy pøcy quia'a hamajtsä.

²⁰ Mänitä Jesús miänångumbä:

—Pero ja'a haxøøgwinnmahñdy,
je'eds hajxy mäböjnäbä
xyajcädieéyap. ²¹⁻²² Coo ja'a
jäya'ay haxøøgwinnmahñdy hajxy
jiaanç tehñ miøødä, paady
hajxy haxøøgjaty jiaanç tehñ
jiatçø'oy; paady hajxy miämeeçh,

paady hajxy ñiyagho'ogyii, paadiä jäya'adio'oxiojc hajxy miødtsäna'ay, paadiä jäya'ajie'e hajxy yhadsoy, paady hajxy miäwiinhøñ, paady hajxy ñiñähojyii, paady hajxy jiaanč tehṁ yajcumaya'añ, paady hajxy quia'a nä'ägädä wiinmahñmech. Coö hajxy naxy miu'ugyii, paadiä hadsojwiinmahñdy hajxy miøødä. ²³Jaduhñds je'e, jaanč tehṁ miadiu'u ja'a haxøøgwiinmahñdy jii. Je'eds hajxy jaduhñ mäbøcy xyajcädiehby.

Mänitä Jesús miädiaacpädøñä.

²⁴Coö ja'a Jesús jim chohñ, mänit jim ñøcxy maa ja'a naax jaduhñ xiøhatiän Tiro møød Sidón. Mänitä tøjc tu'ug piaaty maa hänajty miejtsta'aga'añän. Hamee'ch jim jia hidaañ. Pero miädoow ja'a cu'ughajxy jaduhñ coö ja'a Jesús hänajty jim tøø miech. ²⁵⁻²⁶Jimä tadjäya'ay hänajty tu'ug chäna'ay. Hagriego hänajty miädia'agy. Ca'a hänajty je'e jiuđiosä. Jimä yhuung hänajty tu'ug, to'oxiäna'c. Tøø ja'a to'oxiäna'c hänajty pia'ambety. Møjcu'u hänajty tøø yajtägø'oyii. Coö ja'a quixiä tiaj jaduhñ miädoyhajty coö ja'a Jesús hänajty jim tøø miech, mänitä Jesús hoy wyiinjjcäda'agyii. Mänitä Jesús miänuu'xtaacä coö ja'a to'oxiäna'c nøcxy yajpa'amnájxä. ²⁷Mänitä Jesús miänaañ:

—Cab jaduhñ yhäxø'ø y coöchä huc-huung tsajcaagy nmó'owät, ja'a pigäna'c-hajxy hijty quiayaambä.

Coö ja'a Jesús jaduhñ miänaañ, ja'a juđioshajxy jaduhñ yajmäbaatä nebiä pigäna'cän. Ja'a ca'a juđioshajxy jaduhñ yajmäbaatä

nebiä hucän. ²⁸Mänitä tadjäya'ay yhadsooy:

—Wiindsøn, tøyhajt jaduhñ. Pero jiiä huc-huunghajxy pia'piy pia'coñ meexäpa'c tijaty ja'a pigäna'c-hajxy yajwiinga'awøøby.

²⁹Mänitä Jesús miänaañ:

—Coö jaduhñ tøø mmäna'añ, cäxø'p jaduhñ coöch nmädia'agy xmiäbøjcä. Tøø ja'a mhuungä møjcu'u ñähwäatsänä. Nøcxnä jootcujc maa ja'a mdøjcän.

³⁰Mänitä tadjäya'ay wyiimbijty. Coö jim miejch maa ja'a tiøjcän, tøø ja'a yhuungä møjcu'u hänajty jiaanč nähwäatsänä. Jimä yhuung hänajty quio'na'ay maabejtcøxp hoy weenän.

³¹Mänitä Jesús jim wyiimbijtägajch maa ja'a naax xiøhatiän Tiro. Mänit jim ñaxøøyy maa ja'a cajpt hänajty xiøhatiän Sidón. Mänit jim ñøcxøøyy maa ja'a naax hänajty xiøhatiän Decápolis. Mänit jim miedsøøyy maa ja'a mejy hänajty xiøhatiän Galilea. ³²Mänitä mähdiojc tu'ug yajmejtsä maa ja'a Jesús ja'a wyiinduumän. Cabä mähdiojcä mädia'agy hänajty hoy yhäbädsømy, møød hänajty quiuhnatä. Mänitä Jesús miänuu'xtaacä coö ja'a quio'ø yajnähgäbät maa ja'a mähdiojc cuhnatpän. Ja'a mähdiojcä jiamioødhajxy jaduhñ mänaañ. ³³Mänitä Jesús ja'a mähdiojc jäguemjuøøby miødhajty nidiuhñ. Mänitä Jesús ja'a mähdiojcä tiaatsc piadsihwä. Mänitä Jesús ja'a quio'øwahxc chujyñähbo'ty. Mänitä mähdiojc tiaatsc chujyhabo'odøøyyäxä. ³⁴Mänitä Jesús chajhee'py. Mänit

miänaaṅ: “Efata.” Jaduhṅ hädaa miädia'agytiägø'øy: “Hawa'ads.”

³⁵Tuunä ja'a Jesús jaduhṅ ñä'ä mänaaṅ, mänitiä mähdiøjc quiapxø'cy miädoowø'cy. Jaančh tehṅ yhoy jaduhṅ miädiaacnä.

³⁶Mäniä Jesús miänaaṅ coo hajxy quia'a mädiä'agät coo ja'a mähdiøjc jaduhṅ tøø yhoyø'øy. Pero cab hajxy jaduhṅ jioodhajty. Mänitiä hajxy jaduhṅ hoy yhamädiaagø'øy. Hoyyä Jesús mayhooç jia hanehṁy coo hajxy quia'a hamädiaagø'owät, maas hanaxiä ja'a mähdiøjc hajxy yhamädiaagøøyy. Cabä Jesús miädia'agy jaduhṅ ñä'ä yajtūñäxä.

³⁷Jiaančh tehṁ yagjuøöbiä cu'ughajxy hänajty jaduhṅ. Mänit hajxy tiägøøyy mänaambä: “Jaančh tehṁ miøjmayhajt jaduhṅ tiuumby coo ja'a cuhnatpä yajmädoowø'øgy, møød coo ja'a huumbä yajcapxø'øgy.”

8 Cujaboom cumaaxç, mäniä jäya'ayhajxy nämay yhamugøøguiumbä maa ja'a Jesús hänajtiän. Ja yähó'cäp hajxy hänajty, cabä caayyøøc hajxy hänajty ñä'ägädä møødä. Mänitiä Jesús ja'a jiamioødtøjc yaaxṁujcy, ja'a hajxy hänajty nämajmetspä. Mänitiä Jesús miänaaṅ:

²—Nnäxúu'chpøch hädaa jäya'ayhajxy. Tägøøgxøøjoch hajxy tøø xpiawädiñä. Tøø ja'a quiaay tøø ja'a yhu'ugyhajxy quiøjxnä. Tii hajxy jaduhṅ ñä'ä jaac cáyap. ³Coočh hajxy jaguiay nguejxwiimbídät, wehṅdä hajxy jim tiu'uyuugädawät. Hix, näje'e hajxy jäguem tøø chohnda'agy.

⁴Mäniä Jesús yhadsoowä ja'a jiamioødtøjc:

—Tii hädaa jäya'ay hajxy häyaa nnä'ä yajcáayyamb. Cabä cajpt yaa. Maa tsajcaagy hajxy häyaa nnä'ä páatämät —nøṁä Jesús jiamioødhajxy miänaaṅ.

⁵Mäniä Jesús ja'a jiamioødtøjc miäyajtøøyy:

—Naag tsajcaagy hajxy jii mmøødä.

—Juxtujc —nøṁ hajxy yhadsooyy.

⁶Mäniä Jesús miänaaṅ coo ja'a majiäya'ayhajxy yhøxtä'agät naaxwiin. Mänitiä Jesús ja'a tsajcaagy quioondsooyy. Mänitiä Dioscuj'uyäp yejcy. Mänitiä tsajcaagy tiägøøyy haguideoöbiä. Mänitiä jiamioødtøjc miooyy. Mänitiä majiäya'ayhajxy miooyy. Coo ja'a Jesús ja'a tsajcaagy hänajty yhaguideo'øy, yajwa'añguiojpy hänajty tehngajnä. ⁷Jimä hacxhuung hajxy hänajty miøødäbä mejtstägøøg. Mänitiä Jesús quiunuu'xy. Mänit miänaaṅ coo ja'a majiäya'ayhajxy mio'owøøjtä. Jaduhṅ je'e may yajwa'añguiojpä.

⁸Mäniä jäya'ayhajxy tiägøøyy caabiä. Høxtä cuuxä hajxy hoyhoy. Høxtä jiaac piwø'c hajxy juxtujcach, ja'a hänajty tøø quiunäxiäbä. ⁹Nämädaaxmil jäya'ayhajxy jaduhṅ quiaayy yhuucy. Mänitiä Jesús miänaaṅ coo hajxy wyiimbijnät. ¹⁰Mäniä Jesús hajxy jadähooç biarcopéjcumbä møødä jiamioødtøjc. Mänit hajxy jim ñøcxy maa ja'a cajpt hänajty xiøhatiän Dalmanuta.

¹¹Mäniä Jesús ja'a fariseos näje'e nämejtsä. Mänitiä fariseos ja'a Jesús ja'a Diosmädia'agy hajxy miøødyajtsibøøyy. Mänitiä Jesús jia nämaayyä:

—Huuc yajcähxø'ögä hijxtahnd hoy-yagjuøñäbä ja'a tsajpootypä. Jadhuhñ højtsä tøyhajt nmøødhádät coo miichä Diosmäjaa mjaančh møødä —nømä fariseoshajxy miänaañ.

¹²Mänitä Jesús jiootmaxiejy. Jootmadiägøøyy jadhuhñ. Mänit miänaañ:

—Tii ja'a Diosmäjaa hajxy coo mwil'i yhixa'añ. Tøyhajt mijts nnämä'awät coo hajxy mga'a hixa'añ —nømä fariseoshajxy ñämaayyá.

¹³Mänitä Jesús hajxy wyiimbijnä møødä jiamioødtjç. Mänit hajxy tiägøøyy barcojooty. Mänit hajxy tiu'ubøjcy. Mejyhawiimb hajxy hánajty ñøcxa'añ.

¹⁴⁻¹⁵Mänitä Jesús ja'a jiamioødtjç ñämaayy:

—Mnigwieendähadøøjäp hajxy. Ca'a ja'a Herodes chajcaagychooy hajxy mmäwädijtä, ni ja'a fariseos jie'ehajxy.

Mänitä Jesús jiamioødhajxy yhijxy coo ja'a tsajcaagy hajxy hánajty tøø quia'a jaac juy. Jagooyyá tsajcaagy hajxy hánajty tu'uquüä miøødä barcojooty. ¹⁶Mänit hajxy tiägøøyy niñämäayyábä:

—Paady hajxy jadhuhñ xñämäayyäm, coo tsajcaagy hajxy tøø njahdiägóoyyäm.

¹⁷Coo ja'a Jesús jadhuhñ yhamädoonajxy waambatiä jiamioødhajxy hánajty ñiñäma'ayii, mänit hajxy ñämaayyá:

—Nej, jadhuhñ hajxy mwiiñjuø'øyyä coočhä tsajcaagy tøø nmädia'aguüä, ja'a hajxy tøø mjahdiägóoyyábä. Cab hajxy tøø mnä'ägädä wiinjuø'øyy

tijátyhöch tøø nmädia'agy. Mjaančh tehñ quiuhxex mijts jadhuhñ. ¹⁸Xiidsä mwiiñ hajxy mja møødä, cab hajxy tii mhijxmähmø'øyy. Xiidsä mmädohnd hajxy mja møødä, cab hajxy tii mmädoomähmø'øyy. ¹⁹Mänáajøčhä nämägooxmilpä jäya'ay nyajcayyän ja'a mägoøxtsajcaagy, naac cachä caadiuc hajxy mbiwø'cy.

Mänit hajxy yhadsooyy:

—Majmetsc.

²⁰Mänitä Jesús miänáangumbä: —Jaanä mänáajøčhä nämädaaxmilpä jäya'ay nyajcayyän ja'a juxtujtsajcaagy, naag cach hajxy mbiwø'pä.

Mänit hajxy yhadsoogumbä:

—Juxtujc.

²¹Mänit hajxy ñämäayyägumbä: —Caj mijts tøø mnä'ägä wiinjuø'øyy tijátyhöch tøø nmädia'agy —nømä Jesús miänaañ.

²²Mänitä Jesús hajxy jim miejststägajch maa ja'a cajpt hánajty xiøhatiän Betsaida. Mänitä wiinds tu'ug wyitsmejtsä maa ja'a Jesúsän. Mänitä Jesús miänuu'xtaacä coo ja'a wiinds ween ñähdoñii, ween jadhuhñ yhixø'øgy. ²³Mänitä Jesús ja'a wiinds wiyjststsooyy. Mänitä wiinds cajptpa'a quipxy miødhajtä. Mänitä wiinds wyiingutsujøøyyä. Mänit wyiingumo'xøøyyä. Mänit miäyajtøøwä pø tøø hánajty yhixø'øgy. ²⁴Mänit tiägøøyy hijxø'pä weenjaty. Mänit miänaañ:

—Tøøčh weenjaty nhixø'øgy.

Cábøčhä jäya'ay hoy nhøxcaba'añ. Nnajuøøbiøch jadhuhñ coo jiäya'ayä, pero jadúhñhöch nhixy nebiä quepychaajän.

²⁵Mänitä Jesús ja'a wiinds jadähooc wyiingumo'xøøguiumbä.

Mänitā wiinds hoy tiägøøñā hijxpā.
Hotyijā hānajty jäguemjaty yhiixnā.

²⁶Mänitā Jesús miānaañ:

—Tu'uda' aquíā mnøcxāt maa
ja'a mdøjcän. Ca'a cajptooty
mguyo'oy mgubøgø'oy —nømā
craa ñāmaayyā, ja'a hānajty tøø
yhixø'øguiäbā.

²⁷Mänitā Jesús hājxy jim
tiu'ubøjcy møødā jiamioødtøjc. Jim
hājxy hānajty ñøcxa'añ maa ja'a
naax hānajty xiøhatiän Cesarea de
Filipo. Cajpt-cajpt hājxy hānajty
wiädita'añ. Tu'haamnøcxpā, jimā
Jesús ja'a jiamioødtøjc miäyajtøoyy:

—Høøch, pøn høchā cu'ugāda'a
xtyijp.

²⁸Mänitā Jesús yhadsoowā:

—Näje'e hājxy miāna'añ cooc
tyijy miich mJuan mäyajnābejpā.
Näje'e hājxy miānaambā cooc
tyijy miich mElíasā. Näje'e hājxy
jiaac mānaambā cooc tyijy miich
mDiosquexiā, cooc tyijy miichā
mDiosmädia'agy jecy myajwa'xy.

²⁹Mänitā Jesús yajtøøgumbā:

—Mijtsäts, pøn høch mijtshājxy
jaduhñ xtyijp.

Mänitā Pedro yhadsooyy:

—Jue'e miich, Cristo. Dios miich
tøø xwyiinguexy.

³⁰Mänitā Jesús ja'a jiamioødtøjc
ñāmaayy coo ja'a Jesús hājxy quia'a
mädiā'agāt pøn hānajty je'e.

³¹Mänitā Jesús ja'a jiamioødtøjc
tiägøoyy yajwiingapxøøbiä:

—Høøch, Diosquexyhøch
høøch. Madiú'ujøchā
tsaačpā nøcxy nhabaada'añ.
Xmiāhanhadāambøchā
jäya'ayhājxy, ja'a hājxy jiihy
wiindsøn hājpä maa ja'a tsajtøjcän,
møødā teedywiindsøn hājxy,

møødā hāna'c-hājxy jiihy
Diosmädia'agy-yajnāhixøøbiä maa
ja'a tsajtøjcän. Mänithøch hājxy
jaduhñ xjia yajyagho'oga'añii.

Pero cooç hājxy hānajty tøø
xyajyagho'ogyii, cudägøøgxøoyyā,
mänithøch njujypiøjtägatsa'añ.

³²Howyiinjuøøñā ja'a Jesús
jaduhñ miädiaacy. Mänitā Pedro
ja'a Jesús hawiingtuum wioonøcxy.
Mänitā Pedro miānaañ:

—Wiindsøn, ca'ads jaduhñ
mwi'i miāna'añ. Caj miich nej
mjada'añ mhabeta'añ —nømā Jesús
ñāmaayyā.

³³Mänitā Jesús wia'wiimbijty.
Mänitā jiamioødtøjc
wyiinhee'ppejty. Mänitā Pedro
yhojjā:

—Møjcu'u, jua'ads yaa maačh
nwiinduumän. Jaduhñ miich
mwiinmahñdyhaty nebiä
jäya'ayhājxy wyiinmahñdyhājpä.
Caj miich jaduhñ
mwiinmahñdyhaty nebiä Dios
wyiinmahñdyhatiän —nømā Jesús
miānaañ.

³⁴Mänitā Jesús ja'a cu'ug
miøjyaaxy møødā jiamioødtøjc.
Mänitā Jesús miānaañ:

—Pøn jioot tsojy cooç
xjiamioødhädät, weenä yhamdsoo
cuhdujt hājxy ñajtshixø'oy,
weenä jioot hājxy piäda'agy coo
hājxy chaächpøjpät nébiøch
ndsaačhpøga'añän. Wéenhøchā
nmädia'agy hājxy tehngajnä
xmiäbøjcä. ³⁵Pønā jioot ja pädaacp
coo hājxy hoy jjugyhädät, cab
hājxy çøjxta'axiøø jjugyhada'añ
nebiä Dios jjugyhatiän. Pero
pønā jioot pädaacp coo hājxy
yhø'ogät ja'a høøchcøxpā møødā

Diosmädia'agyquiøxpä, je'edshajxy homiänaajä jugyhadaamb nebiä Dios jugyhatiän. ³⁶Coo hajxy hodiumm mga'a mähmø'owät coo hajxy hänajty tøø mho'ogy, cab hajxy jaduhñ mniyaghoyø'owøøjät, hoy hajxy hänajty yaa tøø mja näyøøhaty hädaa yaabä naaxwiin. ³⁷Ni tii yaa quia'a nä'ägädä tsoobaady hädaa yaabä naaxwiin nebiä mjugyhajthajxy choobaada'añän, coo hajxy homiänaajä mjugyhädät nebiä Dios jugyhatiän. ³⁸Pøñhöch xmiädsähdiuumb møødhöchä nmädia'agyquiøxpä maa hädaa jäya'ay wyiinduumhajxiän, hädaa pojmoødpä cädieemiøødpähajxy, hädaahajxy ca'a Diosmädia'agymiäbøjpä, cooçh yaa ngädaactägätsät hädaa yaabä naaxwiin, mänitøch hajxy jadähooç nmädsähdiuundägatsa'añ, pønjätyhöch hänajty yaa tøø xmiädsähdiuñ. Diosquéxyhöch høøch. Diosmøcmäjaamøødhöch hänajty yaa ngäda'aga'añ, näguipxy møødä Diosmoonsähajxy, ja'a hajxy jim hijpä Dioswiinduum —nømä Jesús miänaañ.

9 Mänitä Jesús miänäängumbä: —Chaads mijts tøyhajt ndehm nämä'awät, mijts xii tänaabiä, näje'e hajxy hänajty mga'a ho'ogyñä coo hänajty quiähxø'øga'añ coo ja'a Dios hänajty yhane'ema'añ ja'a miøcmäjaahaam.

²Cudädujxøø, mänitä Jesús ja'a Pedro wioonøcxy maa ja'a tun jaançh tehñ quiøxpän, näguipxy møødä Santiago møødä Juan. Nämädaaxyä hajxy hänajty jim.

Mänitä Jesús wyiin jiøjp wiing jiajty maa ja'a Pedro wyiinduumhajxiän. ³Høxtä haamb høxtä tsämaambä Jesús hänajty møødä wyit møødä tiucxy. Jaançh tehñ pioobä wyit hänajty nägøø nädecypiä. ⁴Mänitä Elíashajxy jim näguehxtøø'xy møødä Moisés. Jimä Jesús hajxy hänajty wyi'i miøødmädia'agy. Nägoojä Pedrohajxy hänajty nä'ä hijxcäda'agy nä'ä hee'pcäda'agy. ⁵⁻⁶Jaançh tehñ chähgøøbiä Pedrohajxy hänajty. Cab hajxy hänajty näjuø'øy waamb hajxy jaduhñ nä'ä mänä'anät. Mänitä Pedro nä'ä nägoobä miänaañ:

—Wiindsøn, hoyøøyy jaduhñ coo hajxy yaa tøø nbéjtäm. Nhuuc hädiuñ højts tøjquemyhuung tägøøg maa mijtshajxy häyaa cødu'ug myaghäña'awø'owät, møød miich, møødä Moisés, møødä Elías —nømä Jesús nämaayyä.

⁷Tuunä ja'a Pedro jaduhñ nä'ä mänaañ, mänit hajxy näma'anähbejty. Mänitä Dios jiiby quiapxy näma'ajooty: “Høøch nHuung hädaa. Njaançh tehñ chójpiøch hädaa. Mäbøjca miädia'agy hajxy.” ⁸Coo ja'a näma'a chajpejty, tøø ja'a Moiséshajxy hänajty yhadägoyyø'øy møødä Elías. Coo ja'a Pedrohajxy jia hijxwädijty, cabä Moisés hajxy yhiixnä ni ja'a Elías; jagooyyä ja'a Jesús hajxy jiaag hijxy nidihñ.

⁹Jimä Jesús hajxy hänajty wyiinmänacy tunnähgøxp møødä jiamioød nädägøøgpä, mänitä Jesús miänaañ:

—Ca'a hajxy pøn mnä'ägädä hawaanä tijaty hajxy yaa tøø mhixy tøø mmädoy høxtä cóonøch hänajty

tøø njujypiøjtägach cooçh hänajty tøø nho'ogy. Diosquexyhøch høøçh —nømä Pedrohajxy ñämaayyä.

¹⁰Coo ja'a Pedrohajxy jaduhñ ñämaayyä, paadia mädia'agy hajxy jaduhñ miäbøjcy. Jioodhajt hajxy jaduhñ nebiaty hajxy hänajty tøø yhixy tøø miädoy. Hamiñ haxøpy hajxy hänajty jia ñimiäyajtøyyi waambä Jesús hänajty jaduhñ jia mäna'ana'añ coo jaduhñ miänaañ cooc hänajty jiujypiøjtägatsa'añ.

¹¹Mänitä Jesús hajxy miäyajtøoyy:

—Ja'a häna'c hajxy jiiby yajnäihixøobiä maa ja'a tsajtøjcän, jaduhñ hajxy miäna'añ coogä Elías tsipcøxp jawyiin quädä'agät. Mänitägä Cristo høxhaam jiaac tehñ quädä'aga'añ. Tii hajxy jaduhñ coo miäna'añ. Nej, tøyhajt jaduhñä.

¹²⁻¹³Mänitä Jesús yhadsooyy:

—Jaduhñä Diosmädia'agy jiaançh mäna'añ coogä Elías jawyiin quädä'aga'añ. Tøyhajt jaduhñ. Mänitägä cøxiä wiinä yagjema'añ yajtägatsa'añ. Tøø ja'a Elías jia cäda'agy. Pero tøø jaduhñ jiaançh tehñ chaaçhtiüñii nebiatiä jäya'ay jioothajxy chocy. Tøjiajt jaduhñ nebiä Diosquexyhajxy jecy quiujahyyän. Nej, mnajuøøby hajxy jaduhñä waambátyhøçhä Diosmädia'agy xmiädiaacpä, høøçh ja'a Diosquexypä, cooçhä jäya'ayhajxy xhaaçhtiunaambä, møød cooçh hajxy xquia'a jaac hixaannä.

¹⁴Coo ja'a Jesús hajxy jiiby quädäacy maa ja'a jiamioødhajxy hänajty tøø miähmø'øyän, ja'a hajxy hänajty jiiby nädaaxtupä, mänitä Jesús yhiixy coo ja'a jiamioødhajxy hänajty piquiä

tøø piäda'agyii ja'a majiäya'ay. Jimä häna'c hajxy hänajty miøødniyhojyii, ja'a häna'c-hajxy jim yajnäihixøobiä maa ja'a tsajtøjcän. ¹⁵Nägoø ja'a cu'ugä Jesús hajxy jiojcuhiixøøyy, mänit hajxy jiaançh tehñ xioondaacy. Mänitä Jesús jiojcuäyø'ogøøyyä. Mänit yajpoo'xä. ¹⁶Mänitä Jesús miänaañ:

—Tii hajxy mwi'i yajniguiuhøjøoyyap.

¹⁷Mänit tu'jäya'ay yhadsooyy:

—Wiindsøn, chaaçhä nhuung tøø nja møødmech. Møjcu'u jaduhñ miøød. Ja'a møjcu'u wi'i yaghuhmb. ¹⁸Naxy jaduhñ yajcädayyii. Mänit tiägø'øy hahoo'pä. Mänitä tiøøts tiägø'øy yajcädajpä. Mänit møc-häwøønä jiaty. Tøøçhä mjamiøødtøjc nja mänuu'xta'agy cooçh nhuung hajxy cu xyajpa'amnähwaatsä. Pero cab hajxy tøø miäjäda'agy —nømä Jesús ñämaayyä.

¹⁹Mänitä Jesús ja'a jiamioødtøjc ñämaayy:

—iJa'a! Cábøch mijtsä nmädia'agy xñälä mäbøjcä cooçh nDiosquexiä. Tøøçh mijts jecy nja møødwädity, y cahnä hajxy tii mnä'ägädä habøcyñä. Jaançh tehñ yhanaxiä mijts jaduhñ mguhxexä. Nébiøch mijts nnä'túnät. Hoorä, witsminxä ja'a pa'amjäya'ay yaa —nømä Jesús miänaañ.

²⁰Mänitä Jesús miädia'agy quiudiüunäxä. Coo ja'a Jesús yhiixä ja'a møjcu'u, mänitä mähdiøjcä pia'am tiehñ ñämejtsä. Mänitä mähdiøjcä quädäacy naaxwiin. Mänit piayajch piadøø'py. Mänit tiägøøyy hahoo'pä. ²¹Mänitä craa tieedy miäyajtøøwäxä:

—Mánaa hádaa mhuung tøø pia'ambety.

Ja'a Jesús jaduhñ yajtøøw.

—Muutsnä hánajyñä —nòmä craa tieedy yhadsooyy.

²²Mänitä tieedy miánaangumbä:

—Náxyhøch hádaa nhuung jiøøngädaw jiøømbøgø'øy coo pia'am jaduhñ naxy ñähbaadyii. Naxy ñøøgädaw ñøøbøgøøbiä. Ja weenjaty jaduhñ quiaa yagho'ogyii. Tunä mayhajt. Pø jii miich møcmäjaa mmøødä, højts näxúu'tsäc, højts puhbéjtäc —nòmä Jesús ñämaayyä.

²³Mänitä Jesús miánaañ:

—Nej, jadúhñhøch miich xmiøyajtøyyä pø nmøødhøch møcmäjaajä. Pøn jaduhñ mäbøjp, hotyijä jaduhñ yhoýø'owáañäxä.

²⁴Mänitä pa'amjäya'ay tieedy yaaxy:

—Nmäbøjpiøch. Høøch puhbéjtäc, jadúhñhøch maas hoy njaac mäbøgät.

²⁵Jimä jäya'ayhajxy hánajty may wyi'i miamiucy. Coo ja'a Jesús ja'a majiäya'ay jaduhñ yhjxy, mänitä Jesús ja'a møjcu'u ñämaayy:

—Høøch miich nhanehmby coo hádaa craa mhøxmájtñät. Cab jaduhñ mánaa mnämejtstägájtñät. Naxy miich hádaa mähdiojc myaghuumy myajnaty —nòmä møjcu'u yhojjä.

²⁶Mänitä mähdiojc møc yajtsaaçhyaaxä. Mänit jäwiwpø'cy xiäyaayyø'cy. Mänit ñähwaatsä quihwaatsä. Nebiä ho'ogypiän jiajty. Coo jaduhñ yhjxä, mänitä jäya'ayhajxy may miánaañ cooc tyijy hánajty tøø yho'ogy. ²⁷Mänitä Jesús ja'a craa wyidsø'cy. Mänitä craa hoy tiänaayyø'nø.

²⁸Mänitä Jesúshajxy tiøjtägøøyy møødä jiamiøødtøjc. Mänitä Jesús hamee'ch miäyajtøøwä ja'a jiamiøød:

—Tii højts jaduhñ coo tøø nga'a mäjädaacpä.

²⁹Mänitä Jesús yhadsooyy:

—Coo Dios hajxy mjaanç tehñ miänuu'xtá'agät, mänit yø'øduhmbä pa'am hajxy hoy myajnáxät. Pero pø caj, cab hajxy myajnáxät.

³⁰Coo ja'a Jesúshajxy jim chohñ, mänit hajxy ñøcxy Galilea. Cabä Jesús hánajty yajnajuø'owa'añii maa hánajty nøcxy wiädita'añ.

³¹Mänitä Jesús ja'a jiamiøødtøjc tiägøøyy yajwiingapxøøbiä:

—Høøch ja'a Diosquexypä, nøcxáambøch nniñähduga'añii cooçhä jäya'ayhajxy xyaghó'ogät. Y cooç hánajty tøø nho'ogy, cumáaxc-høch hánajty njujypiøjtägatsa'añ —nòmä Jesús miánaañ.

³²Cabä Jesús ja'a jiamiøødhajxy ñä'ägädä wiinjuøøyy waambatiä Jesús hánajty tøø miädia'agy. Cab hajxy hánajty jia nä'a wi'i miäyajtøøwambä. Hix, tsähgøøby hajxy hánajty.

³³Mänit hajxy jim miejch Capernaum maa hajxy hánajty çhána'ayän. Coo hajxy hánajty tøø tiøjtägø'øy, mänitä Jesús ja'a jiamiøødtøjc miäyajtøøyy:

—Tii hajxy hijty mw'i yajcapxiøøby jim tu'haam-miimbä.

³⁴Pero cab hajxy waamb ñä'ägädä hadsooyy. Hix, jue'e hajxy hánajty tøø yajtsibø'øy tu'haam-miimbä, pønä cuhdujt hánajty maas møc møød. Tsähdiuumb hajxy hánajty, paady hajxy quia'a

nä'ägädä hadsooyy. ³⁵Mänitä Jesús yhäñaaguiädaacy, Mänitä jiamiødtøjc nāmaayy, ja'a hajxy hānajtý nāmajmetspā:

—Yam hajxy weeñtiä huuc møjwa'ag. Pøn jaduhñ pøc-juøøby coo møjcuहुdujt miøødhádät, cabä cuहुdujt jaduhñ nā'ägädä møødhada'añ. Moonsä jaduhñ nā'ägä tunaamby.

³⁶Mänitä Jesús pigäna'c-huung tu'ug miøjyaaxy. Mänit piädaacy cujc maa ja'a jiamiøødhajxy hānajtýän. Mänit chehñø'cy. Mänitä jiamiøødtøjc nāmaayy:

³⁷—Pøn hädaa pigäna'c hädaaduhmbä tsojp ja'a høøchcøxpä, jaduhñ mäwíinhøch xchojpä. Jaanä jadúhñhøchä nDeedy hajxy xchójcäbä —nømä Jesús miänaañ.

³⁸Mänitä Juan ja'a Jesús nāmaayy:

—Wiindsón, tøø højts jäya'ay tu'ug nbaady. Jimä pa'amjäya'ay hānajtý yajpa'amnaxy, ja'a hajxy møjcu'umøødpä. Miičhä mxøø hānajtý xquiapxpáatáp. Mänit højts nnāmaayy coo quia'a yajpa'amnájxnät. Paady højts jaduhñ nnāmaayy, coo højts näguipxy xquia'a møødwádíjtäm.

³⁹Mänitä Jesús miänaañ:

—Cábäts hajxy waamb cu mnāmaayy. Pønñhøchä nxøø xquiapxpáatáp coo ja'a hoy-yagjuøøñbä hānajtý yajcähxø'øgy, cábøch jaduhñ xchoj mägapxtägoyya'añ.

⁴⁰Pøn højts jaduhñ xquia'a mädsiphájtäm, je'eds hajxy jaduhñ xmiägu'ughájtäm. ⁴¹Coo mijts pøn xyajnøøhú'ugät je'eguiøxpä cooçh

mijts xpiawädity, høøch ja'a Cristo, jimä hoyhajtä weenhajt piaada'añ Dioswiinduum.

⁴²Pønjátyhøchä nmädia'agy xmiäbójcäp, hoy hajxy quia'a jagä høxpøquiä, coo hajxy jiojcapxø'øwøøjät, ja'a häna'c-hajxy jaduhñ mäjojcapxøøbiä, mejor paandsaa hajxy häxøpy tøø yajyo'xodsø'yii, jaduhñds hajxy häxøpy tøø miejjiäwipø'yii. ⁴³⁻⁴⁴Pø jimä mgø'ø hānajtý xyajcädieey, maas hoy jaduhñ coo mnā'ägädä høxpúxät, jaduhñ tehngajnä xquia'a yajcädiéhñät. Jadúhñäts homiänaajä mjugyhádät nebiä Dios jiugyhatiän, hoyyä mgø'ø hānajtý metsc mga'a jagä møødá. Hix, coo tehngajnä mjaac cädiéeyät, jiiby mhädá'agät haxøøgtuum maa ja'a jøøn mänaa quia'a nā'ägädä pi'ichän, hoyyä mgø'ø hānajtý jia ca'xiä. ⁴⁵⁻⁴⁶Jaanä jaduhñduhmbä, pø jimä mdecy hānajtý xyajcädieey, maas hoy jaduhñ coo mnā'ägädä høxpúxät, jaduhñ tehngajnä xquia'a yajcädiéhñät. Jadúhñäts homiänaajä mjugyhádät nebiä Dios jiugyhatiän, hoyyä mdecy hānajtý metsc mga'a jagä møødá. Hix, coo tehngajnä mjaac cädiéeyät, jiiby mhädá'agät haxøøgtuum, hoyyä mdecy hānajtý jia ca'xiä. ⁴⁷Jaanä jaduhñduhmbä, pø jimä mwiin hānajtý xyajcädieey, maas hoy jaduhñ coo mnā'ägädä yajpádsømät, jaduhñ tehngajnä xquia'a yajcädiéhñät. Jadúhñäts homiänaajä mjugyhádät nebiä Dios jiugyhatiän, hoyyä mwiin hānajtý metsc mga'a jagä møødá. Hix, coo tehngajnä mjaac cädiéeyät, jilby mhädá'agät haxøøgtuum, hoyyä

mwiin hänajty jia ca'xiä. ⁴⁸Jiiby haxøøgtuum, cabä tøonghajxy jiiby mänaa ñä'ägä ho'ogy, møød cabä jøøn jiiby mänaa ñä'ägä pi'tspä.

⁴⁹Pøn jiiby hijp haxøøgtuum, cab hajxy jaduhñ jiiby mänaa quiøxy toya'añ. Jaduhñ mäwíinäts je'e nebiä tsu'u'ch caanø'oybän, cabä jøøn jaduhñ jiiby mänaa pyi'ich.

⁵⁰Ja'a caan, tuungpaatp je'e. Pero coo ja'a tiaamdspä quióxät, cab jaduhñ mänaa tiuungpáatnät. Jaduhñ mäwíinäts mijtpä, hoy yajxón hajxy mnimiøødhidøøjät. Cab hajxy jaduhñ mänaa myajniguiudsip myajniguiuma'adø'owøøjät.

10 Mänitä Jesús jim chónhgumbä Capernaum.

Mänit ñøcxy Judea-naaxooty, ja'a xøøbädsømyhaampiä, jim Jordán-møjnøøhawiimb. Mänitä jäya'ay may ñäméjtsägumbä.

Mänitä Jesús tiägøøguiumbä yajnähihöøbiä, neby hänajty naxxy yajnähihöøyhatiän. ²Mänitä fariseodøjc-hajxy näje'e miehch.

Mänitä Jesús hajxy miäyajtøoyy: —Nej, miimbä cuhdujt jaduhñä coo jäya'ayhajxy ñiyhöøxmadsoøjädä.

Paadiä Jesús jaduhñ miäyajtøowä, hijxmadsaanäp hänajty jaduhñ waamb hänajty yhadsowa'añ.

³Mänitä Jesús yajtøødagajch:

—Nej, jaduhñä Moisés jecy quiujahyyä coo hajxy mniyhøøxmadsoøjädä.

⁴Mänitä fariseoshajxy yhadsooyy: —Jaduhñä Moisés jecy quiujahy coogä cuhdujt jaduhñ myiñ coo jäya'ayhajxy ñiyhöøxmadsoøjät.

⁵Mänitä Jesús miänäänhgumbä: —Coo mijts mjaançh tehñ quiuhxexä, paadiä Moisés ja'a

cuhdujt jaduhñ jecy jecy coo mdo'oxiøjc hajxy mhøøxmädsät.

⁶Mänaa ja'a naaxwiimbä jecy yhawijy tiøø'xta'aguiän, mänitä Dios jäya'ay metsc quiunuu'xy ya'adio'oxy. ⁷⁻⁸Coo ja'a Dios ja'a jäya'ay jaduhñ jecy quiunuu'xy ya'adio'oxy, paadiä ya'adiøjc jaduhñ tio'oxiøjwiingpøögät. Jaduhñ hajxy jaduhñ yhiñnät nebiä tu'que'expän. Hawiingøøby hajxy jaduhñ. Cab hajxy wioowhiñtänä ja'a tiaj ja'a tiédiäm. ⁹Pønjetiä Dios jaduhñ tøø quiunuu'xy coo hajxy ñimiøødtsäna'awøød nämetsc, cab hajxy jaduhñ ñiyhöøxmadsoøjät —nømä Jesús miänaañ.

¹⁰Mänitä Jesús hajxy tiøjtägøoyy møødä jiamiøødtøjc. Mänitä Jesús jadähooç miäyajtøowä ja'a jiamiøød waambatiä Jesús ja'a fariseodøjc hänajty tøø miøødmädia'agy.

¹¹Mänitä Jesús yhadsooyy:

—Pønä tio'oxiøjc höøxmajtsp, y mänitä wiingto'oxiøjc wyiingpøcy, miägädiehbiä tio'oxiøjc jaduhñ. Haxøøg jaduhñ jiatcø'oy. ¹²Jaaná jaduhñduhmbä, coo ja'a to'oxiøjc ñihyhap yhöøxmädsät, y coo wiingya'adiøjc wyiingpøögät, jaduhñä ñihyhap miägädiehbiä. Jaaná haxøøg je'eduhñ jiatcøøbiä —nømä Jesús miänaañ.

¹³Mänitä Jesús pigäna'c mejtstägøøg yajnämjejtsä, coo hajxy ween quiunuu'xyii. Coo ja'a Jesús jiamiøød hajxy jaduhñ yhiixy cooc tyijy ja'a Jesús hänajty yhadsiba'añii, mänitä pigäna'cä tiajhajxy yhadújcäxä coo ja'a Jesús hajxy jaduhñ quia'a nänøcät.

¹⁴Coo ja'a Jesús jaduhñ yhiixy coo ja'a pigäna'c-hajxy hänajty

wyi'i yhadugyii, mänitä Jesús ja'a jiamiøød yhojy:

—Ca'a yø'ø pigäna'c hajxy mwii' yhaducy. Wéenhøch hajxy jaduhñ xñämiñ. Coö mijtsä Diosmädia'agy jaduhñ mmäbøgät neby hädaa pigäna'c-hajxy miäbøquiän, mänit mijtsä Dios jaduhñ xyhuunghädät. ¹⁵Hix, ja'a pigäna'c-hajxy, cab hajxy tii quia'a nä'a mäbøcy. Tsipcøxp hajxy jaduhñ ñä'ägä mäbøcy. Jaduhñds je'e, coö mijtsä mmäbøgät nebiä pigäna'c-hajxy miäbøquiän, mänit hajxy jaduhñ mjygyhädät cøjxta'axiøø nebiä Dios jiygyhatiän. Tøyhajt jaduhñ —nømä Jesús miänaañ.

¹⁶Mänitä Jesús ja'a pigäna'c tiägøøyy cunuuxpä tu'ugjaty-tu'ugjaty. Cø'ønähgäjpäp hajxy hänajty.

¹⁷Mänitä Jesús jim chohñ. Jim hänajty tiu'uyo'oyñä, mänitä Jesús jäya'ay tu'ug päyø'øguiä ñajtspaadøøyyä. Mänit wyiinjiçädaacä. Mänit ñämaayyä: —Wiindsøn, mjaanç tehñ yhoyhäna'c miich. Nébiøch ngudiünät coöch cøjxta'axiøø njygyhädät nebiä Dios jiygyhatiän —nømä Jesús miäyajtøwä.

¹⁸Mänitä Jesús yhadsooyy: —Tiiç miich jaduhñ coö xñäma'ay coöch nhoyhäna'cä. Ni pøn jaduhñ quia'a hoyhäna'cä. Jagooyyä Dios tu'uquiä yhoyhäna'cä. ¹⁹Mnajuøøby miich jaduhñ nebiatiä Moisés cuhdujt jecy yecy, túhmäts. “Cab hajxy mnnyagho'ogøøjät. Cabä wiingto'oxiøjc hajxy mmøødtsänä'awät. Cab hajxy mméedsät. Cab hajxy mhøhñdá'agät.

Cab hajxy mmäméedsät høhnda'agymiädia'agyhaam. Mwiingudsähgø'øwäbä mdajjämdeedy hajxy” —nømä Jesús miänaañ.

²⁰Mänitä Jesús ñämäayyägumbä: —Pero Wiindsøn, homiänääjøch jaduhñ ngudiüñ. Múutsnøçhä hoguiuhdujt nmädsøhndaacy —nømä Jesús ñämaayyä.

²¹Mänitä Jesús ja'a craa wyiinhee'ppejty. Jiaanç tehñ chøjcäbä craa hänajty je'e. Mänitä Jesús miänaañ:

—Tu'tu'uyyä mga'a cøxy cudiüñ. Nøcx cøxy toog tijaty jim mmøød, jaduhñds mmó'owät pønjaty hajxy häyoob. Coö jaduhñ mgudiünät, mänit jim mnøcxät Dioswiinduum. Jim miichä hoybä weenbä mbäädät tsajpootyp. Hoorä, høøch padu'ubøjcäc.

²²Coö ja'a craa jaduhñ ñämaayyä, mänit jiootmadiägøøyy. Mänit wyiimbijnä tájjäp máayyäp. Hix, jaanç tehñ miäyøø hänajty je'e.

²³Jimä Jesús ja'a jiamiøødhajxy hänajty piädäna'ay. Mänitä Jesús wyiinhee'ppejty. Mänit miänaañ: —Jaanç tehñ chip jaduhñ coö yø'ø mäyøødøjc-hajxy jim ñøcxät Dioswiinduum. Tehñ tiøyhajt jaduhñ.

²⁴Coö ja'a Jesús jaduhñ miänaañ, jiaanç tehñ yagjuøøyy ja'a jiamiøødhajxy jaduhñ. Mänitä Jesús miänäängumbä:

—Mägu'ughajpädøjc, pønjatiä xiädø'øn hajxy hajoodhajp, jaanç tehñ chip jaduhñ coö hajxy jim ñøcxät Dioswiinduum. ²⁵Maas paquiä camello tu'ug jiiby ñaxø'øwät xuhñdyjutooty

quejee ja'a mäyøøhäna'c-hajxy jim tiägø'øwät Dioswiinduum.

²⁶Coo ja'a Jesús jaduñ miänáangumbä, mänitä jiamiøødhajxy maas hanaxiä yagjuøøguiumbä. Mänitä Jesús miäyajtøwä:

—Pønxada'aduhñ jaančh tøy nähwa'adsaamb.

²⁷Mänitä Jesús wyiinhee'ppéjcumbä. Mänit miänaañ:

—Ja'a jäya'ayhajxy, cab hajxy hamdsoojoot hoy yajniñähwa'adsøøjät. Pero Dios, je'eds mäyajnähwaatp. Hotyijä Dios jaduñ jiaty.

²⁸Mänitä Pedro ja'a Jesús ñämaayy:

—Huuc mäadow, coo højts miich nbadu'ubøjcy, cøjx højts nnähgue'egy tijaty højts hijty nmøød.

²⁹⁻³⁰Mänitä Jesús yhadsooyy:

—Pønjaty cøxiä tøø ñähgue'egy ja'a høøchcøxpä møødä Diosmädia'agyquiøxpä, maas may hajxy jaduñ jiaac paada'añ hädaa yaabä naaxwiin tijaty hajxy hänajty tøø ñähgue'egy tøø yhøxy'ooy, tiøjc, piuhya'ay, piuhdo'oxy, tiaj tieedy, yhuung, ñaax. Møød jim hajxy ñøcxa'añ tsajpootyp. Jim hajxy jaduñ homiänaajä yhida'añ, hoy hajxy hänajty yaa tøø jia tsaächpøcy ja'a høøchcøxpä hädaa yaabä naaxwiin. Tøyhajt jaduñ. ³¹Pønjatia möjtuung jäda'ahaty ca'a møød, nämay hajxy miøjtägø'øwa'añ. Pero pønjatia möjtuung jäda'ahaty ja møød, nämayyä tiuunghajxy piøgáanáxä —nømä Jesús miänaañ.

³²Mänitä Jesús hajxy jim tiu'ubøjcy møødä jiamiøødtøjc. Jerusalén hajxy hänajty ñøcxa'añ. Jawyiinä Jesús hänajty yo'oy. Mayyä jäya'ayhajxy hänajty pianøcxy møødä Jesús jiamiøødhajxy, ja'a hajxy hänajty nämajmetspä. Jaančh tehñ yagjuøøby hajxy hänajty. Høxtä tsähgøøby hajxy hänajty. Mänitä Jesús ja'a jiamiøød hawiing wioonøcxy. Mänitä Jesús tiägøøyy mädiaacpä nebiaty hänajty jiada'añ yhabeta'añ:

³³—Huuc mäadow hajxy, yam hajxy nnøcxäm Jerusalén. Coo hajxy jim ngoodáanam, mänitøchä teedywiindsøn hajxy xyajcø'ødägø'øwa'añ, møødä häna'cä Diosmädia'agy hajxy jim yajnähiøøbiä tsajtøgooty, høøch ja'a Diosquexypä. Mänitøch hajxy jaduñ xyajnähdija'añ cooçh hajxy xyagho'oga'añ. Mänitøch hajxy xyajcø'ødägø'øwa'añ ja'a häna'c-hajxy jim tsohmä Roma. ³⁴Madiú'ujøch hajxy xhaačhtiuna'añ. Xñäxi'igáambøch hajxy. Xwyiinwoonáambøch hajxy. Xwyiingutsujø'owáambøch hajxy. Xwiobho'ogáambøch hajxy. Mänitøch hajxy xjia yagho'oga'añ. Pero cudägøøgxøøyyøch njujypiøjtägatsa'añ, —nømä Jesús miänaañ.

³⁵Mänitä Jesús wyiinguwa'agøøyyä ja'a Santiago møødä Juan. Ja'a Zebedeo yhuunghajxy hänajty je'e. Mänit hajxy miänaañ:

—Wiindsøn, huuc tunä mayhajt ja'a højtsøxpä.

³⁶Mänitä Jesús yhadsooyy:

—Tii mayhájt̃høch ndúnäp.

³⁷Mänitä Santiagohajxy miänáangumbä:

—Coo miich hánajty tøø mmøjtägø'øy, coo hánajty tøø mdägø'øy hanehmbä, mänit højts cuhdujt xmió'owät coo højts jim nhäñá'awät miichä mnähmøjc, hahooyhaampiä møød hanajtyhaampiä.

³⁸Mänitä Jesús yhadsóogumbä:

—Mijts, cab hajxy mnajuø'øy tii hajxy jaduhñ mnänøømby. Nej, mmee'xtúgäp hajxy jaduhmbä nébiøch ndsaächpøgá'añänä.

³⁹Mänitä Santiagohajxy yhadsooyy:

—Nmee'xtúgäp højts jaduhñ.

Mänitä Jesús miänáangumbä:

—Jaduhñ mijts mjaançh tsaächpøgaambä nébiøch ndsaächpøga'añän. Tøyhajt jaduhñ. ⁴⁰Pero cábøchä cuhdujt jaduhñ nmøødä coo mijtsä cuhdujt nmó'owät coo hajxy jim mhäñá'awät høøchä nnähmøjc mänájøch hánajty tøø ndägø'øyän hanehmbä. Dios ja'a cuhdujt møød pøn yajnähdiijaamby coo hajxy jim yhäñá'awät. Je'edshajxy jaduhñ jim häña'awaamb —nømä Jesús miänaañ.

⁴¹Coo Jaha Jesús jiamiøødhajxy jaduhñ miädooyy, ja'a hajxy hánajty jaac nämajcpä, mänitä Santiagohajxy miäjootma'tä møødä Juan. ⁴²Mänitä Jesús miøjyaaxy ja'a hajxy hánajty jaac nämajcpä. Mänitä Jesús miänaañ:

—Ja'a gobiernähajxy, møødä häna'c-hajxy yaa møjtjuungmøødpä hädaa yaabä naaxwiin, ja'a hänä'cätshajxy jaduhñ yaa

hanehmb. Mnajuøøby hajxy jaduhñ, túhmäts. ⁴³⁻⁴⁴Pero mijts, cab hajxy mbøc-juø'owät coo møjtjuunng hajxy mmøødhädät. Pønä jioot tsojp coo wyiingudsähgø'owøøjät, weenä jioot piäda'agy coo jiamiøød piuhbédät. ⁴⁵Høøchpaady, høøch ja'a Diosquexypä, mäbuhbéjpoç jaduhñ yaa tøø ngäda'agy. Høxtä nnähho'tu'udáambiøchä jäya'ayhajxy nägøxiä. Cáboch jaduhñ nmäna'añ cooçhä jäya'ayhajxy xpiuhbédät.

⁴⁶Mänitä Jesús hajxy quioo'ty maa ja'a cajpt hánajty xiøhatiän Jericó. Coo hajxy jim chóhngumbä, mayyä jäya'ay hajxy piadu'ubøjcä. Jimä wiinds hánajty tu'ug yhäña'ay tu'haam. Bartimeo hánajty xiøhaty. Timeo ja'a tieedy hánajty xiøhaty. Xädø'ønyujwaambä Bartimeo hánajty. ⁴⁷Coo ja'a Bartimeo jaduhñ miädooyy coo hánajty je'le Jiesúsä, ja'a hánajty tsohm̃bä Nazaret, mänitä Bartimeo møc yaaxy:

—Jesús, David miich jecy mhaphajt mdeedyhajt. Høøch näxúutsäc.

⁴⁸Mänitä Bartimeo yhojmujcä nämay coo cu yhamooñ. Pero cab jaduhñ nã'ä hamooñ. Tehngajnä maas møc tiägøøyy yaaxpä:

—Jesús, miichä David jecy mhaphajt mdeedyhajt. Høøch näxúutsäc.

⁴⁹Mänitä Jesús tiänaaxiøjpy. Mänit miänaañ coo ja'a Bartimeo miøjya'axøøjät. Mänitä Bartimeo tu'jäya'ay nãmaayyä:

—Xoonda'ag, tänaayyø'øg. Ximä Jesús xmiøjya'axy.

⁵⁰Mänitä Bartimeo paquiä tiänaayyø'cy. Mänitä yoñwit

yajniñähnaajtuutä. Mäniä Jesús päyø'oguiä hoy wyiingumedso'oy.

⁵¹Mäniä Jesús ja'a Bartimeo miäyajtøoy:

—Tii mayhajt jaduñ myajtunáanäp.

Mäniä Bartimeo yhadsooy:

—Wiindsón, høøch yaghjxø'cäc.

⁵²Mäniä Jesús miánaañ:

—Ja'a hoy, tisän coo quia'a cabä.

Coochä nmädia'agy tøø xmiäbøjcä, paady tøø mhjxø'nø.

Tuunä Jesús jaduñ ñä'ä mänaañ, mäniä Bartimeo jiaanč hijxø'cy.

Mäniä Jesús piadu'ubøjnä.

11 Jimä Jesúshajxy hänajty quioodaannä maa ja'a cajpt hänajty xiøhatiän Betfagé møød Betania, jimädøyyä maa ja'a tun hänajty xiøhatiän Olivos. Jim hänajty miäwiingón Jerusalén. Mäniä Jesús ja'a jiamiøød metsc ²ñämaayy:

—Nøcx hajxy jimhaamby maa yø'ø cajpthuungän. Coo hajxy jim mmedsa'añ, jimä burro hajxy tu'ug mbaada'añ cuxoch. Cahnä põñ yajpejmachñä. Mmägüejø'owäp hajxy. Jaduhnds hajxy yaa mwitsmínät. ³Y põ jimä jäya'ay hajxy xmiäyajtøy tii hajxy jaduñ coo mmägüejø'oy, mäniä hajxy mnämä'awät: “Ja'a nwiindsón højts cham yajmaajiajp. Paquia højts nnä'ä yajtuna'añ. Mäniä højts min nnaajtswidso'oy.” Jaduhñ hajxy mmäná'anät —nømä Jesús ñajtscajxøoyy.

⁴⁻⁵Mäniä burro hajxy hoy jiaanč paady cuxoch jim mõjtu'haam, jim tõjnähmøjc mädoyyä. Jimä jäya'ayhajxy hänajty näje'e tiäna'ay. Coo ja'a Jesús jiamiøødhajxy

tiägøoy burromägüejøøbiä, mäniä hajxy ñämaayyä:

—Tii yø'ø burro hajxy jaduñ coo mmägüejø'oy.

⁶Mäniä hajxy jaduñ yhadsooy waambaty hajxy hänajty tøø

yhane'emyii coo hajxy jaduñ

yhadsówät. ⁷Mäniä Jesús ja'a

burro yajnaméjtsäxä. Mäniä

jiamiøødä wyit hajxy jim

piädaacy burronähgøxp. Mäniä

Jesús jim piejty. ⁸Jaanch tehñ

miayyä jäya'ayhajxy hänajty

pianøcxy. Mäniä wyit hajxy

näje'e chijy. Jaduhnds hajxy

tu'haam ñajtsye'ebøoyy maa

ja'a Jesús hänajty burronähgøxp

ñaxø'owa'añän. Näje'e hujtsaay

hajxy hänajty piujxpä. Jim hajxy

hänajty piädaacpä tu'haam.

⁹Cu'ughagujcä Jesús hänajty ñøcxy.

Mäniä cu'ughajxy nägøxiä tiägøoyy

yaaxpä jojpä:

—iViva Jesús, viva! iGloria

a Dios! Diosquey hädaa

Jesús jaduñ. ¹⁰iGloria a Dios

tsajpootypä! Jaduhñ hädaa Jesús

yhane'emaambä nebiä David

jecy yhanehmiän, ja'a hajxy jecy

nhaphajt ndeedyhájtäm.

¹¹Mäniä Jesúshajxy jim quioo'nä

Jerusalén, møødä jiamiøød ja'a

nämajmetspähajxy. Mäniä hajxy jim

ñøcxøoyy maa ja'a tsajtøjcän. Coo

hajxy jiiby chajtøjtägøoyy, mäniä

hajxy yhjxwädijty tijaty hänajty

jiiby. Mäniä hajxy wyiimbjçumbä.

Mäniä hajxy jiiby yhadáaccumbä

Betania. Hix, tøø hänajty chuujø'oy,

y jiiby hajxy hänajty miejtsta'aga'añ

Betania.

¹²Cujaboom, mäniä Jesúshajxy

jim tiu'ubøjçumbä. Mäniä Jesús

yäho'pøjcä. ¹³Mänitä piids tu'ug ñäheebøøyy coo hänajty jim tiäna'ay picumnä. Coö wiingón ñämejch, mänit yhiixy coo tiøøm hänajty quia'a nä'ägädä hity. Haagä haay hänajty je'e. Cahnä yhiil'ts hänajty yhabaadyñä mänaabä hänajty naxy tiøømbetiän. ¹⁴Mänitä Jesús piids ñämaayy:

—Ni mänaa miich mga'a tømbejtägatsaannä.

Coo ja'a Jesús jaduhñ miänaañ, miädoow ja'a jiamioødhajxy jaduhñ.

¹⁵Coo ja'a Jesús hajxy jim miejstägajch Jerusalén, mänitä Jesús jiiby chajtøjtägøøguiumbä. Mänitä Jesús ja'a too'pädøjc juubiädøjc tiägøøyy høxpäboobiädsøømbä jiiby tsajtøgooty. Mänitä meexä tiägøøyy høxjuijpä maa xädø'øñ hajxy hänajty quiuwichän, møødä häñaabiejt maa hajxy hänajty yhäña'ayän coo hajxy hänajty pialomatoogy. ¹⁶Mänitä Jesús tiägøøyy hadujpä coo ja'a jäya'ayä tiogy hajxy jiiby quia'a mädagøøñät tsajtøgooty. ¹⁷Mänitä Jesús tiägøøyy yajwiingapxøøbiä:

—Jaduhñ jim myiñ cujaay maa ja'a Diosmädia'aguian: “Pa'yaaxtäacthøchä ndøjc hajxy nägøxiä xwiäänät, ja'a jäya'ayhajxy wiinduhmyhagajtpä.” Jaduhñä Dios jecy miänaañ. Pero mijts, wiing mijtsä tsajtøjc mwa'añ. Jaduhñ hajxy mwa'añ nebiä mee'tstaactän —nømä Jesús miänaañ.

¹⁸Coo ja'a teedywiindsøn hajxy jaduhñ miädooyy, møødä häna'cä Diosmädia'agy hajxy hänajty jiiby yajnahixøøbiä tsajtøgooty, mänit

hajxy tiägøøyy cojyquiapxytiumbä nebiä Jesús hajxy yaghó'ogät. Hix, chähgøøbiä Jesús hajxy hänajty je'eguiøxpä coo ja'a Jesús ja'a miädia'agy hänajty jiaanč tehñ yhamädoowhijtäxä ja'a cu'ug.

¹⁹Pero coo quioodsøøñä, mänitä Jesús hajxy jiiby yhadáaccumbä Betania.

²⁰Cujaboomä Jesús hajxy ñøcxtägajch Jerusalén. Coö hajxy jim ñaxøøguiumbä maa ja'a Jesús ja'a piids hänajty tøø ñäbogø'øyän, mänitä piids hajxy yhiixy coo hänajty tøø quiøxy tø'øch. ²¹Coo ja'a Pedro jaduhñ jiahmiejtstaacy, mänitä Jesús ñämaayyä:

—Wiindsøn, huug hix yø'ø piids. Häxøoy miich yø'ø mnäbogøøyy coo ni mänaa quia'a tømähjñät. Tøø yø'ø quiøxy tøøtsnä —nømä Pedro miänaañ.

²²Mänitä Jesús yhadsooyy: —Mäbøjcä ja'a Dios miädia'agy coo jiaanč tehñ tiømiädia'aguia.

²³Coo hajxy hamuumdu'joot mmäbøgät, høxtä yø'ø tun ja'a mmädia'agyhajxy xquiudiüunäp coo hajxy mnämä'awät coo ween nøcxy miejyquia'awø'øy. Mänitä mmädia'agyhajxy jaduhñ xquiudiüunät coo ja'a Dios ja'a miädia'agy hajxy hamuumdu'joot mmäbøjcät coo tiømiädia'aguia. Tøyhajt jaduhñ. ²⁴Coo mijtsä Dios tijaty mmäyujwá'anät, xmió'owäp hajxy jaduhñ, coo ja'a miädia'agy hajxy hamuumdu'joot mmäbøjcät coo tiømiädia'aguia. ²⁵Coo mijtsä Dios hänajty mba'ya'axa'añ, tsipcøxpä häna'c hajxy jayøjp mmämée'xät, ja'a mijts hänajty tøø xñägädieeyø'øyäbä, jaduhñä

Dios hajxy jaduhñ xmiämée'xpät tijaty hajxy hänäjty mgädieeyhajpy. ²⁶Pero pø cab hajxy mmämee'xa'añ, ni mijtsä mDeedy tsajpootypä xquia'a mämeel'xtägatsa'añ —nømä Jesús miänaañ.

²⁷Coo ja'a Jesúshajxy jim quioo'tägajch Jerusalén, mänitä Jesús jadähooç tiägøøyy tsajtøgooty. Jiibiä Jesús hänäjty wiädity, mänit ñámejtsä ja'a teedywiindsøn, møødä häna'c-hajxy jiiby yajñähixøøbiä tsajtøgooty, møødä majjäya'adiøjc. ²⁸Mänitä Jesús hajxy miäyajtøøyy:

—Pøn miich cuhdujt tøø xmio'oy coo miich häxøøyy yaa tsajtøgooty tøø mdsiptuñ.

²⁹⁻³⁰Mänitä Jesús yhadsooyy: —Nhadsóowäbøch häyaa jaduhñ cooçh mijts häyaa jayøjp xyhadsóowät. Pønä Juan mäyajnäbejpä quejx, Diosä tøgä jäya'ayä. Hadsóowägøch hajxy. Cooçh hajxy häyaa xyhadsóowät, mänitøch mijts häyaa nhadsóodägájtspät —nømä Jesús miänaañ.

³¹Cabä teedywiindsøn hajxy hänäjty ñajuø'øy waambä Jesús hajxy yhadsóowät. Mänit hajxy tiägøøyy niñamáayyabä: “Coo hajxy häyaa nmänáañämät coo ja'a Dios ja'a Juan quiejxy, jaduhñ jadähooç xyhadsóowáañäm: Aa, pø tøyhajt jaduhñ coo ja'a Dios ja'a Juan jiaançh quejxy, tii ja'a Juan miädia'agy hajxy coo tøø mga'a mäbøjcä. ³²Y coo hajxy häyaa nmänáañämät coo ja'a Dios ja'a Juan quia'a quejxy, mänitä cu'ug hajxy häyaa xmiädsibøøyyämät.” Hix, jaduhñä cu'ughajxy hänäjty

miäna'añ coogä Juan hänäjty Dyiosquexiä. ³³Mänitä Jesús hajxy ñämaayy coo hajxy hänäjty quia'a najuø'øy. Mänitä Jesús yhadsooyy: —Pues, ni høøch jaduhñ nga'a nägapxaambä pøn'høchä cuhdujt tøø xmio'oy.

12 Mänitä Jesús tiägøøyy yajñähixøøbiä cuentäyajmäbaadyhaam: —Mänitä jäya'ay tsaatypcam tu'ug piädaacy. Mänit jiuhguraajøøyy. Mänitä tsaatyñøøxee'xøhñdy ñädajøøyy. Mänitä nähbettøjc tu'ug yhädiuuñ coo hajxy jim yhäñá'awät coo ja'a tsaatypcam hajxy hänäjty cwieendähada'añ. Mänitä wiingjäya'ay ja'a tsaatypcam hajxy yajcø'ødägøøyyäxä coo hajxy cøguipxyjiaty cwieendähädät. Mänitä cudsatyp jäguemnaax ñøcxy. ²Coo ja'a tsaatypcuc yhabaaty, mänitä cudsatyp ja'a mioonsä quiejxy coo hajxy cøgujjiä ween yajwa'xy. ³Coo ja'a craa jim miejch, mänit hoyhoy quioxho'cä. Mänit piäboowyiimbijtä cø'øwa'ads. ⁴Mänitä cudsatyp ja'a mioonsä mäwiingpä jia quéjxcumbä. Maas hanaxiä craa je'le wiobhø'cäbä. Høxtä yajtsäbjtixä ja'a quiope jaduhñ. Hoyhoy jaduhñ chaächtiuuñä. ⁵Mänitä cudsatyp ja'a mioonsä mäwiingpä jia quéjxcumbä. Mänit hajxy je'le yagho'cy. Maas mayyä mioonsä jia jaac tehñ quiejxy. Näje'le hajxy wiobho'cä; näje'le hajxy yagho'cä. ⁶Jimä cudsatyp ja'a yhuung hänäjty tu'ug. Jiaançh tehñ chojpiä yhuung hänäjty. Mänit ñämaayy: “Nhuuc quéxyhøch miich jim. Wehndä miich hajxy

häyaa xñä'a wiingudsähgö'owät.”

⁷ Coo ja'a cudsaatyp yhuung jim miejch, mänit hajxy tiägöøyy niñamáayyabä, ja'a tsaatypcam hajxy hänajty tøø miämähmø'oyäbä: “Coo hädaa craa tieedy häyaa ñä'a hó'ogät, hädaa craa jaduñ cøxiä mämähmø'owaamb mäduhñtiä hädaa tsaatypcam. Tsøc hädaa craa hajxy jaduñ nä'ägä yaghó'cäm, jaduñ højts hädaa tsaatypcam nje'ehájtämät.” ⁸ Mänitä cudsaatyp yhuung miájtsäxä. Mänit yaghó'cä. Mänit hajxy hoy yhøxchømy jäguemjuøøby.

⁹ Haa, nebiä cudsaatypäda'a hänajty jiatcø'owa'añ. Nøcxaambäda'a hajxy yaghó'tägatsa'añii, ja'a hajxy hänajty tøø miäyaghó'oguiäbä. Mänitä wiinghäna'cä tsaatypcam hajxy hänajty jajcø'ødägø'owa'añii.

¹⁰ Jaduñ jim myiñ cujaay maa ja'a Diosmädia'aguiän:

Ja'a tsaä mädyii ja'a tøjmuu'tspädøjc-hajxy quia'a nä'ägä cumaayy, je'e nä'ägä tuundsoñ maa ja'a tøjteecän.

¹¹ Ja'a Dios jaduñ mänaañ coo ja'a tsaä jaduñ jim tiuundsóonät.

Paady hajxy jaduñ jaanč tehñ jajxón nhíjxäm

—nømä Jesús miädiaacy.

¹² Ja'a teedywiindsøn'hajxy, ñajuøøby hajxy hänajty jaduñ coo hajxy hänajty tøø yajmäbaadyii nebiä cahwiindøyhäna'cän, ja'a hajxy hänajty tsaatypcueendähajpä. Coo hajxy jaduñ ñajuøøyy, paadiä Jesús hajxy hänajty jia wi'i

miadsa'añ. Pero cab hajxy jaduñ ñä'a majch, je'eguiøxpä coo ja'a cu'ug hajxy hänajty chähgø'øyy. Mänitä Jesús hajxy ñähgüecnä. Mänit hajxy wyiimbijnä.

¹³ Mänitä fariseoshajxy näje'e wyiinguejxä, møødä Herodes quiu'ughajxy näje'ebä, coo ja'a Jesús hajxy yajcapxtägóyyät, jaduñ hajxy hoy ñäxø'owø'owät. ¹⁴ Mänitä Jesús ñámejtsä. Mänit ñämaayyä:

—Nñajuøøby højts coo miich tøy mjaanč tehñ miädia'agy. Caj miich jaduñ mnä'ägä mõjpäda'agy waambatiä cu'ug xjia näma'ay. Tu'cuhdujt miichä jäya'ay mhixy, pønjaty hajxy mäyøø, pønjaty hajxy häyooob. Tøyhajt højts miich xyajnähixø'øyy coo højts hoy njäya'ayhädät nebiä Dios choquiän. Hoorä, coo højtsä gobiernä Rómabä hänajty xyajnähuudiu'uda'añ, nej, hahixøøby jaduñ coo højts nnähjuudiú'udädä —nømä Jesús miäyajtøwä.

¹⁵ Mänitä Jesús yhadsooyy:

—Tiič hajxy jaduñ coo xjia wi'i yajcapxtägoyya'añ. Høøchä xädø'øñ tu'ug huuc yaghíjxäc.

Paadiä Jesús jaduñ miänaañ, ñajuøøby hänajty jaduñ coo hänajty jia wi'i yajcapxtägoyya'añii.

¹⁶ Mänitä Jesús xädø'øñ jiaanč yaghijxä. Mänit miänaañ:

—Pøn wyiin jiojy yø'øduñ. Pøn xiøø yø'øduñ jim miimb.

Mänit hajxy yhadsooyy:

—Ja'a gobiernä wyiin jiojy yø'ø, ja'a jim tuumbä Roma. Jaaya'ay xiøø yø'øbä.

¹⁷ Mänitä Jesús miänáangumbä:

—Tøyhajt jaduñ. Mo'owxä ja'a gobiernä hajxy pø je'e jie'e yø'ø.

Pero mädyii ja'a Dios jie'e, mo'ow hajxy je'ebä.

Coo ja'a Jesús jaduhñ yhadsooyy, jaanč tehñ yagjuøoyy ja'a fariseoshajxy jaduhñ.

¹⁸Mänitä Jesús ja'a saduceos näje'e nämejtsä. Cabä saduceoshajxy hänajty miäböcy coogä ho'ogyjiäya'ayhajxy hänajty jiuypiojtägatsa'añ. Jaduhñä saduceoshajxy hänajty miäna'añ cooc tyijy ja'a ho'ogyjiäya'ayhajxy quia'a juypiojtägatsa'añ. ¹⁹Mänitä saduceos ja'a Jesús hajxy ñämaayy:

—Wiindsón, jaduhñä Moisés jecy quiujahy neby højts nguhdujthájtämät, højts judíojäya'ayhájtäm. Hoorä, coogä ya'adiøjc tu'ug yho'ogät, coog hänajty piøquia, pø cáhnäg hajxy hänajty yhuungpaadyña, pø jímägä piuhya'ay, wéenägä piuhya'ay ja'a yaamgto'oxy wyiingpøcy, jadúhñäc hajxy jaduhñ yhuungpáadät. Jadúhñäc quiähxó'ogät coog hänajty je'e yhuungä, ja'a hänajty tøø yho'oguiäbä. ²⁰Hoorä, jii jäya'ayhajxy hänajty näjuxtujya'ay, haagä tu'que'ex. Mänitä tehñ quiobhuung tio'oxiojwiingpøjcy. Cab jecy miøødsánaayy, mänitä craa yho'cy. Cabä huung hajxy ñä'a paaty. ²¹Mänitä jiodsomy ja'a yaamgto'oxy wyiingpøjcy. Ni je'ehajxy quia'a huungpaatpä. Mänitä craa yho'pä. Jaduhñä jiodsomy je'ebä jia wiingpøjcumbä. Jaanä jaduhyyä je'e jiajpä nebiä yhajchhajxy jiajtiän. ²²Jaduhñ hajxy näjuxtujc jia møødsánaayy, ni pøn je'e quia'a yaghuungpaaty. Nägøxiä hajxy jaduhñ yho'cy. Høxtä ja'a to'oxiojç, jaac tehñ

yho'c je'ebä. ²³Bueno, coo ja'a ho'ogyjiäya'ayhajxy hänajty nägøxiä jiuypiojtägatsa'añ, pønda'a je'e tehñ tiøybä møødsána'awaamb, ja'a hajxy hänajty näjuxtujcpä. Hix, näjuxtujc hajxy hänajty tøø jia møødsána'ay. Paady højtsä tøyhajt ndsocy — nømä Jesús ñämaayyä.

²⁴Mänitä Jesús yhadsooyy: —Caj mijtsä tøyhajt hajxy mnä'ägä møødä, je'eguiøxpä coo ja'a Diosmädia'agy hajxy mga'a nä'ägädä wiinjuøoy. Møød cab hajxy mnajuøobiä nebiatiä Dios ja'a miøcmäjaa yajcähxø'ogy. ²⁵Coo ja'a ho'ogyjiäya'ayhajxy hänajty jiuypiojtägatsa'añ, cab hajxy mänit piøga'añ, cab hajxy mänit yhu'uga'añ. Jaduhñ hajxy yhida'añ nebiä Diosmoonsähajxy jim yhitiän tsajpootyp. ²⁶Tii mijts coo mga'a mäbøga'añ coo ja'a ho'ogyjiäya'ayhajxy jiuypiojtägatsa'añ. Jaduhñä Moisés jecy quiujahy coogä Dios tähooc miøødnibiaatä jim pactuum maagä hujts haptymøødpä hänajty tioyyän. Mänitägä Dios ja'a Moisés ñämaayy: “Høøchä Abraham xDyioshajp, møødä Isaac, møødä Jacob.” ²⁷Coo ja'a Dios jaduhñ jecy miänaañ, jaduhñä tøyhajt hajxy nmøødhájtäm coo ja'a Abrahamhajxy hänajty tøø jiuypiojtägach, møødä Isaac, møødä Jacob. Hix, jujcyjiäya'ay ja'a Dios jaduhñ Dioshájtäp, ca'a yho'oguiäya'ayä. Coo mijts jaduhñ mmäna'añ cooc tyijy ja'a ho'ogyjiäya'ayhajxy quia'a juypiojtägatsa'añ, caj mijtsä tøyhajt hajxy mnä'ägä møødä —nømä Jesús miänaañ.

²⁸Jimä jäya'ay hänajty tu'ug yhamädoowhity. Tsajtøgooty hänajty tiuñ. Coö miädooyy coö ja'a Jesús hänajty hoy tøø yhadsoy, mänitä Jesús hoy wyinguwa'agø'oyii. Mänit nāmaayyā:

—Madiu'u ja'a Moisés hajxy jecy xyhanéhäm. Mädyii jaduñ maas tuungpaatp —nømä Jesús miäyajtøwä.

²⁹Mänitä Jesús yhadsooyy:

—Jaduñ je'e miäna'añ:

“Pønjatiä Israel jecy haphajt teedyhajt, hamädoowhit hajxy. Ja'a Dios hajxy nWindsøn'hájtäm. Tu'uquiiä Dios jaduñ Dyioshaty.

³⁰Hamuumdu'jootä Dios hajxy mjaanč tehñ wyiingudsähgø'owät nägøø nädecypii. Mäbøjcä miädia'agy hajxy homiänaajä.

Jahmiets hajxy jaduñ cøjxta'axiøø.”

³¹Jaduñnä miämetspä miänaambä:

“Mdsögäbä jäya'ay hajxy nägøxiä nej mijts hamdsooyyä nničhogyiijän. Ni mädyii mädia'agy jaduñ quia'a mäbaady neby hädaa mädia'agy metspä tiuungpaadiän” —nømä Jesús miänaañ.

³²Mänitä craa miänáangumbä, ja'a hänajty tuumbä tsajtøgooty:

—Wiindsøn, jaanč tehñ yhoy miich mhadsooyy. Tøyhajt jaduñ nej miich mmäna'añän coö Dios tiu'uquiiä. Cabä wiingDios jyijä. Xjiaanč tehñ tiuungpáatäm hajxy jaduñ ³³coö ja'a Dios hajxy hamuumdu'joot nwiingudsähgøoyyämät, møød coö jäya'ay hajxy nägøxiä ndsójcämät neby hajxy hamdsooyyä nničhójcäm. Pero cab hajxy xjiaty tuungpáatäm coö animal hajxy jiiby

nøcxy nnä'a hayójxäm tsajtøgooty no'cøøc —nømä Jesús nāmaayyā.

³⁴Coö ja'a Jesús jaduñ miädooyy coö ja'a craa hänajty najuøoyyaamby tøø quiapxy, ja'a hänajty tuumbä tsajtøgooty, mänitä craa nāmaayyā:

—Jaac mäbøc ja'a Diosmädia'agy hamuumdu'joot, jaduñds miich jim mnøcxät Dioswiinduum —nømä Jesús miänaañ.

Mänitä häna'c-hajxy yhamoonnä, ja'a Jesús hajxy hänajty jia wi'i yagho'ogaambä. Cabä Jesús hajxy waamb miäyajtøonä je'eguiøxpä coö ja'a Jesús hajxy hänajty chähgø'oy.

³⁵Jiibiä Jesús hänajty yajnähixø'oy tsajtøgooty. Mänit miänaañ:

—Yøø häna'c-hajxy jii yajnähixøøbiä tsajtøgooty, tii hajxy jaduñ coö miäna'añ coogä David ja'a Cristo yhaphaty yhoc-haty.

³⁶Haa ca'a, jaduñ jim myiñ cujaayä maa ja'a Diosmädia'aguiän coö ja'a David hamdsooyyä jecy miänaañ:

Mänitøchä Dios ja'a nWiindsøn xñāmaayyā:

“Yaa miñ häña'aw maächä nhahooyhaampiän, høxtä cóonøchä mmädsip nga'a yajmäjädaacämät.”

Ja'a Dioshəpərituhamä David jaduñ jecy miänaañ. ³⁷Jaduñnä David jecy miänaañ coogä Cristo hänajty wyiindsønhaty. Hoorä, pø tøyhajt jaduñ coö ja'a David ja'a Cristo jaduñ jecy wyiindsønhaty, tii yøø jäya'ayhajxy coö miäna'añ coogä David ja'a Cristo nā'a haphaty nā'a hoc-haty —nømä Jesús miänaañ.

Jaančh teh̄m yhomiädoonä ja'a jäya'ayhajxy hänäjty miädoxy nebiä Jesüs hänäjty yajnahixø'oyän.

Nämayyä jäya'ayhajxy hänäjty.

³⁸Mänitä Jesüs jiaac mänaañ:

—Yø'ø häna'c-hajxy jii

yajnahixø'obiä tsajtøgooty, cab yø'ø miädia'agy hajxy mmäbøjcat.

Yoñwitmøød hajxy naxy wiädity

cajptooty je'eguiøxpä coo

hajxy wyi'li yajcumaya'añ. Wi'i

yajwiingudsähgø'owaamb hajxy

jaduhñ. ³⁹Jiiby hajxy jia wi'i

yhäña'awa'añ maa ja'a häñaabiejt

yajxonjatypän, hädaa yaabä

tsajtøgootypä, møød jim maa ja'a

cay hu'ugy naxy jiadyiijän. ⁴⁰Pero

cabä quiuhdujthajxy nä'ägädä

hoyyä. Hix, pøjcxäbä yaamgtø'oxiä

tiøjc-hajxy. Hoy hajxy jaduhñ jia

jatcø'oy, jejcyjatiä Dios hajxy jia wi'i

pia'ya'axy. Pero jaančh teh̄m yhoxyhoy

hajxy jaduhñ yajcumädoxa'añii —

nømä Jesüs miänaañ.

⁴¹Mänitä Jesüs jim mädøyyä hoy

yhøxta'agy maa ja'a jäya'ay xädø'øñ

hajxy hänäjty naxy quiuyoxø'oyän.

Ja'a mäyøøjäya'ayhajxy, majiatiä

xädø'øñ hajxy hänäjty piäda'agy.

Jimä Jesüs hänäjty miähee'pna'ay.

⁴²Mänitä yaamgtø'oxy tu'ug miejch.

Jaančh teh̄m yhäyoob hänäjty

je'e. Mejtsmägo'xä häyoobä je'e

quiugonøøyy. ⁴³⁻⁴⁴Mänitä Jesüs ja'a

jiämøødtøjc nämaayy:

—Huug hix yø'ø yaamgtø'oxy hajxy.

Cøxiä yø'øduhñ tøø yecy mäduhñtiä

hijty miøødä, ja'a hijty nägayaambiä.

Pero yø'ø mäyøøhäna'c-hajxy,

weeñtiä hajxy jaduhñ nä'ä puhyejcy.

13 Coo ja'a Jesüshajxy jiiby

chajtøjpädsøømy, mänitä

jiämøød tu'ug miänaañ:

—Wiindsøñ, huug hix yø'ø tsajtøjc, jaančh teh̄m yajxon yø'øduhñ miuuchä.

²Mänitä Jesüs yhadsooyy:

—Hoy huuc teh̄m yheeb. Hoy yø'ø tøjc jaduhñ jia cruundä, cøxaamb yø'øduhñ jyida'añ. Haxit hatajø'oy yø'ø muuch jiada'añ.

³Mänitä Jesüshajxy jim nõcxy maa ja'a tun hänäjty xiøhatiän Olivos, jim Jerusalén-woc-hawiimb. Coo hajxy jim miejch, mänitä Jesüs haniduhmduum hoy yhøxta'agy. Mänitä Pedro ja'a Jesüs hajxy nänøcxy, møødä Santiago, møødä Juan, møødä Andrés. Mänitä Jesüs hajxy miäyajtøøyy:

⁴—Mänaads yø'ø tsajtøjc jaduhñ jyida'añ. Mädyii hijxtähndäts jaduhñ cähxø'øgaamb coo hänäjty jaduhñ yhabaada'añ.

⁵Mänitä Jesüs yhadsooyy:

—Mniyajcopcø'øwøøjäp hajxy. Cab hajxy myajwiinhøønät. ⁶Mayyä jäya'ayhajxy min miäwiinhøøna'añ. Jaduhñ hajxy hänäjty miäna'ana'añ: “Høøch je'e Cristo.” Mayyä jäya'ayhajxy hänäjty jiaančh teh̄m miäbøga'añ.

⁷Coo hajxy mmädøyhädät coo tsip pleetä hänäjty xii yaa tøø piädø'ogy, cab hajxy jaduhñ mmäná'anät cooc tyijy ja'a naaxwiimbä hänäjty wyiimbida'añ. Homiänaajä tsip pleetä jiadyii.

⁸Nimiädsibø'øwäanäp hajxy hänäjty wiinghagajptjaty. Wiinduhmyhagajpt hujx hänäjty naxa'añ. Jadáañäbä yuuxøø hänäjty wiinduhmyhagajpt. Coo jaduhñ jiada'añii, hijxtahñd jaduhñ cähxø'tsoonaamb coo tsø'ty häyohn høchähgøøñäjaty hänäjty jiada'añii.

⁹Mniyajcopcø'øwøøjäp hajxy mänit. Mäjahñdiuum hajxy hänäjty mhida'añ. Xmiadsaambä mmädsip hajxy hänäjty. Mänit hajxy jim xyajnöcxa'añ haguĵc. Møød jim maa ja'a judfos chajtøjc-hajxiän, xwiobho'ogaamb hajxy hänäjty jim. Xyajnöcxaamb hajxy hänäjty jim maa ja'a gobiernä wyiinduumhajxiän, je'eguiøxpä cooĵ mĵts xpiawädity. Jímhøch hajxy jaduhñ xmiädiá'agät gobiernäwiinduum. ¹⁰Hix, cahnä naaxwiimbä hänäjty wyiimbityñä, cøxaambä jäya'ay ja'a Diosmädia'agy hajxy miädowa'añ wiinduhmyhagajpt. ¹¹Y coo hajxy jim xyajnöcxät haguĵc, cab hajxy mänit mnädj mnämáyät waambaty hajxy mhadsówät. Hix, ja'a Dios ja'a mädia'agy hajxy hänäjty xmio'owaamb. Cab hajxy hänäjty hamdsoo mmädia'aga'añ; ja'a Dioshespíritu hajxy hänäjty xyajmädia'agaamb. ¹²Hamiñ haxøpiä jäya'ayhajxy hänäjty tu'que'ex ñiñähduga'añii coo hajxy yagho'ogøøjät. Jaanä jaduhñä yhuung hajxy hänäjty ñähdugaambä. Ja'a muutsc-häna'c-hajxy, jaanä jaduhñä tieedy hajxy hänäjty tiunaambä. ¹³Nägøxiä mĵtsä jäya'ay xmiähanhada'añ je'eguiøxpä cooĵ mĵts xpiawädity. Pero pøn hänäjty tøø miee'xtucy, hoy hänäjty tøø jia ho'ogy, nähwa'adsaamb hänäjty je'e. ¹⁴Habaadaamb jaduhñ coo ja'a haxøøgpä ca'a hoybä miedsa'añ maa ja'a Diostøjcän —pøn hädaa nocy capxp, ween jaduhñ wyiijnjuø'y—. Mänitä Diostøjc jaduhñ yajma'ada'añii. Coo ja'a

haxøøgpä hajxy jaduhñ mhíxät, mänit hajxy päyø'øguiä mnøcxät tunjoot, pønjaty yaa tsänaaby Judeanaaxooty. ¹⁵Pønjaty hänäjty häñaaby tøjñähgøxp, ween ñä'ägä päyø'øgy, cap nøcxy tii jiiby yajpädsømy tøgooty. ¹⁶Pønjaty hänäjty camjooty, cab jaduhñ jim ñøcxät maa ja'a tiøjcän. Cap nøcxy jiiby tii yajpädsømy, ni wyit ni tii. ¹⁷Jaanĵ tehñ chaaĵhpøgaambä to'oxiøjc-hajxy hänäjty, ja'a hajxy hänäjty co'na'awaambä, møød ja'a hajxy hänäjty huungyajtsi'tspä. ¹⁸Mmänuu'xtá'agäbä Dios hajxy coo tsø'ty häyohn ween quia'a jadyii coo hänäjty jiaanĵ tehñ tiøøhcä. ¹⁹Jaanĵ tehñ yhoyhoyyä jäya'ayhajxy hänäjty chaaĵhpøga'añ. Ni mädyii tsaäĵpä jaduhñ quia'a mäbaada'añ neby hänäjty jiada'añiiñän, ni ja'a jecy nájxäbä, ni ja'a jaac minaambä. ²⁰Tøø ja'a Dios jaduhñ miäna'añ coo ja'a jäya'ayhajxy hänäjty jejcy quia'a tsaäĵhpøga'añ, je'eguiøxpä coo chocy pønjaty jaduhñ tøø wyiimbity. Coo ja'a Dios häxøpy jaduhñ tøø quia'a mäna'añ, jejquiä jäya'ayhajxy häxøpy chaaĵhpøga'añ. Ni pøn häxøpy quia'a nähwa'adsa'añ. ²¹Coo mĵts pøn xñämä'awät coog tyijy ja'a Cristo hänäjty jii wiädity, cab hajxy mmäböğät. ²²Hix, mayyä jäya'ayhajxy hänäjty wiädita'añ mäwiinhøhmä, cooc tyijy hajxy hänäjty je'e Cristo, møød cooc tyijy hajxy hänäjty Dyiosquexiä. Piayajcähxø'øgaambiä hijxtahñd hajxy hänäjty hoy-yagjuøøñbä. Jaduhñä jäya'ayhajxy hänäjty jia wi'i wyiinhøøna'añii, møød ja'a hajxy hänäjty Dioswiimbíyyäbä.

²³Mniyajcopcø'owwóǰäp hajxy. Jäguemiä hajxy cham nnäma'ay coo hajxy mniyajcopcø'owwóǰät.

²⁴Mänitxøöbä, coo ja'a tsaächpä hänäjty tøø ñajxnä, mänitä xøø wyiingoodø'owahñ møødä po'o.

²⁵Mänitä mamiadsa'a hänäjty quia'awa'añ. Tsäyuyyaamb hänäjty jaduhñ, tijaty jim̄ cuhdujtmøød tsajtcøxp.

²⁶Mänitøch hänäjty ngäda'aga'añ jocjooty, høøch ja'a Diosquexypä. Møcmäjaamøødhøch hänäjty ngäda'aga'añ. Yajxónhøch hänäjty mänit ngäda'aga'añ. Mänitøchä jäya'ayhajxy hänäjty may xpia'hee'ptägø'owa'añ.

²⁷Mänitøchä nmoonsä tsajpootypähajxy hänäjty nguexa'añ coo hajxy jaduhñ quiøxy yajtu'ugmúgät pønjátyhøch hänäjty tøø nwiimbij. Wiinduhmyhagajpt hajxy hänäjty wiomuga'añii.

²⁸Høxtahmdsä higueraquepy, coo jaduhñ wiámät, hijxtahñd jaduhñ coo hänäjty tøø pioodtägøöñä.

²⁹Jaanaä jaduhñduhm̄bä, coo ja'a tsø'ty hajxy jaduhñ mhíxät nébiøch naamñä tøø nmädia'agy, hijxtahñd hänäjty jaduhñ cooch hänäjty mobädajpä ngädaactägatsa'añ hädaa yaabä naaxwiin, høøch ja'a Diosquexypä.

³⁰Cøxaamb jaduhñ jiada'añii nébiøch naamñä tøø nmädia'agy, cahnä jäya'ayhajxy hänäjty quiøxy ho'ogyñä, ja'a hajxy jäda'ahaty jugyhajpä. Tøyhajt jaduhñ.

³¹Cuhdägoyyaambä tsajt møødä naaxwiimbä. Pero tsipcøxp jaduhñ tiøjiada'añ nébiøch cham nmädia'aguiän.

³²Ni pøn̄ jaduhñ quia'a najuø'øy mänaa jaduhñ jiada'añii. Jagooyyä Dios nidihm̄ ñajuø'øy, ja'a

hajxy nDeedyhájtäm. Ni ja'a Diosmoonsähajxy jaduhñ quia'a najuø'øy, ja'a hajxy jim̄ tsajpootypä. Ni høøch nga'a najuø'øy, høøch ja'a Diosquexypä.

³³Paady, nähix̄ hahixø'ø hajxy mhídät homiänaajä, je'eguiøxpä coo hajxy mga'a najuø'øy mänaa jaduhñ jiada'añii.

³⁴Jii jäya'ay hänäjty tu'ug, coo hänäjty ñøcxa'añ jäguemnaax, mänitä mioonsä ñämaayy coo ja'a tiøjc cwieendähájtäxät. Nägøxiä hajxy jaduhñ yhaagä nä'ä tuungmooyyä. Jaduhñä tu'jäya'ay ñämáayyäbä coo jim̄ tiúnät maa ja'a tøgħaawän, weenä tøjc yaghawa'aäch jopy; tsuu jadähooc yhagøøguiumbät.

³⁵⁻³⁶Ja'a cudøjcä mioonsähajxy, cab hajxy hänäjty ñajuø'øy mänaa ja'a wyiindsøn̄hajxy hänäjty miejstägatsa'añ, pø coodsøøñäp hänäjty jaduhñ, o pø tshumdä hänäjty, o pø tu'tseey-yaaxø'ogy hänäjty, o pø jobøøñäp hänäjty. Nähix̄ hahixø'ø ja'a wyiindsøn̄ hajxy jaduhñ yhahíxät. Pø caj, coo hajxy jaduhñ jaguiapxiä ñähmejtspedøøjät, wehñdä hajxy hänäjty mia'ay. Jaduhñ mäwínäts mijtspä, cab hajxy jaduhñ mnajuø'øy mänáajøch yaa ngädaactägatsa'añ hädaa yaabä naaxwiin. Paady hajxy nähix̄ hahixø'ø homiänaajä mnä'ägä hídät.

³⁷Jadúhñhøchä jäya'ayhajxy nägøxiä nnämaabiä coo hajxy nähix̄ hahixø'ø ñä'ägä hídät homiänaajä.

14 Mejtsxøø ja'a pascuaxøø hänäjty quia'a habaady mänaa ja'a judíos tsajcaagy hajxy hänäjty quiaayyän, ja'a cajpä tsoomiøødpä. Ja'a

teedywiindsønajxy, mөөдä häna'c-hajxy, ja'a hajxy hänäjty jii^{by} yajnäixөөbiä tsajtөгooty, cojyquiapxytiumb hajxy hänäjty jaduhñ nebiä Jesús hajxy yajtsumó^ójät hөhnda'agymiädia'agyhaam, jaduhñ hajxy jaduhñ hoy yajyagho'ogó^ójät. ²Mänit hajxy näje'e niñämaayä:

—Cab hajxy tsөc nej jatcöóyyäm coo ja'a cu'ug hajxy jaduhñ xñä'ä nähbädó'cämät.

³Tөө ja'a Jesús hänäjty yhäda'agy Betania. Jim hänäjty miädsuugay maa ja'a Simón tiöjcän, ja'a hijty leprapa'ammөөdpä. Mänitä to'oxiöjc tu'ug miejch. Jimä nardoperfume hänäjty quió'ogonhaty alabastro-vidriojooty. Jaanč tehñ chowä nardoperfume hänäjty ñөcxy. Mänitä to'oxiöjcä perfume-vidrio piuhy. Mänitä Jesús ja'a perfume yajcuhtemөөyyä.

⁴Mänitä jäya'ayhajxy näje'e jiootma'ty, ja'a hajxy hänäjty jim pahäñaabiä. Mänit hajxy niñämaayä:

—Cap yө'ө perfume jaduhñ cu yaghäyooyy. ⁵Coo jaduhñ cu ñä'ägä too'cy, tsoobaadaamb yө'ө hijty, tägөөgmägo'x-xөөguduñ. Jimä häyoobädöjcä chow hajxy jaduhñ cu miooyä coo jaduhñ cu ñä'ägä too'cy.

Jaduhñä to'oxiöjc yhojjä.

⁶Mänitä Jesús miänaañ:

—Weends yhity. Ca'a hajxy mwi'i yhojy. Nébiөch yө'ө jaduhñ tөө xtiüñän, cab jaduhñ ñejpiä; hoy jaduhñ. ⁷Homiänaajä mijtsä häyoobäjäya'ay mhixy. Homiänaajä hajxy jaduhñ mbuhbédät. Pero

hөөч, cábөch mijts jejcy xyhixa'añ.

⁸Xwyiingudsähgöbiiөch yө'өya'ay jaduhñ, páadyhöchä perfume jaduhñ xyajcuhtemөөyy. Jaduhñ miäbaady nej coöch häxөpy tөө nho'oguiän. Jaduhñhöch yө'ө hijty xyajnähdema'añ. ⁹Majatiä Diosmädia'agy wiädita'añ wiinduhmyhagajpt ja'a hөөчcөxpä, jaduhñä jäya'ayhajxy miädia'aga'añ nébiөch yө'өya'ay naamnä tөө xtiüñ. Jaduhñ yө'ө homiänaajä jiahmiedsáañänä. Tөyhajt jaduhñ.

¹⁰Jimä Jesús ja'a jiamiөөд hänäjty tu'ug xiөhaty Judas Iscariote, ja'a hajxy hänäjty nämajmetspä. Mänitä Judas ja'a teedywiindsøn hoy miөөdcojyquiapxytiüñ coo ja'a Judas ja'a Jesús hänäjty tiöoga'añ.

¹¹Coo ja'a teedywiindsønajxy jaduhñ miädooyy, mänit hajxy jaduhñ jiaanč tehñ xioondaacpөjcy. Mänitä Judas yajwiinwaanөөyyä coo xädö'өн hänäjty mio'owa'añii. Mänitä Judas tiägөөyy wiinmaabiä nebiä Jesús paquiä yajcө'ödägó'öwät.

¹²Mänitä pascuaxөө yhabaatnä. Jaduhñä judiöshajxy hänäjty quihdujthaty coo tsajcaagy hajxy naxy quia^y, ja'a cajpä tsoomiөөдäbä. Jaduhñ hajxy hänäjty quihdujthajpä coo meeghuung hajxy naxy yoxy ja'a pascuaxөөjooty. Mänitä Jesús ja'a jiamiөөд miäyajtөwä:

—Maada'a yhooyä coo pascuaxөө hajxy häyaa nwiindsuugáayyämät.

¹³Mänitä Jesús ja'a jiamiөөд nämetsc ñämaayy:

—Nөcx hajxy jim Jerusalén. Jimä jäya'ay hajxy tu'ug mbaada'añ nõögón. ¹⁴Je'eds

hajxy mbadu'ubóǵäp. Mänit hajxy mbadøjtäǵó'owät. Mänitä cudøjc hajxy mnämä'awät: "Ja'a nWiindsón højts jaduñ tøø xwyiinguexy coo højts nyajtówät maa højtsä pascuaxøø häyaa tsuu nwiindsuugáyät." ¹⁵Mänit mijtsä cudøjc cuarto nøcxy xyajnáhixø'owa'añ nähbettøjcøxp. Jaančh tehñ quiäruundä ja'a cuarto jaduñ møød yajxonä. Jimä cay hu'ugy hajxy mnähix mhahixø'owät coo hajxy jim ndsuugayáanäm — nömä Jesús miänaañ.

¹⁶Mänit hajxy nämetsc jiaančh nøcxy jim cajptooty. Jiaančh paat hajxy jaduñ neby hajxy hänäjty tøø näma'ayijän. Mänitä tsuugay hajxy tiägøøyy nähix hahixøöbiä.

¹⁷Coo quioodsøöñä, mänitä Jesús hajxy jim nøcxy maa ja'a pascuaxøø hajxy hänäjty wyiindsuugaya'añän, møødä jiamøødhajxy ja'a jaac nämajcpä. Mänit hajxy tiägøøyy caabiä.

¹⁸Mänitä Jesús miänaañ:

—Tú'ughøch mijts mjamiøød xñäxø'owø'owa'añ. Quipxy hajxy je'e cham xmiøødcamiújcäm. Tøyhajt jaduñ —nömä Jesús miänaañ.

¹⁹Mänit hajxy nägøxiä jiootmadiägøøyy. Mänit hajxy tiägøøyy niñämäáyyäbä:

—Nej, høøch je'eda'a tyjy xñänøømbä.

²⁰Mänitä Jesús yhadsooyy:

—Mijts mjamiøød jaduñ tu'ug jatø'øwaamb, näguipxiä tsajcaagy hajxy jaduñ jii by xmiøødpaguhmä'tsäm texyjooty.

²¹Høøch, ja'a Diosquexypä, jadúññhøch njada'añ nhabeta'añ

nepy jim myiñän cujaay maa ja'a Diosmädia'aguiän. Tøjiadaambä Diosmädia'agy jaduñ. Pero ja'a cráajøch jaduñ xñähdugaambä, jaančh tehñ yhoyhoy jaduñ chaačhpøga'añ. Maas hoy häxøpy coo quia'a nä'ägä naaxwiimbädsøømy —nömä Jesús miänaañ.

²²Caabyñä ja'a Jesús hajxy hänäjty, mänitä Jesús ja'a tsajcaagy quionø'cy. Mänitä Dios nämaayy: "Dioscujú'uyäp." Mänitä jiamioødä tsajcaagy nägøxiä yajnäguidøøyy. Mänit miänaañ:

—Cay hädaa hajxy; høøch nni'x ngopc hädaa —nömä Jesús miänaañ.

²³Mänitä Jesús ja'a vaso quionø'cy, ja'a hänäjty vinomøødpä. Mänitä Dios nämäaguuiumbä: "Dioscujú'uyäp." Mänitä Jesús ja'a vino yhuuctsohñ. Mänitä jiamioød miooyy. Nägøxiä hajxy jaduñ yhuucy. ²⁴Mänitä Jesús miänángumbä:

—Høøch nnø'ty hädaa. Hijxtahñd hädaa jaduñ coöchä nnø'ty nyajxee'xa'añ coöchä jäya'ayhajxy hänäjty nnähho'tu'uda'añ. Jadúññhøchä cuhdajt

nyajtødiägø'owa'añ, ja'a Dios ja'a Abraham jecy miøødyajcuhdújcäbä.

²⁵Tøyhájthøch jaduñ nnämä'awät, cábøchä vino nhuuctägatsa'añ høxtä cóonøch hänäjty jim tøø nnøcxtägach maačhä nDeediä wyiinduumän. Mänitøchä vino jembyiä nhuucmadsa'añ —nömä Jesús miänaañ.

²⁶Mänitä Jesús ja'a Dios høy hajxy yhøøyy, møødä jiamioødtøjc. Mänit hajxy jim chohñ. Mänit hajxy

jim ñocxy maa ja'a tun hānajtj
xiøhatiän Olivos. ²⁷Mānitä Jesús
ja'a jiamiøødtøjc ñāmaayy:

—Nägøxiøch mijts xñāhgue'ega'añ,
je'eguiøxpä cooçh nmädia'agy
hajxy xquia'a mabøgaanä.

Jaduhñ jim myiñ cujaay
maa ja'a Diosmädia'aguiän:

“Nyagho'ogáambiøchä
meegcueendähajpä. Cøxaambä
meeghajxy piäyø'oga'añ. Xii yaa
hajxy ñocxø'øwa'añ.” ²⁸Cooçh
hānajtj tøø nho'ogy, mānitøch
jadähooc njujypiøjtägatsa'añ.
Mānitøch jim nnocxa'añ Galilea.
Mānitøch mijts jim ñocxy
xpiaada'añ —nømä Jesús miānaañ.

²⁹Mānitä Pedro ja'a Jesús
ñāmaayy:

—Høøch mabøcypä, cábøch miich
mänaa nbuhwa'adsa'añ, hoy miich
hajxy nägøxiä xjia puhwá'adsät.

³⁰Mānitä Jesús yhadsooyy:

—Tøyhájthøch miich nnámá'awät,
häyaa coods miich tægøøghooc
mniguiugapxa'añii cooçh tyjy
xquia'a hixiä.

³¹Pero Pedro, tehngajnä je'e jiaac
miānaañ:

—Cábøch mänaa
nniguiugapxa'añii cooçh tyjy miich
nga'a hixiä, høyhøch miich quipxy
nja møødhó'ogät —nømä Pedro
miānaañ.

Jaduhñ hajxy nägøxiä piahadsoobä.

³²Mānitä Jesús hajxy jim ñocxy
maa hānajtj xiøhatiän Getsemaní.
Mānitä Jesús ja'a jiamiøødtøjc
ñāmaayy:

—Jiids hajxy huuc hāna'aw, ñocxy
nhuuc Diospa'ya'axy.

³³Mānitä Jesús ja'a Pedro hawiing
miøødnøcxy, møødä Santiago,

møødä Juan. Mānitä Jesús hoyhoy
jiaançh tehñ jiootmabiøjcy.

³⁴Mānitä Pedro hajxy ñāmaayyä:

—Høyhøyhøch jaduhñ njaançh
tehñ jiootmayhaty. Høxtä
ho'ogáambøch nnijiäwø'øyii. Huuc
mähmø'øw hajxy yaa. Cab hajxy
mmaahó'ogät. Jujcy hajxy mhídät
—nømä Jesús miānaañ.

³⁵⁻³⁶Mānitä Jesús weeñtiä
jiaac ñocxy. Mānit jaduhñ
miägutscädaacy. Mānitä Dios
tiägøøyy mänuu'xtaacpä: “Teedy,
mee'x, coo miich jaduhñ cu
mga'a mänaañ, cábøch häxøpy
ndsaaçhpøga'añ nébiøch cham
nmānaxa'añän. Pero cábøchä
nguhdujt yhidät nébiøchä njoot jia
tsoquiän. Miiçhä mguhdujt jaduhñ
nä'ägädä hidaamb.”

³⁷Mānitä Jesús jim ñocxtägajch
maa ja'a Pedro hajxy hānajtj tøø
miähmø'øyän. Coo jim miejch,
mānit jaduhñ yhijxy coo hajxy
hānajtj tøø quiøxy maaho'ogy.
Mānitä Pedro ñāmaayyä:

—Simón, nej, mmaabä. Nidu'hora
miich tøø mga'a mee'xtucy. ³⁸Jujcy
hajxy hit. Tehngajnä ja'a Dios hajxy
mba'yá'axät. Jaduhñä møjcu'ugong
hajxy xquia'a jøjcapxø'øwät. Jia
tsojpiä mjoothajxy jaduhñ coo hajxy
jujcy mhídät, pero cabä mni'x ja'a
mgopc-hajxy jaduhñ miee'xtuga'añ.

³⁹Mānitä Jesús ja'a Dios
hoy pia'yáaxcumbä. Jaduhñ
jadähooc ñāmānaanøøguiumbä.

⁴⁰Mānit jadähooc miéjtscumbä
maa ja'a Pedro hajxy hānajtj
tøø miähmø'øyän. Tøø hajxy
hānajtj miaahó'cumbä. Hix,
tøø hajxy hānajtj jiaançh tehñ
yhanuu'xø'øy. Coo hajxy jaduhñ

yujxä, cab hajxy hänajty ñä'ägä najuø'oy waamb hajxy yhadsówät.

⁴¹Coo ja'a Jesús jaduhñ miejch ja'a miädägøøghoocpä, mänit miänaannä:

—Nej, je'enä hajxy mwili mia'ayñä.

Ween tiuhñä. Tøø yhabaatnä coochä cahwiindøyhäna'c-hajxy xquiø'ødägø'øwaannä, høøch ja'a Diosquexypä. ⁴²Pädó'näts hajxy. Jam hajxy. Ximä craa myiñ ja'aäch jaduhñ xyajcø'ødägø'øwaambä.

⁴³Jimä Jesús hänajty miädia'agyñä, mänitä Judashajxy miejch, møødä majiäya'ay, haagä espada-cap. Näje'e hajxy hänajty wiojptcappä. Ja'a teedywiindsøn'hajxy jaduhñ mäguejx, møødä häna'c-hajxy jiiby yajñähixøøbiä tsajtøgooty, møødä majjäya'adiøjc-hajxy.

⁴⁴Tøø ja'a Judashajxy hänajty quiojyquiapxytiuhñ: “Ja'aäch hänajty ndsu'xaambiä, je'e hänajty je'e. Mänit hajxy mmádsät. Mänit hajxy nøcxy mdsuymy”, nømä Judas hänajty tøø miäna'añ. ⁴⁵Mänitä Judas ja'a Jesús ñämejch. Mänit ñämaayy:

—iWiindsøn!

Mänitä Judas ja'a Jesús jiaanäh tsu'xy. ⁴⁶Mänitä Jesús miajtsä.

⁴⁷Ja'a Jesús ja'a jiamioød tu'ug, jimä espada hänajty miøjnädawhaty. Coo jaduhñ yhihxy coo ja'a Jesús hänajty tøø miächii, mänitä yhespada jiuu'pädsøømy. Mänitä teedywiindsønä mioonsä tu'ug tiaatspujxtuutä.

⁴⁸Mänitä Jesús ja'a majiäya'ay ñämaayy:

—Tiich hajxy jaduhñ coo tøø xñämiñ espada-cap wojptcap. Tiich

hajxy xyhixy, mée'tspäjä. ⁴⁹Tiich hajxy jim coo xquia'a majtspä tsajtøgooty. Nébyhøch hajxy jaduhñ høxtä yaa tøø xñämiñ. Nej, ca'a, jabom-jabómhøch hijty jim nøcxy nyajñähixø'oyä. Pero páadyhøch cham njaty nhabety, jaduhñ Diosmädia'agy tiøjiädät ja'a høøchcøxpä.

⁵⁰Nidihmä Jesús hänajty jiaac mädia'agy. Tøø ja'a jiamioødhajxy hänajty quiojxy päyø'ogy. ⁵¹Jimä høxcujc-häna'c ja'a Jesús hänajty tu'ug piawädijpä, poobwit-nähcäjeenä. Mänit jaduhñ jia madsaanä. ⁵²Mänitä poobwit yajniñähnajptuutä. Nähwa'ads høxwa'ads je'e piäyø'cy.

⁵³Mänitä Jesús yajnøcxä maa ja'a teedywiindsøn wyiinduumän, ja'a jaac tehñ miøjpä. Mänitä teedywiindsøn'hajxy jiaac tehñ miejch, møødä majjäya'adiøjc-hajxy, møødä häna'c-hajxy jiiby yajñähixøøbiä maa ja'a tsajtøjcän. ⁵⁴Jimä Pedro hänajty jäguemjuøøby piadäna'ay maa ja'a teedywiindsøn tiøjwiingøn. Mänit jim piahøxtaacy maa ja'a hadänaabiähajxy hänajty jiøømba'axamiän.

⁵⁵Jimä teedywiindsøn'hajxy hänajty jia wi'li wyiinmahñdyhaty nebiä Jesús hajxy yajyagho'ogøøjät. Pero cab hajxy hänajty ñä'ägä wiinmahmybiaady. ⁵⁶Hix, hoyyä Jesús hajxy hänajty nämay jia nähøøno'øy, wiingaty hajxy hänajty miädia'agy; cab hajxy hänajty tiu'ugmädia'aguiä. ⁵⁷⁻⁵⁸Mänitä wiinghäna'c-hajxy tiänaayyø'cy; nøm hajxy je'e miänaambä:

—Tøø højts jaduhñ nmädoy coo jaduhñ miänaañ: “Hädaa tsajtøjc,

jäya'ayhajxy hädaa hädiuun. Pero hөөч, nyajnajtsjidó'owäböch hädaa. Cudägөөгxóöyyöчhä wiingpä nhädiuundägätsät. Ca'a jäya'ayhajxy je'e hädiünäp" — jaduһн hajxy je'e yhөһндаacpä.

⁵⁹Ni je'e hajxy hänäjty quia'a tu'ugmädiá'aguiäbä.

⁶⁰Mänitä teedywiindsón tiänaayyö'cy majiäya'ayhagujc, ja'a tehм miөjpä. Mänitä Jesús nāmaayyā:

—Nej, cab jaduһн mnä'ä hadsowa'añä waambaty hajxy miäna'añä.

⁶¹Pero cabä Jesús waamb nā'ägä hadsooyy. Mänit nāmāyyägumbä:

—Nej, төyhajt jaduһнä coo miichä Dios төө xquiexiä, Nej, miichä Dios xyHuunghajpä.

⁶²Mänitä Jesús yhadsooyy:

—Tөyhajt jaduһн. Hөөч je'e. Xyhixáambөч mijts jaduһн coöч jim nhäna'awa'añ Dioswiinduum, maa ja'a yhaooyyhaampiän. Mänítөч hajxy jadähooc xyhixáangumbä coöч hänäjty yaa ngädaactägatsa'añ hädaa yaabä naaxwiin. Jocjootyhөч hänäjty nmänaca'añ.

⁶³Mänitä teedywiindsón ja'a wyit quioө'ch. Paady jaduһн jiatcөөyy coo hänäjty jiaanч tehм jootma'ady. Mänit miänaañ:

—Tii testigo hajxy jaduһн nnä'ä jaac wáañämät. ⁶⁴Tөө hajxy jaduһн mhamdsoo mädooy coo ja'a Dios төө miägapxtägoy. Waamb hajxy jaduһн mmäna'añ, neby hajxy ndúunämät.

Haagä jaduһн hajxy miänaañ cooc tyijy ja'a Jesús төө quidiēey, mөөд cooc ween yagho'ogyii.

⁶⁵Mänitä Jesús tiägөөyyä wiingutsujöөyyäbä. Mänit wyiinguxodsөөyyä. Mänit wyiingutexөөyyä. Mänit nāmaayyā: —Najuө'ow pөң xquiөjx.

Mänitä hadänaabiädөjc ja'a Jesús hajxy wyiinguла'abөөyy.

⁶⁶⁻⁶⁷Y ja'a Pedro, jii by hänäjty je'e hanaaxyp jioөmba'axamy maa ja'a төjwiingän. Mänitä teedywiindsönä qyixymoonsä tu'ug miejch maa ja'a Pedro hänäjtian. Coo ja'a Pedro jaduһн yhiixä, mänit wyiinhee'ppejtä. Mänit nāmaayyā:

—Naxy miich yөө Jesús mmөөдwädity, túhmäts. Haagä Nazaret hajxy mdsoon nämetsc, túhmäts.

⁶⁸Mänitä Pedro nijiogapxä:

—Ni nga'a hixiөч yөө. Ni nga'a najuө'өyhөч jaduһн tiich jaduһн xjia wi'i yajmөөdmädiaacp —nөmä Pedro yhөһндаacy.

Mänitä Pedro quiuraabädsөөmy. Mänitiä tseey tu'ug jiaanч yaaxö'cy. ⁶⁹Mänitä qyixymoonsä ja'a Pedro yhiixcumbä. Mänitä jäya'ayhajxy nāmaayyā, ja'a hajxy hänäjty jim jaac padänaabiä: —Xii Jesús jiamioөд tu'ug. Je'e yөө —nөmä qyixymoonsä miänaañ.

⁷⁰Mänitä Pedro jadähooc ñiguiugäpxägumbä. Cab jaduһн ñä'a jegөөyy, mänitä Pedro nāmāyyägumbä:

—Mbawädijpy miichä Jesús pä, túhmäts. Nyo'mädooby hөjts jaduһн coo miich jim mdsoon Galilea.

⁷¹Mänitä Pedro jadähooc miänāngumbä:

—Tөyhajt, cáböч jaduһн nnä'ägä hixiä pөң hajxy jaduһн mja mädiaacypy.

Tähoocapxiä ja'a Pedro jaduñ miänaañ cooc tyijy ja'a Jesús hänäjty quia'a nä'ägädä hixiä. ⁷²Mäniitä tsee miämetsc-hoocpä yáaxcumbä. Mäniitä Pedro jiahmiejstaacy coo ja'a Jesús hänäjty tøø miäna'añ: "Cahnä tsee hänäjty miämetsc-hoocpä ya'axy, tøø miich hänäjty tägøøghooc mniguiugapxyii cooch miich hänäjty xquia'a hixiä." Mäniitä Pedro jioøguioo'ty coo ja'a tsee miämetsc-hoocpä jiaanč yaaxy.

15 Coo jioøøyy, mäniitä teedywiindsøn hajxy nägøxiä yhamugøøguiumbä, møødä majjäya'adiøjc-hajxy, møødä häna'c-hajxy jiiby yajnä hixøøbiä tsajtøgooty. Mäniit hajxy quiojyquiapxytiuuñ nebiä Jesús hajxy hänäjty tiuna'añ. Mäniitä Jesús hajxy quio'øxojch. Mäniitä Pilato hajxy hoy yajcø'ødägø'øy maa je'e hänäjty guioiernähatiän. ²Mäniitä Pilato ja'a Jesús miäyajtøøyy: —Nej, tøyhajt jaduñä coo miichä judíošhajxy xguioiernähatiä.

Mäniitä Jesús yhadsooyy:

—Tøyhajt jaduñ.

³Madiu'u ja'a teedywiindsøn ja'a Jesús hajxy hänäjty jia wi'i näxø'øwø'øy. Pero cabä Jesús hänäjty waamb nä'ägä hadsooyy.

⁴Mäniitä Pilato miänáangumbä:

—Nej, caj mhadsowa'añä. Madiu'u miich hajxy xjia wi'i näxø'øwø'øy —nømä Jesús nñamaayyä.

⁵Pero cabä Jesús waamb nä'ägädä hadsooyy. Jiaanč tehñ yagjuøøyy ja'a Pilato jaduñ coo ja'a Jesús jaduñ quia'a nä'ägädä hadsooyy.

⁶Jaduñä Pilato hänäjty jomøjt-jomøjt quihdujthaty

coo xøø hänäjty jiadyii, mäniitä tsumyjiäya'ay naxy tu'ug yajpädsømy, ja'a judíošhajxy hänäjty yajnähdijpiä. ⁷Jiibiä jäya'ayhajxy hänäjty näje'e chumyčhänä'ay. Tsip hajxy hänäjty tøø yagjadyii. Tøø hajxy hänäjty miäjäya'ay-yagho'ogy. Tu'ugä tsumyjiäya'ay hänäjty xiøhaty Barrabás. ⁸Coo ja'a cu'ughajxy jim miejch maa ja'a Pilato wyiinduumän, mäniitä Pilato hajxy jaduñ nñamaayy coo ja'a tsumyjiäya'ay tu'ug yhøxmádsät. ⁹Mäniitä Pilato yhadsooyy:

—Nej, jaduñ hajxy mmäna'añä coochä Jesús nhøxmádsädä, ja'a tyijy hajxy mgobiernähajpiä.

¹⁰Paadiä Pilato jaduñ miänaañ, najuøøby hänäjty je'eduhñ tiiguiøxpä ja'a Jesús coo yajcø'ødägøøyyä ja'a teedywiindsøn. Paadiä Jesús jaduñ yajcø'ødägøøyyä je'eguiøxpä coo ja'a miädia'agy hänäjty quia'a yajmädsójcäxä. ¹¹Mäniitä teedywiindsøn ja'a cu'ug hajxy jiojcapxøøyy coo ja'a cu'ughajxy jaduñ miäná'anät coo ja'a Jesús ween quia'a høxmačhii, weenä Barrabás nä'ägä høxmačhii. Coo ja'a cu'ughajxy jaduñ jiaanč mänaañ, ¹²mäniitä Pilato ja'a cu'ug jadähooc miäyajtøøyy:

—Y yøø Jesúsäts, ja'a tyijy hajxy mgobiernähajpiä, neby hajxy yøø myajnähdijy nébiøch yøø ndünät.

¹³Mäniitä cu'ughajxy møc yaaxy: —Møjpahbet hajxy cruzøxp.

¹⁴Mäniitä Pilato miänáangumbä: —iPero tisän! Tii tøø quidiiey.

Mäniit hajxy maas møc yáaxcumbä:

—Møjpahbet hajxy cruzcøxp.

¹⁵Mänitä Pilato jiaančh mänaañ coo ja'a Barrabás hajxy ween nøcxy yajpädsømy pujxtøgooty. Hiḅ, cabä Pilato ja'a cu'ug hänajty yagjootma'ada'añ. Mänitä Pilato miänaañ coo ja'a Jesús wiobho'ogóøjät. Mänit miänáangumbä coo ja'a Jesús hajxy nøcxy cruzcøxp miøjpahbety.

¹⁶Mänitä soldado ja'a Jesús hajxy yajnøcxy maa ja'a hagučän. Mänitä soldado ja'a jiamioød hajxy quiøxy mõjyaaxy. ¹⁷Mänitä Jesús hucywyit yajnähtämoogøøyyä. Mänitä haptycorona yajcuhjenøøyyä.

¹⁸Mänitä Jesús tiägøøyyä wiinyáaxäbä:

—iViva ja'a Jesús, ja'a judíoshajxy jaduhñ guobiernähajpiä! iViva!

Jaduhñä Jesús hänajty wyiinwooñii. ¹⁹Mänit hohoy wiojpä quiuhduum paḅyhaam. Møød wyiingutsujøøyyä. Mänit wyiinjičdaacä. Jaduhñä soldadohajxy hänajty jiatcø'øḅy nebiä wyiingudsähgøøbiän.

²⁰Pero wyiinwohm̄biä Jesús hajxy hänajty jaduhñ. Mänitä hucywyit hajxy yajtsijy. Mänitä yhamdsoo wit yajpøgøøyyäxä. Mänit hajxy yajnøcxy maa hajxy hänajty miøjpahbeda'añän.

²¹Mänitä jäya'ay hajxy tu'ug jiojcubaadøøyy. Camjooty hänajty tøø yhoy. Simón hänajty xiøhaty. Jim̄ hänajty chooñ Cirene. Jue'e yhuunghajxy hänajty xiøhaty Alejandro mõødä Rufo. Jim̄ä Jesús cruz hänajty chømä. Mänitä Simón hadsip nãmaayyä coo ja'a Jesús ween piuhdsømø'øḅy. Mänitä Simón ja'a cruz jiaančh tsømø'cy.

²²Mänitä Jesús yajmejtsä maa ja'a nähgaphuung hänajty xiøhatiän Gólgota. Jaduhñä nähgaphuung hänajty quiähxø'øgy nebiä ho'ogyjiäya'aguiopcän, paady hajxy jaduhñ yajxøbejty Gólgota. ²³Mänitä Jesús vino jia mooyyä. Mirra ja'a vino hajxy hänajty tøø yajmädemø'øḅy. Pero cabä Jesús jaduhñ nã'ägä huucy. ²⁴⁻²⁵Mänitä Jesús miøjpahbejtä cruzcøxp. Møjpetyxiøø hänajty jaduhñ. Tøø ja'a Jesús ja'a wyit hänajty jadähooc yajtsijjähä. Mänitä soldado ja'a Jesús ja'a wyit hajxy tiägøøyy yajniuguühäyø'cäbä. ²⁶Mänit hajxy jim̄ yuugjahy cruzcopcuhduum tiiguiøxpä ja'a Jesús jaduhñ coo miøjpahbejtä: “Hädaa ja'a judíoshajxy guobiernähajpy”, nõm hajxy jim̄ quiujahy. ²⁷Mänitä mee'tspähajxy nämetsc miøjpahbéjtäbä. Tu'jäya'ay miøjpahbejtä maa ja'a Jesús yhahooyhaampiän. Jatu'ug miøjpahbéjtäbä maa ja'a Jesús yhanajtyhaampiän. Cujcä Jesús jaduhñ hoy piäda'agyii. ²⁸Coo ja'a Jesús ja'a mee'tspä jaduhñ näguipxy miøødho'cy, jaduhñä Diosmädia'agy tiøjiajty maa jaduhñ myiñän cujaay: “Haxøøghäna'c jaduhñ pianänøømä.”

²⁹Ja'a jäya'ayhajxy hänajty jaduhñ jim̄ naxøøbiä, høxtä yagjuøøby hajxy hänajty coo ja'a Jesús hajxy jim̄ yhijxy cruzcøxp. Møød hajxy hänajty wyiinwooñ: —Ja'a, miičh mahñdy ja'a tsajtøjc mwi'i yagjidaamby, y cudägøøgxøøyyä mahñdy miičh je'e mhädiuundägätsät. ³⁰Pø tøy miičh mõcmäjaa mjaančh mõødä, tiids miičh jim̄ coo mga'a mänacy

cruzcøxp. Jadúhñäts mbäyó'ogät —
nømä Jesús ñämaayyä.

³¹ Jaaná jaduhñä

teedywiindsønñajxy hñajty
miäwiingapxpejpä, møødä
hänä'c-hajxy hñajty jim
yajñähixøöbiä maa ja'a tsajtøjcän.
Jaduhñ hajxy hñajty ñiñäma'ayii:
—Tøø yø'ø wiinghänä'c may
yajñähwa'ačh, pero caj yø'ø
hamdsoo hoy yajniñähwa'adsa'añii.
Jaduhñ hijty ñibiäda'agyii
nebiä Dioshuungän. Jaduhñ
hijty niñänømyii cooc tyijy ja'a
judíoshajxy guobiernähaty. ³² Mänit
hajxy häyaa njaančh mabøjcämät,
nägooyyä jim miänácät cruzcøxp.

Jaanä jaduhñä mee'tspähajxy
hñajty miäwiingapxpejpä, ja'a
Jesús hajxy hñajty näguipxy tøø
miøødmøjpahbedyijäbä.

³³ Nägooyyä quiujxyxiøøjøøyy,
mänit jaduhñ cøjx wyiingoodsø'øy.
Tägøøghora jaduhñ yhiyty
wiingoods. ³⁴ Coø ja'a xøø
jaduhñ wyiinajtúutcumbä,
mänitä Jesús møc yaaxy: “Eloi,
Eloi, lema sabactani.” Jaduhñ
miädia'agytiağø'øy: “Diosteedy,
Diosteedy, tiich coo tøø
xñähgue'egy.”

³⁵ Jimä jäya'ayhajxy hñajty
näje'e miähee'pna'ay. Coø hajxy
jaduhñ miädooyy, mänit hajxy
miänaañ:

—Mäadow, Elíasäda'a møyjáaxäp.

³⁶ Mänit tu'jäya'ay esponja hoy
quioñ päyø'øguiä. Mänit jiiby
piama'tsnajxy xunvinojooty. Mänitä
esponja yujxojch paxyjøbhaam.
Mänitä Jesús yaghagaabøøyyä
coo jaduhñ wyiinmúügät. Mänit
jaaya'ay miänaañ:

—Tsøc huuc híjxäm pø minaambä
Elías, pø yajmänacáañäbä Jesús
cruzcøxp.

³⁷ Mänitä Jesús møc yáaxcumbä.
Mänit yho'nä. ³⁸ Tuunä ja'a
Jesús jaduhñ ñä'ä ho'cy, mänitä
tsajtøjc-hadøødiujt cujjiä
quiøø'tswa'xy. Quiuhduum
chohñdaacy, høxtä yhøxhaam
jaduhñ yhagøødsøøyy. ³⁹ Jimä
capitán ja'a Jesús hñajty tu'ug
wyiindäna'ay. Coø yhiixy coo ja'a
Jesús hñajty tøø yho'ogy, mänit
miänaañ:

—Tøyhajt yø'øduhñ hijty
Dyioshuungä.

⁴⁰ Jimä tadjäya'ayhajxy hñajty
näje'e miähee'pna'ay jäguemjuøøby.
Jimä María hñajtypä, ja'a hñajty
jim tsohmä Magdala, møødä
Salomé. Ja'a María, ja'a Santiago
møødä José tiaj, jim hñajty je'ebä.
Ja'a muutspä Santiago jaduhñ
ñänøømby. ⁴¹ Hädaa tadjäya'ayhajxy,
quipxiä Jesús hajxy hñajty tøø
piawädity jim Galilea. Tøø hajxy
hñajty piuhbety mänaa hñajty
jim tøø yhitiän. Y coo ja'a Jesús
jaduhñ piejnä Jerusalén, quipxy
hajxy piabejty, näguipxy møødä
wiingjäya'ayhajxy nämay.

⁴²⁻⁴³ Ja'a viernes hñajty
tsuujøøby. Ja'a poo'xxiøø hñajty
tsohñda'agaamb, ja'a pascuaxøø.
Ñähix yhahixøöbiä judíoshajxy
hñajty ja'a pascuaxøøgøxpä.
Jimä jäya'ay hñajty tu'ug choon
Arimatea. José hñajty xiøhaty.
Jim hñajty miøjtunngmøødä
tsajtøgooty. Jaančh tehñ
yhojiäya'ayä José hñajty.
Jiøbhixyp hñajty jaduhñ coo
ja'a Dios ja'a møcmäjaa hñajty

yajcähxø'oga'añ. Mänitä José ja'a Pilato ja'a Jesús ñaaxni'x hoy miäyujwaanä. Hix, cabä José ja'a Pilato hänajty chähgø'oy. ⁴⁴Cahnä Pilato hänajty miädoyhatyñä coo ja'a Jesús hänajty tøø yho'nä. Yagjuøøyy je'eduhñ coo ja'a Jesús paquiä yho'cy. Mänitä Pilato ja'a capitán miøjyaaxy. Mänit miäyajtøøyy mäduhnajtä ja'a Jesús yho'cy. ⁴⁵Coo ja'a Pilato jaduhñ yhawáañäxä coo ja'a Jesús hänajty tøø jiaančh ho'ogy, mänit miánaañ coo ja'a José ja'a ho'ogyjiäya'ay ween yajmänacy cruzcøxp. ⁴⁶Mänitä José sábanä hoy jiuu. Mänitä Jesús hoy yajmänacy cruzcøxp. Mänit ñähbijty ñähmojch sábanahaam. Mänit hoy yajnaaxtägø'oy tsaajutjooty. Mänitä tsaajut ja'a tsaahajxy yaghadäguejtägooy. ⁴⁷Jimä Maríahajxy hänajty miähee'pna'ay, møødä Magdala-tsohmä, møødä José tijaj.

16 Coo ja'a poo'xxiøø hänajty tøø ñajxnä, mänitä María perfume hajxy hoy jiuu, møødä Magdala-tsohmä, møødä Santiago tijaj, møødä Salomé. Ja'a Jesús ja'a perfume hajxy hänajty yajnähaaxaamby. ²Cujaboom jopy ja'a Maríahajxy jim ñøcxy maa ja'a Jesús hänajty tøø ñaaxtägø'oyän. Näxøø hänajty je'e. Tøø ja'a xøø hänajty piädsøømnä. ³Tu'haamnøcxpä hajxy tiägøøyy niñämäyyäbä:

—Pønä tsaahäyaa hadäguejtú'udäp.

⁴Tehñ miejtsp hajxy hänajty jim, mänitä tsaajut hajxy yhiixy coo hänajty yhawa'adsän. Tøø

hänä'cä tsaahänajty yagjuua'äch, hoyy tsaahänajty jia cruundä. ⁵Coo hajxy jiiby chaajuttägøøyy, mänitä muutsc-häna'c hajxy tu'ug yhiixy. Jiiby hänajty yhäña'ay hahooyhaamby. Yomybioobwit hänajty miøød. Coo ja'a Maríahajxy jaduhñ yhiixy, mänit hajxy chähgøøyy. ⁶Mänit hajxy ñämaayyä:

—Ca'a hajxy mdsähgø'oy. Ja'a Jesús hajxy mhøxtaaby, ja'a jim tsohmä Nazaret, ja'a tøø miøjpahbedyijäbä cruzcøxp. Tøø jiuypijøjtägach. Tøø yaa chohñnä. Huuc tehñ yhiix hajxy, cab je'e yaajän maa je'e piädaacän. ⁷Nøcx ja'a jiamiøød hajxy hawaanä. Møødä Pedro, mhawáañäp je'ebä. Jaduhñ hajxy mhawáañät cooc jim ñøcxa'añ Galilea. Jimäc hajxy nøcxy piaady, neby hajxy hijty tøø yajmøødmädia'agyijän —nømä muutsc-häna'c miánaañ.

⁸Päyø'øguiä Maríahajxy jiuupädsøømy. Tsähgøøyyäp tsäyüuyyap hajxy piädsøømy. Cab hajxy jaduhñ pøn ñäl'ägädä hawaanä. Hix, jaančh tehñ chähgøøby hajxy hänajty.

⁹Näxøø jopy ja'a Jesús jiuypijøjtägajch. Mänitä María jayøjp yhiixtsohñnä, ja'a hänajty jim tsohmä Magdala, ja'a møjcu'u juxtujc-hooc yajnähwäatsäbä. Ja'a Jesús jaduhñ mäyajnähwaats.

¹⁰Mänitä María ja'a Jesús jiamiøød hoy jia hawaanä. Wi'i jioøby wi'i xiuu'tsp ja'a Jesús jiamiøødhajxy hänajty. ¹¹Hoy hajxy jia nämaayyä coogä Jesús hänajty tøø jiuypioøcy, møød coogä María hänajty tøø yhiixy hajujcy, cab hajxy ñäl'ägä mäböjcy.

¹²Cujecy, jimä Jesús ja'a jiamiøødhajxy hānajty nāmetsc ñöcxy camjooty. Mānitä Jesús ñāgüehxtøø'xy maa wyiinduuhajxiän. ¹³Mānitä jiamiøød hajxy hoy jia hawāāñäbā. Ni je'e ja'a miādia'agyhajxy jaduhñ quia'a mābøjcäxä.

¹⁴Cujequiä Jesús jiamiøødhajxy hānajty quiai, ja'a hajxy hānajty nāmajtu'ugpä. Mānitä Jesús jimä ñāgüehxtøø'xcumbä maa hajxy hānajty quiayyän. Mānit hajxy jaduhñ ñāmaayyā:

—Tii mijtsä miādia'agy hajxy coo tøø mga'a mābøjcä, ja'a mijts tøø xjia hawāāñäbā cóogöch hajxy tøø xyhixy hajujcy, cóogöch tøø njujypiøjtägach. ¹⁵Nöcx hädaa mädia'agy hajxy yajwa'x wiinduhmyhagajpt. Jaduhñä jäya'ay hajxy nägøxiä myajwiingapxø'owät neby hajxy ñāhwá'adsät. ¹⁶Pønjaty jaduhñ mābøjp, pønjaty jaduhñ näbejp, je'edshajxy jaduhñ nähwa'adsaamb. Pero pønjaty jaduhñ ca'a mābøjp, haxøøgtuum hajxy je'e miähmø'owa'añ.

¹⁷Pønjaty jaduhñ mābøjp, hijxtahñd hajxy yajcähxø'øgaamby hoy-yagjuøøñäbä. Ja'a høøchcøxpä, jaduhñä pa'amjäya'ay hajxy yajnāhwá'adsät, ja'a hajxy møjcu'umøødpä. Wiinghayuuc hajxy miādia'agāāñäp. ¹⁸Hoyyā tsahñdy hajxy tiehm wyidsø'ögät, cab hajxy nej tiunøøjät. Hoyyā veneno hajxy tiehm yhú'ugät, ni jaduhñ hajxy nej quia'a jádät. Y coo ja'a pa'amjäya'ay hajxy quiø'ønähgábät, nāxäbä pia'amhajxy.

¹⁹Coo ja'a Jesús ja'a jiamiøødtøjc miøødmädiaacpādøøyy, ja'a hajxy nWiindsønähjtämbä, mānit ñöcxnä tsajpootyp. Mānit hoy yhøxta'agy maa ja'a Tieediä yhahooyhaampiän. ²⁰Mānitä jiamiøødhajxy jiaāñch tu'ubøjcy. Mānitä mädia'agy hajxy hoy yajwa'xy wiinduhmyhagajpt. Piuhbejpiä Jesús ja'a jiamiøødtøjc hānajty. Majaty hajxy hānajty wiädity, yajcähxø'piä hijxtahñd hajxy hānajty hoy-yagjuøøñäjaty. Jaduhñ hānajty yajnajuø'øy coo hajxy hānajty tiømiādia'agy. Amén.